

灌陽縣志



灌陽縣志序

天地以文章造世而

帝王因設有典謨紀載之書唐虞  
以前無論矣粵稽夏商<sup>商</sup>迄於周  
室下逮七雄莫不有史以紀時  
事迨祖龍御世改封建為郡縣

單序

于是先王經世之遺典皆聚於  
秦維時列聖諸書雖槩燬於暴  
秦之烈焰猶幸律令圖籍尚存  
於故秦之相府故沛公入關蕭  
何得先入而收藏之以故具知  
天下之阨塞戶口之多寡民情



風俗之強弱則史之流傳於今也蕭相之功居多焉漢興以來版圖式廓人文炳煥龍門班固之徒相繼乘筆其間立意不同而命名亦異大抵記注於

朝廷者則為史而分編於郡縣者

單序

二

則為志異其名者初不異其實也今天下四海同風兆民樂業我

皇上於萬幾之暇博覽羣書留神遺典現在遴選鴻才碩畫纂修

三朝國史暨明史而外仍以修輯統

志爲汲汲灌陽雖彈丸山邑是  
亦古方六七十如五六十年之邦  
也莫非王土何獨于邑志而慢  
焉忽之况其中有關於戶口錢  
糧山川人物與夫忠孝節義之  
堪型昆虫草木之足紀歷代相

單序

三

沿之跡何忍聽其湮沒詎非典  
之至重而務之綦急者乎吾因  
之有所感矣猶憶

皇帝御極之四年先叔祖澹庵公  
曾任是邑幸告無罪考滿量移  
屈指三十餘年其減荒平險諸

善績至今猶膾炙人口不謂余  
於乙酉之秋亦獲濫膺茲邑祖  
孫先後均沐

天恩猶得與當年二三父老班荆道  
故相與有成不可謂非意外之  
竒遇矣余下車之始首以黌宮

單序

四

城垣橋梁爲亟亟旣而詢及邑  
志僉云灌邑之志向附載于全  
陽之末簡兵燹之後散失殆盡  
卽有一二斷簡殘篇尚須訪輯  
余聞而憮然者久之每逢各  
當事下車例取縣志以備參考

類皆抄本以應命其前後次第  
不無差謬抑且缺漏簡畧草率  
不堪亦從未有以一邑之盛典  
竟甘附庸於隣國之理也余不  
揣荒陋謬冀輯而新之爰謀於  
儒學暨邑之縉紳先生博

單序

五

採旁求共勳盛事其未入者增  
廣之缺遺者補綴之俾百餘年  
廢墜之典一旦復興不旁墻壁  
自成一書而煥然改觀者雖荷  
諸君子之賢勞實余司牧者之  
職分也是志也經始於上冬之

十月告成於今歲之四月爰集  
歷朝分爲十卷綱舉目張同條  
共貫而先叔祖叙次一篇亦  
得附驥於簡編之末其平疇險  
道水陸要衝亦可備爲問津一  
助且獲與翰墨名流溪山勝境

單序

六

並乘垂不朽每于晦明風雨之際  
按圖披閱一往情深覺龍岡擁  
秀可翹首而遐觀也三峯烟雨  
可臥遊而神往也玉樓晚渡可  
羽化而登仙也至于羣峰之翠  
繞灌水之碧合井疆之繡錯併

可指顧而流連也而且弔重華  
於湘水景清節於濂溪千古名  
賢其足供人以尚友者何限矧  
龍川之冠裳濟濟倘肯不吝金  
玉而示我周行其取益叟當何  
如也然斯志也此其大畧也惟

單序


七

願後之君子神而明之擴而克  
之力任繼往開來之責而垂無  
窮焉此又余之所厚望已是爲  
序  
昔

康熙四十七年孟夏月穀旦知灌



陽縣事東海單此藩撰



單序

八

灌陽縣志序

粵稽夏之禹貢周之周禮晉之乘  
楚之檮杌魯之春秋皆史也而無  
所謂志漢司馬遷於傳紀之外又  
名爲書至班固始著爲志厥後祖  
之而郡邑亦因以有志蓋志與史  
名不同而實則一也然史記一代

陳序

一

之大必由志記一隅之詳而采擇  
焉則郡邑之志又史之先聲而不  
容或闕者矣灌陽志自明嘉靖六  
年周公應祿修輯之後越今一百  
八十餘年其間政治人文向皆吏  
人抄錄至康熙二十四年全州修  
志附載灌事於末類皆叙其大畧

而外漏亦多。孰若專有成書詳確  
記載始足彰我

國家維新之盛治載哉嗚呼為一代樹  
不朽之業以傳信於後人者良史  
官事也為一邑樹不朽之業以傳  
信於後人者良有司事也乙酉季  
秋江左

陳序

二

單公以慈惠通達之才來令茲土  
下車問俗首以不見邑志全編為  
憾爾時亟欲修輯既以繕城垣察  
戶口修橋梁飾序序勞勞兩載百  
廢瘵始興乃屬邑紳蔣君學元取抄  
本邑志纂輯成帙復命廷藩校訂  
將授之梓竊廷藩知識寡陋曷克

勝此巨任然得廁名典冊又所深  
幸而未可以不敏謝者於是遍造  
紳士之廬博訪輿人之論始得仁  
壽里民時賢臣所藏嘉靖志刊本  
及故紳唐君納牖手輯遺稿叅以  
廣西通志全州志與各紳士札寄  
家譜詳細攷訂改正其遺訛次第

陳序

三

其先後首輿地以定疆界疆界正  
而事功乃興故建置次之事功之  
本在農故賦役次之既富必加以  
教故官師次之教化興則人才出  
故選舉次之次則治行以表循良  
次則人物以彰賢淑次兵防而牧  
圍可固次事紀而補救宜先至若

挽運起衰必藉鴻文碩畫故以藝  
文終焉計爲綱有十爲目七十有  
六雖不敢謂掇拾得宜而矢公秉  
直據實徵辭爲後人傳信則固廷  
藩之所報命於公者也惟是忠  
孝節烈一百八十餘年以來聞見  
罔及掛一漏萬之咎知所難辭踵  
於後之君子云

陳序

四

康熙四十七年夏五月灌陽縣儒  
學教諭勾漏陳廷藩謹序



灌陽縣志後序

灌邑志書自前明嘉靖間曾經修輯迄今垂一百八十餘年從未有  
一人議及者茲幸

單父母蒞任勵精圖治百廢具舉慨  
然尋覽舊志柰兵燹疊經久與秦  
灰俱冷由是深嘆文獻殘缺無所

蔣序

一

稽考徧詢之紳士力謀重修同人  
咸推予齒長

單父母遂諄諄委命焉顧學元老矣  
奄奄衰病棲遁深山欲遵命則不  
勝竦息欲劾辭恐有孤

賢賢侯雅意於焉勉支病骨強事操觚  
搜撮遺編攬摭徃蹟數閱月而始

告成噫學元竊因是重有感也世  
俗之蔚稱吏治者惟是簿書期會  
征權訟獄為大故至於典章經制  
政體治道所關人心風教攸繫輒  
因陋就簡漠不加意孰似我  
候侯鄭重斯事總總然必期其編訂成  
帙也哉益我

蔣序

二

侯夙擅通敏之才鄉叨

御前召講指畫天下大計侃侃不憚詳  
切故茲治理之暇惟殷殷注念灌  
邑僻在一隅舊志堙圯殊為闕典  
毅然引為己責其惓惓於斯事若  
此將使邑之名士大夫卓節懿行  
咸藉表章昭垂奕世豈猶似曩者

類祀宋之不足徵耶學元所以感我

侯之悃悞忘自心之荒陋奉命唯謹  
謬加詮次雖不敢擬王會三輔之  
圖方輿寰宇之記然於政務之損  
益宦業人物之臧否亦稍稍具載  
而臚列焉俾後之問俗茲土者考

蔣序

三

據因革有所鑒誠卽邑中繼起之  
彥亦將景慕前修美墻如見可以  
興焉可以觀焉其於政體治道人  
心風教不均于斯志有賴也歟爰  
僭綴數語于末簡

峕

康熙四十七年歲次戊子蒲月穀旦



邑人蔣學元書時年八十有三



蔣序

四

鼎修灌陽縣志姓氏

總裁

文林郎知灌陽縣事紀錄一次單此藩

校訂

灌陽縣儒學教諭陳廷藩

協修

灌陽縣儒學訓導陳御卿

灌陽縣儒學現任訓導謝宗璜

灌陽縣典史汪士隲

灌陽縣志

卷之一

姓氏

一

吉寧鄉崇順里巡檢司巡檢 崔士元

纂修

鄉官 蔣學元 王之驊 王維泰

舉人 唐時榘 時之華 唐紹臨

文奕彬 蔣依錦 唐宜甲

陸生楠 文奕遠 王文煥

蔣振芝

貢生 唐象兑 唐懋德 唐嗣寅

唐懋行 何愈 王維

監生

文縉

蔣文卿

戴允元

陸士亮

蔣振芳

周書

鄧斯綰

王象升

鄧祖仁

翟仵

鄭孫僑

唐宁寔

周禮

唐時儒

蔣極

唐懋官

范依仁

鄧大治

蔣匹葵

陸運文

卿玫

時之英

卿恪

王之騏

蔣開馥

唐守仁

唐咸仁

灌陽縣志

卷之一

姓氏

二

蔣秦贍

唐懋功

唐宁容

文振科

文鼎凝

蔣注泰

吕份

蔣文燦

李蔚

唐虞瓊

唐時哲

王振儒

史猷

唐堯重

陳蔚

蔣聖宜

王廷鐸

鄭運煥

李增昌

吳國縉

史婉麟

灌陽縣志凡例

一邑志記載往事以備稽考固宜從詳其間輕重前後亦自有序今以輿地建置等分為十卷因類附麗繁而不雜雖與舊志稍異考諸中州各志體裁大率如此非敢憑臆見也

一志中有遇 國朝惟空一字係古金石刻例取便觀覽至於部臺藩臬郡守縣令例皆稱名今遵直書用志仰止

一輿地志形勝在山川前一統志皆然其山川有方

灌陽縣志

凡例

一

隅源流之別里堡鄉材<sup>村</sup>有今昔之殊備悉詳註庶覽者披圖可得矣

一建置城池公署學校壇祠固所先矣而倉庫以廣積貯郵舖以達上下街市以聚財貨津梁以便往來水利以資灌溉皆為政之所急者若亭臺坊表所以景古旌賢郵政所以養生送死寺觀亦神道設教之意以次編載庶見鉅細有倫云

一賦役俱本於明隆慶六年丈量頃畝則數而嘉靖前亦存者以備考也惟 國朝微解一遵賦役全

書臚列以爲後來則壤之準

一官師幕職巡檢例得並書其委署之員原不在列然實有功德於民者亦不恐令其泯滅也故敢附見於後

一選舉志甲科貢監薦辟吏材書之不厭詳者重得人也惟明季鄉試貢期皆止於甲申其後中式出貢者亦第附見義取從周幸無深罪

一名宦所以表揚往行風厲將來但德怨所藪操觚不易舊志名宦登者四人竟無一傳如元之久公

往政蹟彰彰明之彭公侃百姓保陞汪公大川去後見思亦俱無傳雖甘棠之咏猶在人心而無如何矣茲於國朝蒞灌諸公中摘其惠愷之尤者畧書一二其允堪尸視與否則聽之灌之人士一鄉賢必以名德並著止有才者不與焉然豈無德豐而名偶畷者乎今考與祀諸賢有有傳者亦有未有傳者茲奉邑公之命博采輿論凡近日隱閔之行必錄貞苦之節亦著以見人苟克自樹立雖匹夫匹婦皆與卿士大夫無異視蓋善善從長

非敢濫也

一兵防舊無專志今於諸志中散見如守禦營堡關隘道路有關戎政者悉移置之俾一目瞭然如示諸掌亦或濟州衣柳之一助歟

一志有事紀頗近蕪雜然春秋編年災異兵寇有書今志中如丈量已見田賦修城修學已見建置修志已見姓氏外此無所附者則錄以遺於後焉

一藝文為記述名物而作凡先正辭章名流歌詠有裨治道有關風景者咸錄之以廣文獻餘則從畧

灌陽縣志


凡例

三

一邑志修於明代嘉靖至今一百八十餘年兵燹之後簡編無幾今雖廣為采輯亦止據舊志而益新聞已耳寧無未盡來告者乎倘有暫遺嗣當補人一嘉靖舊志官師選舉內爵秩姓名或有舛誤遺漏詩文內字句亦有改竄失真者且考康熙二十二年廣西通志康熙二十四年全州志附載灌陽事欸亦多遺誤是以不憚勞苦躬親查對歷代碑記崖洞石刻及各家家乘逐一改正增補備註其下俾後之修志者有所確據不復魚魯之失誠以志

為記事之書自當傳信，不容傳會，非薄前人也。幸  
諒之。

勾漏陳廷藩謹識



漢南縣志

元例

四

灌陽縣志目錄

繪圖

卷之一

輿地志

沿革

星野

氣候

疆域

形勝

山川

古蹟

風俗

里堡

鄉村

卷之二

灌陽縣志

目錄

建置

城池

公署

屬署

行署

學宮

學舍

社學

壇廟

倉庫

郵舖

街市

津梁

水利

亭榭

坊表

郵政

寺觀

卷之三

賦役志



戶口  
田糧  
屯田  
起運  
存留  
物產

卷之四

官師志

職員

縣職

屬職

教職

卷之五

選舉志

進士

乙榜

舉人

灌陽縣志

目錄

二

副榜

武舉

恩貢

拔貢

歲貢

例貢

監生

薦辟

吏材

武畧

卷之六

治行志

名宦

宦蹟

卷之七

人物志





灌陽縣志


繪圖

西至興安鹽洞界五十里 又西至恭城分界一百里

南至永明三峯嶺界五十里



二



灌陽縣志

繪圖

三



教諭  
宅址




明倫堂

訓導  
宅址



啓聖祠



大成殿

鄉賢


門

戟

名宦



敬亭社



灌陽縣志卷之一

輿地志

先王經理天下必先畫疆分服度地居民俾各守土為治蓋疆域正而後可以定則壤察民數慎封守而施政教也但歷代鼎革不同民俗亦不能無變官是土者以時為政則豈弟之澤溢於封內矣  
述輿地志

沿革

邑名灌陽 在州南九十里以灌水為名○晉書地理志有曰觀陽者即今之灌陽也疑古字觀

灌陽縣志

卷之一

輿地

一

灌通用○按春陵古碑刻有漢北綏民校尉騎都尉桂陽曲江灌陽長熊君之碑熊君名尚初劉表之為荊州牧也選拜綏民校尉又領曲江居五年去官未幾詔拜騎都尉灌陽長則灌陽之名舊矣蕭銑因取以名邑也○唐地理志為中縣○九域志為下縣○按吉寧灌令二鄉先隸昭州恭城縣後以州縣濶遠始割恭城二鄉合湘源之昭義鄉而置邑焉

乃禹貢荊州之域漢武帝元鼎六年置零陵郡統縣十有曰洮陽者即今全州是也隋改洮陽為湘源至大業十三年蕭銑析湘源置灌陽隸零陵郡唐武德七年灌陽廢上元三年永州刺史宇文審觀察使呂諲奏請復置縣仍隸永州府石晉天福

四年馬希範請置全州事改湘源為清湘仍以灌陽為屬宋乾德二年王師克湖湘周保權入覲始歸職貢領縣二曰清湘曰灌陽元至正十三年丙子兵破潭州署本郡陳宮講遁清湘縣令蕭巖叟率眾歸附十四年四月立安撫司六月改設全州路總管府仍領清湘灌陽二縣明洪武元年平章楊璟總師收廣西元守臣平章阿思蘭僉院黃世榮棄城遁廣西父老李壬經等率眾歸附乃改為全州府領清湘灌陽如故至九年復改為全州裁

去清湘正領灌陽隸湖廣永州府二十八年征南將軍韓觀具奏隸廣西桂林府而灌陽屬之焉

國朝因之編戶八里

星野

軫星散為荆全其地為楚

出春秋楚地翼軫之分野元命苞

今南郡江夏零陵桂陽武陵長沙及漢中汝南盡楚

分野

出漢地理志

自張十七度至軫十一度為鶉尾於辰

在已楚之分屬荆州

出晉天文志

零陵入軫十一度而灌

陽之吉寧灌合二鄉析自昭州之恭城則有越焉

出郡

次纏

氣候

氣候與江漸浙類嶺外代答云雨下便寒晴便暑不論

與江漸浙相類過桂風氣清淑桂林志靜江風氣和平

林而南則大異矣

時舉疾疫不興

舊志按灌陽氣候與全省同矣竊謂寒暑畧有不

如時者蓋春為暑之漸也灌則正二三月尚有冰

霜畧不如春矣夏為暑之極也灌則四月尚涼五

月始暖六月始暑畧不如夏矣秋為寒之漸也灌

灌陽縣志

卷之一

輿地

三

則七月極炎八月尚熱九月始涼畧不如秋矣冬

為寒之極也灌則晴霽尚暖陰雪始寒亦豈盡如

中土之冬也哉○又竊謂素無瘴氣蓋天下論多

瘴者必曰廣西然廣西郡邑遠近不同可以一例

論哉灌之為邑近而湖廣廣東遠而南畿江右游

宦經商商於此者接踵未聞一之不服水土而病也

亦未聞一之感疫癘而歿也但每歲至四五月雨

多河溢食之多瀉謂之麥根爛也至八九月驟熱

驟寒病多廬謂之小陽春也然此二病在燕齊之



外往往通患豈特灌哉若青黃二瘴灌其免矣

疆域

縣東至湖廣永州府零陵縣粟蒙坑界一百八十里

南至湖廣道州永明縣三峯嶺界五十里俱山路通行

西至桂林府興安縣鹽洞界五十里鋪路通行

北至全州清湘深浦洞界五十里鋪路通行

東南至道州一百四十里鋪路通行

西南至平樂府恭城縣一百三十里山路通行

西北至興安縣一百五十里山路通行

灌陽縣志

卷之一

建置

四

東北至永州零陵縣二百四十里水陸通行

東西相距一百里南北相距一百三十里廣袤七百

三十五里自縣治至州城九十里至省城三百七十

里至京師七千二百七十里

形勝

際湘源而瞰嶺右控平樂而距零陵灌水西繞而帶

縈三峯對峙而鼎立舊志濂溪周夫子波瀾所及之地

趙文蔚山峭削如簪木水縈紆如帶熊詢羣峯森列參

錯秀整洪濤沃日澄瀾際天風水與潭之湘鄉往往

相類陳德一環灌皆山山高幾千萬疊水繞幾千萬

灣張奎慧水抱山根石壁千仞江流澄滙有巖穹然

詩顧璘山水清奇甲於旁邑陳璫學記

山川

臺山在縣西北半里有真武龜蛇跡 華山在縣南五里八景之一曰華山雪霽

麒麟山在縣東一里原名旗嶺 馬鞍山在縣北三里

三峯山在縣南十五里常有烟雲繚繞其上峯巒若隱若現為八景之一曰三峯烟雨

牙笏山在縣南十五里 文筆山在縣西舊學前

王樓山在縣西二里 判官山在縣西南二十五里

灌陽縣志 卷之一 輿地 五

馬山在縣西南二十五里狀如二馬驤首並馳 白臉山在縣北三里

俊山在縣西四十里從平田中突然矗起宛一枝文筆形家呼為華表舊名檜山隆慶六年全州守

方沆奉委丈量田畝至此一見奇之改為俊山因題詩云孤嶂亭亭立擎天一柱奇楚南千萬里村

落有誰知 獅山在縣西南二十里一在白石江

龍岡在縣西十里八景 平頂山在縣西七里

五馬山在縣西七十里 爬子山在縣西七里

印石在縣西七十五里有海山在復順里週

風吹羅帶山在復順里去 荊魚山在縣北七里

峽山在縣北十里重岡疊嶽兩

帽兒山 在縣北五十里

牛山 在縣北五十里

連珠山 在縣北八里

涼傘山 在縣東二十五里

梔子山 在縣東南二十里

抱子山 在縣北二十里

印山 在縣北六十里

七星山 在縣北五十里

石子山 在縣北五十里

掛榜山 在縣北四十里

馬頭山 在縣北六十里

大人山 在縣北六十里

火星山 在仁壽里

蓮花石 在縣北六十里

石人山 在縣北四十里

葛背嶺 在縣北七十里

雷嶺 在縣北四十里

灌陽縣志

卷之一

輿地

六

潢潭磐石 在縣北五十五里 一石卓立於潭左最深

印浮水面有級可登懸崖側立佳

通真巖 在縣西二里 上有古篆通真岩三大字

花石巖 在縣北六十里 昭義關有詩

望德巖 在縣北十五里 名望風巖 在縣西二里

蓮花巖 在縣西二十里 長塘 寧江巖 在縣西

九龍巖 在縣西十五里 中有沙河 水通別澗 內有石

波斯巖 在縣南四里 師姑巖 在縣北十二里

赤巖 在縣北五里 小水巖 在縣北五十八里

五十六里下有字

仙人巖 在縣北二里 玉珠巖 在縣北十五里中

桂巖 在縣北五十五里 巨岩一水穿岩而

白竹巖 在望月嶺去城五十里 人跡

按舊志載有金鷄巖今查係全州地合得訂正

仙源洞 在縣西十里州守顧璘嘗於此訪

龍巖洞 在縣西十五里有石磬擊之聞遠

打鼓洞 在縣西四十里下 白魚洞 在縣南

按白魚犁陂二處俱無巖壑乃田洞之洞也

灌陽縣志 卷之一 輿地 七

灌水 在縣南源自興安界 牛江 在縣西一百里源出

清溪 在縣西九十里 東江 在縣西八十里

瑞溪 在縣西七十五里一名稅溪

市溪 在縣西七十里自永明

鹽川水 在縣西北五十里自興安界流入灌江內有

訛呼為資子岩登其巔可望省城為縣治龍

大溪源 在縣西南六十里 烈溪源 在縣西三十里自興

馬山源 永縣西南二十里 石塘水 平縣西五里自蘇九

黑石源水 永縣西南十五里 安樂源水 永縣西南二十里

澗江判官山遠經三峯山流入灌江自

吳川水在縣南自永明巖淨水入灌江西流

文峯潭在縣西舊學前即放生潭

龍川水界流西北自興安沙羅江在縣西北

馬渡江赤岩流入灌江自峽水在縣東北十里高山

餘里一曲一灘名不勝紀而大龍大埠三桂

飛江自永明界流入灌江內鍾山水道州界流入灌江

小河源水在縣東北五十里自道

三企牛巖水在縣北五十里自江

灌陽縣志 卷之一 輿地 八

小富水在縣北六十里自旗嶺山

龜溪出於桂岩大陂坊

會湘水流入灌江而會於湘故名

效牙塘在會湘橋一泓清可危石中生俗名碁盤石

辨難

古蹟

舊縣在縣西二十里崔兒山前

四友堂在縣治西宋淳祐中縣令黃

仙人跡在縣西三里王樓山上有二

馬蹄石 在縣南七里華山頂上有四大馬蹄

明碑 在縣北五十五里大覺寺內接碑載宋靖康之

安仁駐道州不徒者彌五月剝剝及灌疆膾人而

食殺戮如麻民死者十七八太尉岳飛承命討蕩

初夏提孤軍至衆不滿七千徑擣戰勢如破竹既

風俗

習俗醇古民風習俗與中原同 桂林志云靜江與湖

原俗尚質樸士知經術李彥八桂堂云民俗篤信陰

賁未嘗生理不漁則樵李儀全州記云清湘間水清

灌陽縣志 卷之一 輿地 九

目前得一温民訟甚簡火耕水耨 地理誌云楚地火

飽便不他圖 婚姻喪祭古訓是式凡饋遺以檳榔為先勤力生業

趙文蔚學記云勤力生業有齧齧之童皆善讀書熊

討論之學良由先世業儒也 故民間而性淳事簡而訟少盜賊希有囹圄常空

里堡

宋元時四十有二里

明洪武二十八年猺蠻作亂調軍征勦殘敝併十有

四里宣德間民又逃竄併八里正德十六年又遭

蠻賊殘破併五里隆慶六年民徭定為九里上鄉

五里曰左坊右坊大保全仁壽永豐下鄉三里曰  
正一保正二保上三保裡一里曰歸化上下各  
半萬曆九年丈量田地仍作九里

國朝仍舊但兵燹之餘遺民十存一二雖極力招撫  
尚未克足惜乎名存而實不副

鄉村

仁江堡 關上 峽口 水碓埔 沙子橋

沙羅源 馬渡橋

東秀堡 秀江屯 白魚洞 寺木村 吳家村

王家灣 雷公平 孫家村

觀因堡 小江頭 下臺 王樓山 荒田村

莫家村 等角村

傳山堡 范所垌 鴨子庄 龔家村 豐下屯

王家村 鄉繼村 栗樹林 下宅 附馬鞍山

黃土營 鉄石堆 長塘村 附周普塘  
甲山嘴

洞背村 龔所屯 女兒巢 尹家埔

江口堡 江口 上下村 熊家寨 葉官營 杉木屯

黑石營

獅子堡 馬山村 時官屯 三所 車頭

竹畛 小營村 漣漣埭

峯白堡 白沙 唐官屯 李官屯 徐官屯

花果弄 鄭家山 白面山 苦竹塘

鹽後堡 黃牛寨 鹽田源 茶山口 冷水壩

火爐源 大堰 永里所 俊山村

月山堡 老史巢 西灣上下村 椅石 童官營

官田村 陳官營 大凹里

崇順里 四小甲 觀音閣 灌井塘 伍家灣

灌陽縣志

卷之一

輿地

十一

青石薛

以上九堡即古之吉寧灌合二鄉今悉名上鄉

昭達堡 昭義附館驛張家塘 會湘橋 達石附沙地

大坊附大蓮塘

唐文堡 唐家上村附田心 下村 車頭

丈村 沙坪 灣子丘

官平堡 唐村 官莊上中下三村 大車田二村

陸家村附蔣家窰

犁陂堡 犁陂垌附山岐 蔡家垌 伍家灣



水車 下營 彭家營 山尾

大營堡 大營 開德嶺 楂塘 小營

枕頭嶺

望月堡 土溪 望月嶺 古迹 結頭

秀水巖 清塘 附麟村 辰山尾

巨巖堡 桂巖 小路 勒塘 附儀塘 木老 附瓦窰頭

木催 上村 宅首 陣伯 程

下坪堡 下坪田 長渡 大橋 盤村

陳家衛 栗灣 上村 新墟

灌陽縣志

卷之一

輿地

十二

赤板堡 徐所 蔡所 蘇官屯 板橋舖

小龍 嶺背 橫埔 楠木山

以上九堡即古之昭義鄉今悉名下鄉

按舊志自仙源洞關上至板橋舖小龍一帶名德

化鄉自新墟至會湘橋一帶名永湘鄉白秀江屯

王樓山至復順里名灌合鄉其分析合併年月失

傳無考附記以俟知者

灌陽縣志卷之二

建置志

朝廷營建都邑無非使民樂業之有地向化之有方也故屹崇墉以嚴防衛高堂簾以肅臨御謹庠序以施教養下至津梁陂堰樓閣坊表之屬莫不以時修舉所以周惠澤而廣視聽焉若夫梵宇斗壇亦足翊正教以導善端為政者審本末而權緩急宜因而因之宜創而創之則民有餘力馨鼓弗勝矣述建置志

城池

縣舊無城池明洪武二十六年猺蠻作亂攻圍縣治縣丞李原受具奏調軍勦捕寧息二十八年改隸廣西建守禦千戶所始築土城高大五尺週四百七十大串房五百間上覆以茅大門四東德化門南鎮遠門西崇順門北龍川門西北鑿以濠至天順元年千戶陳銘典史陳畀撤茅易瓦東南鑿新濠共五百五十八丈四門各建城樓一座正德十四年恭荔寇毀布政司叅政彭夔同知張華按臨督砌極其完固嘉

靖十一年巡按御史施一德發公帑命署縣事州同楊麟千戶陳楚雄等重修甃砌內外易串房改槽堞始稱堅城邑人李崇禎高有記十七年知縣溫厚典史張必昇建龍川德化二門月城增高城堞邑人戴明聖有記其德化門月城尋為兵燹折毀

### 公署

縣治自隋已建其創始歲月姓氏失傳至宋淳祐辛亥縣令主管勸農公事兼弓手寨兵軍正張從龍重修規模弘敞趙嘉慶有記元至正十三年縣達魯花赤兼

灌陽縣志

卷之二

建置

二

勸農事久住重建縣廳十五年春創譙樓

張顯仁明有記

洪武元年知縣王友裕復建二十六年寇燬宣德八

年知縣王偉重建

林舉有記

後毀

國朝康熙八年知縣

單父牧重修

正堂

三間明知縣朱由林匾曰忠愛堂

後為鞏蓬

一後為川堂三後

為樓

三後為書房三

東為花廳

三間知縣陳一

後為

廚房

三西為幕廳三

後為知縣宅

三堂前為鞏蓬三

左右皂隸廳

各一兩翼為六曹房

各三前為儀門

三

門左為土地祠

三門右為獄舍

三又前為大門

上建譙樓

三間若戒石亭旌善亭申明亭俱久廢未復

屬署

典史廳在儀門內正堂西 國朝康熙五年典史楊

茂芳重建正廳三間後宅三間前為鞏蓬門一左右廂房三各

間前為大門一廳西為花廳三間後為幕廳三間

吉寧巡檢司在縣西九十里明洪武十七年開設正

德十四年叅政彭夔同知張華重修十六年兵燬遷

於上薛寨正廳三間後宅三間

醫學在縣南明洪武十七年設今廢

灌陽縣志

卷之二

建置

三

陰陽學在縣北明洪武十七年設今廢

僧會司明洪武初設於慧明寺今廢

道會司明洪武初設於朝元觀今廢

行署

一

分司在縣學左明正德十六年知縣王志典史柳端

和重修今廢址存

府館在縣治西門正德十六年知縣王志重修 國

朝初分防城守作署康熙三十三年燬今址存

昭義公館在縣北六十里舊有惠民碑今廢

月岡公館在縣西百里舊為崇順公館因提學劉梅國更其名今廢

### 學宮

儒學在縣治東隋大業十三年建宋崇寧間以舍法養士謂其地隘遷於西門外去城一里許建炎三年司教進士范昂仍遷於縣治東熊詢淳熙九年縣令趙永以崇寧舊址厥土爽塏襟抱環密復遷而西余  
一有嘉定十六年郡守蕭一致楊若縣令洪若水節次重修陳德一元泰定四年達魯花赤懷禿縣尹董

貞重修趙文蔚至正二十五年達魯花赤兼勸農事

久住重修孔思垣明洪武元年知縣王友裕重修袁誠

仲有正統二年知縣馬驥重修張蕤成化二十三年

知縣劉麓重修陳瑤嘉靖二年副使楊必進行部謁

廟以學在城外荒僻卑隘委知縣周應祿典史柳端

和監生張鑑耆老呂釗等仍遷於縣治東原址創

聖殿兩廡戟門櫺星門泮池橋規制始備蔣冕萬曆

二十七年知縣夏之時重修天啓二年知縣梁鏤重

修蔣士忠國朝康熙二十一年署訓導朱雲倡修

有記

聖殿檢蓋塗飭遂請督學王如辰記未經勒石二十三年布政司照磨署縣事趙光勗重修兩廡戟門皆

重新焉唐納牖有記

大成殿座一東西兩廡間各三戟門間三櫺星門六聖域門

一賢關門一間俱康熙四十七名宦祠門一間戟鄉賢

祠一間戟泮池戟門前啓聖祠在聖殿東康熙二十四

### 學舍

明論堂在聖殿後順治十八東齋西齋俱久射圃

久敬一箴亭在聖殿東尊經閣上久址存教諭

灌陽縣志

卷之二

建置

五

署在明論堂後訓導署在明論堂左

舊學地在西北至射圃水落至低處

學後射圃地橫二十二丈五尺

文峯潭在舊學前源名放生潭上

學洲地在文峯潭東西北

東門文昌社學南門義和社學西門興賢社學北門

朝元社學俱久廢

### 壇廟

風雲雷雨山川壇在城外西北半里每歲春秋二仲

同祭壇

社稷壇 在城外北一里許 每歲春秋

邑厲壇 在城外東一里 每歲三月清明日七月望日

城隍廟 在縣治西舊在縣北城外 明正德間知縣

土地祠 在縣大

舜地廟 在縣西南五

禹王廟 在縣西南三

令公廟 一在縣堂右 國朝康熙十二年

關帝廟 在城西

灌陽縣志

卷之二

建置

六

茅將軍廟 在城東門外半里

金山殿 在城南

九龍聖水廟 在縣西

陳牛二侯祠 在縣學東 國朝康熙三十一年

先公廟 在縣北五十里 犂波洞神係五代時人姓蔣

於此築壩開渠通水平原 曠土皆成膏腴 計畝三

千有奇 至今民食其德 原建有廟祠 碑石几遇水

早祈求 皆應 鄉人春秋 祈報之外 每月有祭

石城廟 在縣北五十里 文村知縣

烈溪廟 在縣西三十

李將軍廟 在下鄉東

丁三郎廟 在縣北五里仙源洞

黃龍廟 在縣東十里秀江屯

### 倉庫

預備倉 在縣堂東三間 卽灌字殿堂西九間 後五間 康熙三十年知縣周天位建四十六年知縣

單此藩重修

石庫房 在縣堂右今圯

### 郵舖

昭義驛 在縣北六十里花石岡今廢

永泰驛 在縣東七十里今廢

灌陽縣志

卷之二

建置

七

縣前舖 在縣治右

關上舖 卽縣北十里馬渡橋

板橋舖 全縣志作板頭

新墟舖 卽縣北三里

鍾家舖 卽縣北四里

羅板田舖 卽縣北五十里全州地食灌陽糧

馬梯舖 卽縣北四里

小富水舖 卽縣北五里

昭義舖 卽縣北六里

巨巖舖 卽縣北七十里

陳伯舖 卽縣東南八十里

老婢塘舖 卽縣西五里

### 街市

東門街 南門街

西門街 北門街

學前大街 義和坊

興賢坊 桂華坊



江寧坊

惠政坊

朝觀坊

十字街

濠關洞

上馬頭

土橋頭

新墟店

文市

昭義店

巨巖店

江口店

黃牛寨店

白竹舖

桃花井

觀音閣

津梁

南津渡

縣南半里舊名劉家渡

王樓山渡

縣西三里八景之一王樓晚渡

寧江渡

縣西十五里舊名昌江渡

時官渡

縣西二里

昌家渡

縣北三十里今廢

達塘渡

縣北三十五里即昌家渡移于此

結頭渡

縣北四十里

沙坪渡

縣北四里

灌陽縣志

卷之二

建置

八

唐村渡

縣北五十里

文村渡

縣北五里

江西渡

縣北六十里全志遺

館驛渡

縣北六十里全志作舖

昭義官渡

縣北六十里

按舊志載有白水渡今查係全州地合得訂正

長寧橋

在城內縣東三路所會天順六年千戶陳銘建下砌石二鞏上覆瓦亭教諭黃紳有記

國朝康熙四十四年正月火燬瓦亭

龍川橋

在縣北三里明洪武初全州知府章復命工修建宣德五年重修

德興橋

在縣北十里明洪武初邑人蔣登甫砌石為岸架板為橋名曰登雲後圮景泰五年知縣

潘文浩建石拱三圈上覆瓦亭規模雄壯易名德興國朝康熙九年洪水衝頽三十六年知縣佟

世芳重建四十五年水復衝塌橋右知縣  
單此藩倡眾重修今更名通濟橋有碑記

唐安橋在縣北六十里明洪武初處士唐以廉興僧  
唐錦春捐貲倡眾代石鄧綸有記

會湘橋在縣北七十里宋淳熙五年邑人范達等伐  
以洩水勢上覆瓦亭十二間張紱有記

賓家橋在縣北五十里明永樂十七年邑人  
登瀛橋在縣北五十里大坊村明弘治六年謙之孫存

量捐貲斲石郡  
人雷震有記

鹽田六小石橋在縣西五十里邑進士李高父  
用蕃捐貲伐石斲砌李高有記

灌陽縣志 卷之二 建置 九

復興橋在縣西南十里明正德二年知縣  
陳昌期致仕驛丞萬信等重修

瑞溪橋在縣西六十里又名稅溪橋  
江口橋在縣西二十里

蓮花橋在縣西五十里禾倉橋在縣西六十里

馬騎橋在縣西八十里水利

同車壩在縣東北三里先公壩在縣東三十里

馬口石塘在縣東五里李家大塘在縣東北五十里

龍河壩在縣北三里仁陂在縣北五里

龍家壩在縣南十里又名龍塘

龍門壩在縣南五里

龍家壩在縣南十里

上壩 縣南五里

大陂塘 縣西百里

老婢塘 縣西六十里

石井塘 縣西五十里

冷水壩 縣西四十里

青塘 縣西二十五里

貴魚塘 縣西三十里

赤巖水 縣北五十里

桂巖水 縣北七十里

灌陽縣志 卷之二

楓木陂 縣北六十里

塘頭 縣北五十里

潢潭塘 縣北六十里

大車田陂 縣北八十里

官莊陂 縣北八十里

古跡塘 縣北六十里

燕子塘 縣北二十里

大灌塘 縣北二十里

縣前井 縣東數步

一方皆汲

大壩 縣南七里

烏龜塘 縣西四十里

倒風塘 縣西六十里

蔣家壩 縣西五十里

古城江壩 縣西五十里

龍岸水 縣西二十五里

婆娘壩 縣西三十里

小水巖 縣北六十里

人字陂 縣北六十里

建置 十

塘底 縣北五十里

車頭陂 縣北五十里

唐村陂 縣北六十里

土溪塘 縣北六十里

江東陂 縣北五十里

秦家塘 縣北五十里

犀牛塘 縣北五十里

九龍井 縣西五十里

朝元觀井 門在觀大

北門街井在街 西門城邊井亦方

東關外營井在城 北亭田泉一縣北

蠓塘灣泉十縣北 沉香塘泉八縣北

南灣泉十縣北 新墟鋪泉十縣北

井院泉十縣北

亭榭

愛道亭城北臺山頂邑進 觀瀾亭在愛道亭南邑人

皆春亭觀瀾亭南今廢 北亭在縣北門外今廢

栢亭一在縣北三里八景之 右匱關亭八縣北

灌陽縣志 卷之二 建置 十一

王樓山亭三縣西 思栢亭後州守顧璘建廢

曲水亭在縣北五十五里登瀛橋側與古昭義閣對峙石分曲字中可流觴昔人方之蘭亭云

文昌閣縣東半里國朝康熙六年知縣單父收捐

此藩置買本閣侍香常住田土名三里 橋田十工每歲賦糧係縣令代捐輸納

坊表

騰蛟坊 起鳳坊俱在儒學門左右今俱廢

象繡坊在千戶所左明嘉靖三年副使楊必進為御史李高立今圮

施惠坊在昭義青岡宋嘉定十六年真德秀為蔣堯佐立

貞節坊在昭義村明天啓五年御史王

節烈坊 在昭義村明崇禎六年御史畢

松節冰操坊 在文市國朝康熙二十三年巡撫郝浴為生員時正煜妻鄧氏立

艱貞勁節坊 在大營村康熙二十三年巡撫郝浴為生員時正煜妻鄧氏立

郵政

養濟院 在縣北

漏澤園 一在教場西去城一里一在四板橋去城東五里知縣陳一朋捐貲買置立有界石

惠民藥局 原在醫學內今廢

寺觀

慧明寺 在城西舊名梁興唐建宋祥符二年賜額曰祥寺明洪武初設僧會司景泰間僧志

灌陽縣志 卷之二 建置 十二

仁募修張圭有記

大覺寺 在縣北五十五里舊名漢潭宋熙寧五年賜額曰大覺寺元至元十年重修唐堯佐有記

等慈寺 縣東四十年建 定林寺 縣西八

妙善寺 縣東六 梵安寺 伍家灣宋大平興國五年建

布金寺 縣西五 超覺寺 縣西六

永寧寺 縣西六 秀峯寺 縣東五十里隱士易希有重修

普安寺 縣東十 舊光寺 縣西七

鼎慈寺 水車宋咸淳 淨慈寺 縣西南

鹿苑寺 縣北六十四年文村 太清庵

朝陽庵 一縣西

定慧庵 羅縣西三里

西竹庵 縣西地名岩塘

迴龍庵 縣北三里明正德

朝元觀 縣治東明洪武初建設道會司成化二

大清觀 縣西十五年重江口

灌陽縣志卷之三

賦役志

禹貢則壤之賦周禮力役之徵按籍取民代有成法然滄桑或變登耗不齊非樽節而愛養之曷鮮貧寡之患耶矧灌邑僻在一隅山多田少物產無幾商賈不至業農業未<sup>末</sup>勤動皆艱每遇大造之年尤望良司牧者為民保障庶絕無藝之求而閭左遺黎咸歌作息矣述賦役志

戶口

灌陽縣志

卷之三

賦役

一

宋

男子二十為丁六十為老

戶	主戶	鄉村	八千八百一十七	坊郭	四百一十九
客戶	鄉村	二千六百七十五	坊郭	二百六十五	
口	主戶	口鄉村	二萬八千二百六十八	坊郭	二千八百
	客戶	口鄉村	二千六百七十五	坊郭	九百

田賦

宋

田二十二萬七千七百八十一畝半九十二步二

尺夏稅錢六千五百一十九貫七百八十九文秋

稅米一萬一百一十七石六斗四升役錢四千二

百一十六貫二百八十文職田米二百九十九石

四斗五升

右出宋人所修清湘志

元無考

明嘉靖元年

戶總一千八百三〇單戶二百七十八  
民戶一千五百二十五  
口總八千八百六十七〇男五千八百二十八婦三千三十九

嘉靖元年官學民田地八百六十頃二十畝二分七厘夏稅米一百六十五石七斗七升四合一抄秋糧米三千一百五十六石八斗二升六合八勺茶課米一百七十石九斗七合一勺八抄椒課米一十一石一斗二升折收鈔五錠餘桐油鈔一千九

灌陽縣志

卷之三

賦役

二

百一十三斤折銀九兩六錢魚課米一百四錠三貫八百四十文魚油折收熟鐵五百一十六斤八兩歲進野味活鹿一隻折銀二兩歲辦鹿皮帶毛熟銷九十二張歲辦翠毛十個折銀二兩紅船二隻半編入全州逆運所久裁

嘉靖二十一年官民田地八百六十頃二十畝二分七厘稅糧三千五百零四石六斗二升八合一勺茶椒等課如前

嘉靖三十一年官民田地



嘉靖四十一年官民田地

隆慶六年

本年奏奉丈量通縣田畝每一畝內抽一厘五毫作官田餘九分八厘五毫作民田

官民田地塘一千六百六十八頃六十七畝七分

七毫三絲稅糧六千一百四十二石七斗三升九

合三勺九抄五撮七圭九粒茶俶等課如前

萬曆十年官民田地塘一千六百六十三頃五十二

畝二分四厘六毫七絲六忽二微稅糧五千八百

二十七石九斗一合三抄四撮一圭四粒七粟茶

椒等課數如前

萬曆二十年官民田地塘一千六百五十八頃一十

六畝四分八厘八毫五絲四忽稅糧五千五百六

十石五升一合七勺六抄八撮六圭九粒八粟茶

椒等課數如前

按戶口田糧自嘉靖六年修志之後至崇禎末年

疊遭兵燹典籍無考

附錄隆慶六年奏奉丈量通縣民屯田畝

題准改科今志於左以備後稽官民田則每田一畝

內除一厘五毫為官田每官田一畝科正耗米一

斗納糧免差將九分八厘五毫作為民田每民毋  
一畝科正耗米三升六合一勺納糧當差地塘俱  
照民田起科徭田原額每畝科夏稅秋糧正耗米  
三升六合八勺六抄一撮五圭今據歸化里上五  
甲徭民袁勝友等因告山田糧重蒙院道批准徭  
賦虧重每畝削去合米止科米三升共減豁米二  
十八石九斗六升二合七勺九抄八撮四圭六粒  
八粟遵將上五甲徭田地塘減削改科每畝科米  
三升內將一合九勺七抄作為夏稅餘二升八合

三抄為秋糧下五甲徭民田地仍照舊例起科官  
糧正耗米二百二十三石五斗三升五合四勺一  
抄民糧正耗米五千二百九十九石五升五合八  
勺八抄一撮五圭六粒六粟夏稅正耗米一十四  
石二斗二升二合九抄九撮九圭三粒秋糧正耗  
米二百六十三石六斗四升九合九勺七抄五撮  
三圭三粒五粟秋雜正耗米二百九十三石七升  
七合六勺四抄二撮六圭四粒四粟桑絲二十七  
觔三兩七錢一分二厘五毫茶課米二十石二斗

九升三合五勺九抄三撮七圭五粒椒課米四十  
七石七斗二升桐油六百六十三觔三兩二錢

附錄屯田舊額撤數始末備考

明洪武二十八年開設守禦千戶所除授副千戶韓

溫陳俊領軍一千五百守禦開種屯田三百三十

頃一十畝崇順里屯 崇順里三保屯 巨頭岩  
池子阜屯 陣伯屯 義地里二處黃

家屯 義城筭里屯 臨中里二處 沙羅源屯  
二處 傳江屯 等角屯 大保全屯

厥後軍強民弱民田多為軍占虛賦稅糧正德八  
年老人文世晁具奏行使司徐叅政親臨本縣丈

量軍田足額量出所占民田還於民其年深有不

願還者責令本所耕管辦納餘糧將奉過勘合行

過文移勒碑於昭義公館永遠不磨今錄於後

廣西桂林府全州灌陽縣為乞恩奏請丈量歸正

田土停徵裨賧以蘇民困事准本縣掌印知縣王

闕蒙本府通判洪 紙牌准本府牒抄奉廣西

等處承宣布政司紙牌准掌印布政夏 咨又蒙

廣西等處提刑按察司紙牌准本司掌印副使翁

闕俱蒙巡按廣西監察御史朱 批據本府推

官周 呈按照先抄蒙廣西等處提刑按察司分  
巡桂林道僉事孫 紙牌准本司關據經歷司呈  
抄蒙巡按廣西監察御史舒 案驗奉都察院巡  
按廣西四千七百一號勘合劄付前事該本縣正  
二保老人文世景奏疏本縣原額四十二里田糧  
九千九百餘石洪武二十八年獯民作亂調軍征  
勦遺下殘民招撫併作十四里田糧三千三百三  
十八石零其勦絕人戶二十八里田糧無人種納  
奏奉勘合已撥桂林中右二衛并灌陽千戶所軍

餘屯種前田認納糧六千餘石軍民納足原數彼  
時軍強勢大欺壓民人又加逃下止得八里被軍  
占去田糧八百七十八石田歸軍種糧存於民只  
得分派虛賾積年拖欠不完弘治八年奏行使司  
徐叅政臨縣丈量軍田足勾原數額外量出先前  
占過民田數多止將田糧三百五十餘石退撥與  
民種納虛米尚有五百二十七石零因各軍耕業  
年久墜執不肯吐退還民情願額外照田認納新  
增糧米一千餘石造冊奉繳訖其未還田糧仍令

各民虛賧奏乞分豁等因備委本府周推官會同所縣拘齊軍民查審前情是實具由呈詳又蒙行委洪通判桂林中衛指揮凌溥右衛指揮徐棠蔭所縣掌印官劉表等會同拘齊二衛三十六屯一十五所屯軍餘查審各將先年認納新增糧數內責令遞年種納五百二十七石六斗加補民賧無徵之數分派各屯軍餘照數領訖扣除民納虛數取具供結回繳外今照錢糧重務誠恐日後軍民爭訟府縣雖有案卷非經年久必須劾石以垂日

後有所考焉理合移關本縣煩為施行等因到縣案照先為前事已經關委志去後今准前因擬合就行為此除外帖仰各里里老王佑等照依帖文內事理即將前項奏議節畧緣因并各理除豁糧米及各屯所領納數目明白刻碑為記以杜後爭俱無違錯須至帖者

屯田糧

汪所正田一項三十一畝米二十四石  
餘田四頃五十五畝米三十七石九斗七升  
新增田一項一十七畝米八石二石五升

李所 正田四百一頃八分米四十九石九斗二升 餘田

新增田五頃四十一畝 米三十五石二斗八升

吳所 正田一頃五十五畝米三十三石 餘田五頃九

石四斗九升 厘米一十二 新增田二頃四

上張所 正田三頃米六石 餘田九頃五十六畝米

斗三升 七石四 新增田一頃九畝米

方所 正田三頃米六十石 餘田一千五百四十二

米七十石一斗四升 三十坵稅一頃二畝 新增田八百

龔所 正田二頃一十畝米四十二石 餘田三頃二

灌陽縣志

卷之三

賦役

八

頃二十八畝米一

衡所 正田二百四十坵三頃三十畝米六十六石

四石 餘田一千六百一十二坵十三頃米一百二十

徐所 正田九十畝米七十二石 餘田二頃八十八畝

十二畝米二十 新增田四頃二

杜所 正田六十畝米十二石 餘田二十九畝九

畝米六石 新增田八十九

范所 正田二十畝米二十四石 餘田十二頃二十

四十二畝米 新增田六頃七

冷所 正田無 餘田一千九百九十六畝八頃米八  
下張所 正田四分米一百三十三石六斗一升 餘田三頃二十畝  
新增田一百三十三石六斗一升 新增田一畝

石八升 一十

蔡所 正田六十畝米十二石 餘田一十一頃三十  
畝米一百四十九石七斗一升 新增田二頃

米三十五畝  
米十六石

熊所 正田三十畝米六石 餘田一千一百三十五  
畝米六十七石一斗一升 新增田二百

米一十六畝一頃  
米一十一石

王所 正田一百一十畝稅九十畝米十八石 餘田  
一千八百九畝稅十頃一十四畝米八十石八

斗四升 新增田一千八百九畝  
稅一十頃共折銀一兩二錢六分

灌陽縣志

卷之三

賦役

以上各屯子粒原額正餘并新增共米一千一百  
九十七石六斗三合六勺六抄五撮歲收灌字屢

國朝 康熙四十五年

一本縣原額實徵官民雜田地塘共稅一千六百五  
十四頃九十四畝八分二厘零六絲二忽該秋糧  
米六千零六十四石九斗零八合七勺四抄零九  
圭五粒二粟內本色米四千三百九十七石三斗  
三升四合八勺八抄六撮五圭四粒六粟折色米  
一千六百六十七石五斗七升三合八勺五抄四

撮四圭零六粟該徵地糧銀四十六百零五兩四錢六分三厘三毫一絲五忽六微三纖零八埃二沙八渺八漠內涂荒稅二百六十六頃九十九畝六分五厘七毫九絲八忽二微五纖荒秋糧米九百六十三石八斗五升七合六勺五抄三撮一圭六粒七粟內荒本色米七百三十六石零八升八合四勺四抄五撮六圭五粒六粟折色米二百二十七石七斗六升九合二勺零七撮五圭一粒一粟荒地糧共銀七百九十兩零八錢一分五厘

六毫一絲七忽五微一纖九塵八埃三抄七渺四漠實熟稅一千三百八十七頃五十三畝四分六厘二毫六絲三忽七微五纖熟秋糧米五千零九十九石五斗四升五合七勺一抄七撮七圭八粒五粟內本色米三千六百六十石零九升六合八勺零四撮八圭八粒三粟折色米一千四百三十九石四斗四升八合九勺一抄二撮九圭零二粟徵熟地糧銀三千八百一十三兩四錢一分二厘五毫八絲八忽二微三纖五塵四埃八沙零八漠



康熙三十九年新墾民田稅四十一畝七分該秋糧  
米一石五斗零五合三勺七抄內本色米一石一  
斗四升九合六勺三抄六撮零七粟折色米三斗  
五升五合七勺三抄三撮九圭九粒三粟該地畝  
四差折糧等項共銀一兩二錢三分五厘一毫零  
九忽八微七纖五塵五埃一沙零六漠

屯田

實屯田稅五十七頃零四畝二分該折色米一千一  
百四十石零八斗四升該地糧銀四百零二兩一

錢八分內除荒稅三頃八十四畝二分二厘荒折  
色米七十八石八斗四升四合荒折糧銀二十八  
兩零六分四厘二毫八絲

實徵舊熟稅五十三頃一十九畝九分八厘熟秋糧  
折色米一千零六十三石九斗九升六合該地糧  
銀三百七十四兩一錢一分五厘七毫二絲

康熙十九年據里民阮起龍首出未入全書輕資屯  
田稅一十畝該折色米二石該折糧銀六錢全熟  
人丁

原額人丁二千三百四十八丁每丁編銀一錢共該  
丁銀二百三十四兩八錢

康熙二十年編審增人丁三百零一丁五分該徵丁  
銀三十兩零一錢五分

三十五年編審增人丁九十六丁五分該徵丁銀  
九兩六錢五分

四十年編審增人丁六十二丁五分該徵丁銀六  
兩二錢五分

四十五年編審增人丁一十九丁二分五厘該丁

銀一兩九錢二分五厘

以上源額并審增共丁二千八百<sub>分二十七</sub>丁<sub>七</sub>共<sub>兵該</sub>

丁銀二百八十二兩七錢七分五厘

通共本色米四千三百九十七石三斗三升四合八  
勺八抄六撮五圭四粒六粟內除荒米七百三十  
六石零八升八合四勺四抄五撮六圭五粒六粟  
實徵成熟本色米三千六百六十一石二斗四升六  
合四勺四抄零八圭九粒

以上通共地丁并里民首出未入全書屯田折糧審

增等項共額銀五千二百九十一兩零一分八厘  
三毫一絲五忽六微三纖零八埃二沙八渺八漠  
內除荒銀八百一十八兩八錢七分九厘八毫九  
絲七忽五微一纖九塵八埃三沙七渺四漠  
實徵熟銀四千四百七十二兩一錢三分八厘四毫  
一絲八忽一微一纖零九埃九沙一渺四漠遇閏  
加徵銀一百四十六兩六錢九分一厘六毫五絲  
九忽

工部項下改徵折色

兵杖局

一項生銅本色銀四錢八分零六毫採買生銅四觔  
零八分鋪墊銀一分四厘四毫一絲八忽今奉  
文核減每觔定價六分五厘該銀二錢六分零三  
毫二絲五忽採買生銅四觔零八分鋪墊銀七厘  
八毫零九忽七微五纖除荒外○熟銀二錢一分  
六厘三毫九絲九忽零六纖一塵一埃二沙五渺  
採買生銅三觔零五兩二錢六分七厘四毫六絲

一忽二微水脚銀六厘四毫九絲一忽九微七織  
一塵八埃三沙三渺八漠

工部項下折色

一項翠毛銀四兩四錢水脚銀一錢三分二厘除荒  
外 熟銀三兩六錢五分七厘五毫六絲六忽水  
脚銀一錢零九厘七毫二絲六忽九微八織

一項翎毛銀二兩三錢一分七厘七毫零四忽四微  
零八塵水脚銀六分九厘五毫三絲一忽一微三  
織二塵二埃四沙除荒外 熟銀二兩零七厘八

毫五絲六忽三微二織七塵五埃水脚銀六分零

二毫三絲五忽六微八織九塵八埃二沙五渺

一項黃麻銀四銀五分五厘二毫六絲一忽八微一

織二塵水脚銀一分三厘六毫五絲七忽八微三

織三塵三埃六沙除荒外 熟銀三錢九分四厘

三毫九絲八忽三微九織七塵五埃水脚銀一分

一厘八毫三絲一忽九微五織一塵九埃二沙五渺

工部項下熟鐵改徵折色

一項熟鐵銀一十四兩四錢二分四厘六毫二絲三

忽六微六纖四塵採買熟鐵八百三十五觔一十  
一兩二錢四分五厘七毫三絲零一纖二塵三埃  
九沙零五漠水脚銀五錢二分二厘七毫三絲八  
忽七微零九塵九埃二沙全熟康熙二十八年三  
月奉 文採買本色解 部三十九年七月奉  
部咨歸入地丁項內造報

禮部項下改徵折色

一項本色藥材除奉 文三分折二外尚本色一分  
該額銀八兩六錢二分六厘七毫八絲七忽六微

七纖三塵零三沙一渺七漠採買藥材一十二味  
共重九觔零二兩七錢一分一厘七毫四絲一葱  
四微九纖八塵九埃六沙八渺三漠舖墊銀二錢  
五分八厘八塵零三忽六微三纖零七埃九沙零  
九漠除荒外 熟銀八兩六錢二分四厘八毫一  
絲二忽一微五纖八塵六埃五沙熟藥材九觔零  
一兩五錢零四厘四毫五絲一忽舖墊銀二錢五  
分八厘七毫四絲四忽三微六纖四塵七埃五沙  
九渺五漠康熙十年五月奉 文改徵折色

砂仁三觔零四兩六錢五分五厘八毫四絲  
滑石二觔一十一兩一錢七分七厘七毫八絲九忽  
官桂一觔一兩五錢五分一厘九毫四絲七忽  
~~姜~~ 姜黃一兩七錢五分五厘一毫九絲五忽  
雄黃一十三兩五錢九分五厘零七絲九忽  
山豆根一兩七錢五分五厘一毫九絲五忽  
丁香一兩七錢五分五厘一毫九絲五忽  
乳香一兩七錢五分五厘一毫九絲五忽  
沒藥三兩一錢五分九厘三毫五絲

沉香三兩一錢五分九厘三毫五絲  
犀角三兩一錢五分九厘三毫五絲  
片腦二兩六錢三分二厘七毫九絲二忽  
地丁項下

一項藥材原折色銀一十七兩三錢零一厘三毫三  
絲二忽九微一纖五塵六埃四沙六渺二漠水脚  
銀五錢一分九厘零三絲九忽九微八纖七塵四  
埃六沙九渺四漠除荒外 熟銀一十六兩九錢  
二分七厘四毫五絲一忽一微一纖一塵三埃三

沙九渺一漠水脚銀五錢零七厘八毫二絲三忽  
五微三織三塵三埃四沙零二漠

一項奉文全折藥材苓香蓬木草菓三分并折二  
分共銀一十八兩零八分一厘八毫七絲九忽三  
微九織一塵三埃二沙二渺一漠水脚銀五錢四  
分二厘四毫五絲六忽三微八織一塵七埃三沙  
九渺七漠除荒外熟銀一十八兩零七分七厘  
七毫三絲八忽六微四織零九埃四沙一渺五漠  
水脚銀五錢四分二厘三毫三絲二忽一微五織

九塵二埃二沙八渺二漠

一項活鹿一隻原額價銀五兩五錢水脚銀一錢六  
分五厘全熟

一項胖襖銀一百一十五兩四錢一分四厘二毫水  
脚銀三兩四錢六分二厘四毫二絲六忽除荒外  
熟銀九十五兩九錢三分九厘七毫八絲四忽九  
微六織三塵水脚銀二兩八錢七分八厘一毫九  
絲三忽五微四織八塵八埃九沙

一項魚膠除核減外實額銀二兩九錢七分八厘四

毫九絲六忽二微五纖鋪墊銀八分九厘三毫五  
絲四忽八微八纖七塵五埃除荒外 熟銀二兩  
四錢七分五厘九毫一絲九忽六微八纖五塵二  
埃五沙六渺三漠鋪墊銀七分四厘二毫七絲七  
忽五微九纖零五埃五沙七渺七漠  
一項地畝銀一千三百八十兩零五錢七分零九毫  
五絲八忽四微零九塵零四沙除荒外 熟銀一  
千一百四十兩零二錢七分四厘一毫一絲七忽  
五微六纖六塵五埃四沙

又抵兌協濟興安縣驛站銀歸入本縣地畝銀一百  
二十兩除荒外 熟銀九十九兩七錢五分八厘  
一優免三差銀一百九十三兩五錢五分九厘二毫  
除荒外 熟銀一百八十五兩四錢九分四厘三  
毫六絲一忽三微七纖二塵八埃  
一項留克兵餉銀七百六十五兩零五分三厘五毫  
零三忽九微九纖四塵三埃二沙二渺二漠除荒  
外 熟銀六百三十五兩九錢六分二厘二毫零  
九微九纖七塵八埃四沙零六漠



一項存留項下共裁銀一百二十二兩九錢七分三厘除荒外 熟銀一百零二兩二錢二分三厘一毫五絲零八微四纖五塵

一項官俸項下共裁銀九十兩零一分徐荒外 熟

銀七十四兩八錢二分二厘一毫六絲二忽六微五纖

一項各役工食項下共裁銀五百四十四兩除荒外 熟銀四百四十九兩四錢八分九厘七毫八絲九忽二微六纖八塵九埃八沙五渺六漠

一項驛站項下共裁銀三十兩零六錢除荒外 熟

銀二十五兩四錢三分六厘七毫零九忽

一項屯糧并里民首出未入屯田共折色銀四百零

二兩七錢八分除荒外 熟銀三百七十四兩七

錢一分五厘七毫二絲

一項編剩銀一兩六錢一分六厘一毫二絲一忽一

微一纖七塵九埃四沙六渺一漠除荒外 熟銀

一兩三錢七分七厘零九絲一忽六微七纖三塵

六埃零五渺二漠

一奉 文核減工部項下一項魚線膠本色銀七兩

零六分一厘三毫七絲八忽七微五纖鋪熟銀二  
錢一分一厘八毫四絲一忽三微六纖二塵五埃  
除荒外熟銀五兩八錢六分九厘八毫七絲七忽  
零六塵六埃一沙八渺八漠鋪墊銀一錢七分六  
厘零九絲六忽三微一纖零一埃九沙八渺六漠  
一項生銅本色銀二錢二分零二毫七絲五忽鋪墊  
銀六厘六毫零八忽二微五纖除荒外 熟銀一  
錢八分三厘一毫零六忽八微九纖一塵八埃七  
沙五渺鋪墊銀五厘四毫九絲三忽二微零六塵

九埃三沙六渺三漠

一奉 文新裁一項全裁科舉銀二十四兩零五分  
七厘除荒外 熟銀一十九兩九錢九分七厘七  
毫四絲二忽一微零五塵

一項全裁迎春鞭春除夕封印門印銀三兩七錢五  
分除荒外 熟銀三兩一錢一分七厘二毫四絲  
三忽七微五纖

一項全裁歲考生員試卷菓餅給賞花紅銀八兩五  
錢除荒外 熟銀七兩零六分五厘七毫五絲二

忽五微

一項全裁應試生員盤纏銀一十六兩除荒外 熟銀一十三兩三錢零二毫四絲

一項新裁心紅銀二十兩除荒外 熟銀一十六兩六錢二分五厘三毫

一奉 文停止一項本縣歲貢生員盤纏年編銀三十二兩除荒外 熟銀二十六兩六錢零四毫八絲

一項料場會試舉人水手銀二百一十二兩一項驛站裁四額銀一十二兩二錢四分除荒外

灌陽縣志

卷之三

賦役

二十一

熟銀一十兩零一錢七分四厘六毫八絲三忽六微

以上起運地丁工部本折禮部改徵折色及地丁并核減鋪墊水脚新裁審增等項共額銀四千二百三十一兩八錢零三厘三毫一絲五忽六微三纖零八埃二沙八渺八漠遇閏銀六十五兩八錢二分一厘六毫六絲四忽

內除荒并閏外 熟銀三千五百九十一兩三錢二分五厘二毫四絲六忽二微六纖零九埃九沙一渺四漠

存留

- 一項解司戶口食鹽銀三兩五錢六分除荒外 熟
- 銀二兩九錢五分九厘三毫零三忽四微
- 一項解本府照磨俸銀三十一兩五錢二分除荒外
- 熟銀二十六兩二錢零一厘四毫七絲二忽八微
- 一項文廟啓聖公祠名宦鄉賢祠春秋二祭共銀一十九兩二錢除荒外 熟銀一十五兩九錢六分零二毫八絲八忽
- 一項山川社稷壇春秋二祭銀三十兩除荒外 熟

灌陽縣志

卷之三

賦役

二十二

銀二十四兩九錢三分七厘九毫五絲

- 一項邑厲壇三祭共銀九兩除荒外 熟銀七兩四錢八分一厘三毫八絲五忽

- 一項拜賀習儀香燭銀七錢除荒外 熟銀五錢八分一厘八毫八絲五忽五微

- 一項鄉飲酒禮二次順治十三年奉 文半裁存銀四兩三錢九分除荒外 熟銀三兩六錢四分九厘二毫五絲三忽三微五纖

- 一項本縣知縣俸銀四十五兩除荒外 熟銀三十

七兩四錢零六厘九毫二絲五忽

一項本縣典史俸銀三十一兩五銀二分除荒外

熟銀二十六兩二錢零一厘四毫七絲二忽八微

一項本縣儒學訓導俸銀三十一兩五錢二分除荒

外 熟銀二十六兩二錢零一厘四毫七絲二忽

八微

一項本縣崇順司巡檢俸銀三十一兩五錢二分除

荒外 熟銀二十六兩二錢零一厘四毫七絲二

忽八微

一項本縣門子二名工食銀一十二兩除荒外 熟

銀九兩九錢七分五厘一毫八絲

一項本縣皂隸一十六名工食銀九十六兩除荒外

熟銀七十九兩八錢零一厘四毫四絲

一項本縣馬快八名工食銀四十八兩除荒外 熟

銀三十九兩九錢零七厘二絲

一項本縣民壯五十名工食銀三百兩除荒外 熟

銀二百四十九兩三錢七分九厘五毫

一項本縣燈夫二名工食銀一十二兩除荒外 熟

銀九兩九錢七分五厘一毫八絲

一項本縣看監禁卒八名工食銀四十八兩除荒外  
熟銀三十九兩九錢零七毫二絲

一項本縣修理監倉銀二十兩除荒外 熟銀一十  
六兩六錢二分五厘三毫

一項本縣轎傘扇夫七名工食銀四十二兩除荒外  
熟銀三十四兩九錢一分三厘一毫三絲

一項本縣庫子四名工食銀二十四兩除荒外 熟  
銀一十九兩九錢五分零三毫六絲

一項本縣斗級四名工食銀二十四兩除荒外 熟  
銀一十九兩九錢五分零三毫六絲

一項本縣舖兵七名工食銀三十五兩除荒外 熟  
銀二十九兩零九分四厘二毫七絲五忽

一項典史門子一名工食銀六兩除荒外 熟銀四  
兩九錢八分七厘五毫九絲

一項典史皂隸四名工食銀二十四兩除荒外 熟  
銀一十九兩九錢五分零三毫六絲

一項典史馬夫一名工食銀六兩除荒外 熟銀四

兩九錢八分七厘五毫九絲

一項儒學訓導門役二名工食銀一十二兩除荒外  
熟銀九兩九錢七分五厘一毫八絲

一項儒學訓導齋夫三名工食銀一十八兩除荒外  
熟銀一十四兩九錢六分二厘七毫七絲

一項儒學訓導膳夫二名工食銀一十二兩除荒外  
熟銀九兩九錢七分五厘一毫八絲

一項本縣崇順司巡檢皂隸二名工食銀一十二兩  
除荒外 熟銀九兩九錢七分五厘一毫八絲

灌陽縣志

卷之三

賦役

二十五

一項崇順司巡檢弓兵二十名工食銀五十兩除荒  
外 熟銀四十一兩五錢六分三厘二毫五絲

一項驛站存六銀一十八兩三錢六分除荒外 熟  
銀一十五兩二錢六分二厘零二絲五忽四微

以上存留解司府并支官俸役食及驛站共銀一千  
零五十七兩二錢九分遇閏銀八十兩零八錢六  
分九厘九毫九絲五忽

除荒并閏外 熟銀八百七十八兩八錢八分八  
厘一毫七絲一忽八微五纖

糧米

原額本色共米四千三百九十七石三斗三升四合  
八勺八抄六撮五圭四粒六粟除荒外

實徵熟米三千六百六十一石二斗四升六合四勺  
四抄零八圭九粒

應徵本色米一千八百三十石零六斗二升三合二  
勺二抄零四圭四粒五粟

半徵折色米一十八百三十石零六斗二升三合二  
勺二抄零四圭四粒五粟每石折銀八錢該折徵

灌陽縣志

卷之三

賦役

二十六

米銀一千四百六十四兩四錢九分八厘五毫七  
絲六忽三微五纖六塵

一起運本府廣儲倉米八百四十五石四斗零八合  
七勺四抄零四圭五粒二粟除荒外 熟米七百  
零三石八斗九升一合五勺四抄七撮三圭四粒  
四粟

應徵本色米三百五十一石九斗四升五合七勺七  
抄三撮六圭七粒二粟

半徵折色米三百五十一石九斗四升五合七勺七



抄三撮六圭七粒二粟每石折銀八錢該折徵米  
銀二百八十一兩五錢五分六厘六毫一絲八忽  
九微三纖七塵六埃

原額存留倉米三千五百五十一石九斗二升六合  
一勺四抄六撮零九粒四粟除荒外 熟米二千  
九百五十七石三斗五升四合八勺九抄三撮五  
圭四粒六粟

應徵本色米一千四百七十八石六斗七升七合四  
勺四抄六撮七圭七粒三粟

灌陽縣志

卷之三

賦役

二十七

半徵折色米一千四百七十八石六斗七升七合四  
勺四抄六撮七圭七粒三粟每石折銀八錢該折  
徵米銀一千一百八十二兩九錢四分一厘九毫  
五絲七忽四微一纖八塵四埃

一裁扣項下

一項廩生二十名三分之一尚裁二額米一百六十  
石除荒外 熟米一百三十三石二斗一升六合  
八勺

應徵本色米六十六石六斗八合四勺

半徵折色米六十六石六斗零八合四勺每石折銀  
八錢該折徵米銀五十三兩二錢八分六厘七毫二絲  
一項編造黃冊紙張工墨年支全裁米八百除荒外  
熟米六石六斗六升零八勺四抄  
應徵本色米三石三斗三升零四勺二抄  
半徵折色米三石三斗三升零四勺二抄每石折銀  
八錢該折徵米銀二兩六錢六分四厘三毫三絲  
六忽  
一在縣支應項下

一項 文廟香米三石六斗除荒外 熟米二石九  
斗九升七合三勺七抄八撮  
應徵本色米一石四斗九升八合六勺八抄九撮  
半折本色米一石四斗九升八合六勺八抄九撮該  
折徵米銀一兩一錢九分八厘九毫五絲一忽二微  
一項邑厲壇三祭米一石五斗除荒外 熟米一石  
二斗四升八合九勺零七撮五圭  
應徵本色米六斗二升四合四勺五抄三撮七圭五粒  
半折本色米六斗二升四合四勺五抄三撮七圭五

粒該折徵米銀四銀九分九厘五毫六絲三忽

一項木鐸老人每月支米三斗共米三石六斗除荒

外 熟米二石九斗九升七合三勺七抄八撮

應徵本色米一石四斗九升八合六勺八抄九撮

半徵本色米一石四斗九升八合六勺八抄九撮該

折徵米銀一兩一錢九分八厘九毫五絲一忽二

一項孤貧六名每名月給米三斗共米二十一石六

斗除荒外 熟米一十七石九斗八升四合二

六抄八撮

應徵本色米八石九斗九升二合一勺三抄四撮

半折本色米八石九斗九升二合一勺三抄四撮該

折徵米銀七兩一錢九分三厘七毫零七忽二微

一項奉復恩詔設復重囚口糧米一十石除荒外

熟米八石三斗二升六合零五抄

應徵本色米四石一斗六升三合零二抄五撮

半折本色米四石一斗六升三合零二抄五撮該折

徵米銀三兩三錢三分零四毫二絲

一項奉復本縣學額廩生二十名三分之一廩糧額

米八十石除荒外 熟米六十六石六斗零八合四勺

應徵本色米三十三石三斗零四合二勺

半折本色米三十三石三斗零四合二勺該折徵米

銀二十六兩六錢四分三厘三毫六絲

一編剩米三千二百六十三石六斗二升六合一勺

四抄六撮零九粒四粟除荒外 熟米二千七百

一十七石三斗一升四合八勺七抄二撮零四粒

六粟

應徵本色米一千三百五十八石六斗五升七合四

勺三抄六撮零二粒三粟

半折米色米一千三百五十八石六斗五升七合四

勺三抄六撮零二粒三粟每石折徵銀八錢該折

徵米銀一千零八十六兩九錢二分五厘九毫四

絲八忽八微一纖八塵四埃

按灌邑丁口嘉靖舊志原額人丁二千三百四十

八丁迨明末兵凶蹂躪逃亡故絕者一千有零

國初順治間現在熟丁止有一千三百餘丁其後

節次開報猶未足額至康熙二十年編審書手李春繁赴省請式造冊殊春繁不以人為丁而妄以米石派丁遂至過額其時奉駁有九屬惟灌踰額斷非生齒獨盛必是敲朴過嚴之語春繁被責而丁亦隨增三百有零嗣後三十五年及四十年編審俱循春繁之例不以人為增減皆于米石之上將丁銀參入地畝起科名為增丁實則加賦豈知地之所出有糧米有正賦有差糶安可又加以丁銀耶夫子之為義十六歲以上為丁以從力役七

十為老乃免所以十年一審審其壯老以為增減卽以增減之多寡見民數之盛衰若于米上派丁則米數有定丁卽隨之何用審為况桂林九屬丁額俱未足數惟灌邑之丁已溢額四百六十有奇豈畱庶獨萃於灌乎且今日溢於前日之額異日復溢於今日之額有增無已長此安窮說者謂人丁不入地畝起科則徵丁卽同減賦審丁不就米石增派則以人為丁乃見登耗庶三弊除而利賚普矣

田稅積弊說

蔣學元

粵稽先朝萬曆初年張江陵當國詔普天丈量田  
畝上憲委全州方州尊抵灌督丈每田一工載稅  
六分編成印冊用垂永久官民遵守罔敢或替至  
萬曆末年加派遼餉崇禎間又加派練餉正供之  
外二餉疊加而民遂不堪命矣催科煩重考成嚴  
切民窮財盡刑杖徒施囹圄塞滿至不能容究竟  
拖欠不能完納是時襄陽溫父母蒞任蒿目時艱  
咨嗟無策有好書胡斌忠者乘機獻媚在旁微笑

灌陽縣志

卷之三

賦役

三十二

溫公問曰汝有策可紓吾悶乎斌忠答曰只恐太  
爺不用吾言耳果肯用吾言豈惟紓悶錢糧不難  
全完太爺管取上上考也溫公曰汝試言之斌忠  
答曰奉旨丈量每田一工載稅六分此朝廷之法  
也但此法可行之於古而難行之於今溯萬曆初  
國家承平二百餘年風俗醇龐士庶樂業錢糧易  
於輸將催科不勞餘力遵守成法洵可鳴琴而理  
今何時哉遼練二餉遞加無已又有預徵無端苛  
歛窮窘之民救死不贍豈能咄嗟立辦今當另立

一法庶可救燃眉之急彼買田之家必選膏腴一  
工之田有收租五斗六斗者賣田之家所餘俱瘠  
薄之田卽三斗四斗尚難收足數豈能完六分之  
稅其拖欠國課費太爺金心者職此故耳今宜革  
除一工六分之法論租筭稅每租四斗派稅六分  
彼田多者增之不爲虐田少者均派之以蘇其累  
貧富兩便錢糧易完矣溫父母一時不察誤聽其  
言毅然舉行如商鞅之開阡陌李斯之焚詩書盡  
廢丈量之國法偏信積蠹之奸謀無賴刁民乘風

鼓譟俱藉口租多稅少紛紛誣控不休溫父母主  
持於上黃鍾毀棄瓦缶雷鳴致有田之家憑空冒  
領虛稅枉賠浮糧斯時也卽有喙長三尺者亦無  
由置辦一祠矣試舉一二言之如仁壽盛家買田  
最多押領虛稅積至七頃有零永豐蔣家田畝亦  
多押領虛稅積至六頃有零其餘受押領之害者  
不堪悉數此皆蠹之流害也幸而窮極必變困  
極必通天祐欺民

皇清定鼎驅殘蘇累仁政沛施浮糧虛稅一槩蠲除

垂灰子遺不啻拔水火而登諸衽席迄今益五十  
餘年矣然斌忠之餘毒流行至今尚未消滅鴛鴦  
啓釁者漸欲蹈其覆轍妄肆猖狂殊不思明季虐  
政罔卹窮簷故斌忠之蠱說易行目今

皇恩徧及下土 仁廉洞鑿積弊惟利是興有害必  
除縱使斌忠復生亦無能逞其毒螫矧區區小醜  
覬覦效尤播害良善僉知其徒自罹於法網也釐  
奸剔弊於 良有司有厚望焉



物產

穀之屬

牛禾 馬皮禾 八月鮮 懶擔禾 鰕子糯

白糯 金釵糯 黑節糯 見缸銷糯

白粘 毛粘 糯粘 王瓜粘 麻粘

大粟 小粟 大麥 小麥 蕎麥

高粱 黃荳 青荳 黑荳 綠荳

芝蔴 芋 薯 旱禾 於山多植

蔬之屬

灌陽縣志

卷之三

賦役

三十五

芥 薑 芹 白菜 生菜

波菱 苧蒿 碧達 萵苣

莧菜 苦蕒 即芑 蔓菁 芫荽 藤菜

芥藍 葱 蒜 韭 薤

茄子 荳角 匾荳 香蕈 木耳

菌 笋 蕨

瓜之屬

王瓜 葫蘆 苦瓜 甜瓜 絲瓜

冬瓜 金瓜 西瓜 醬瓜 牛腿瓜

菓子屬

梅子

桃子

李子

白菓

梨子

栗子

柑子

柚子

石榴

毛栗

香椽

楊梅

枇杷

白棗

麥門冬

柴胡

桔梗

當歸

香附子

蘇子

牛膝

香薷

何首烏

厚朴

益母草

菖蒲

葶藶

藜蘆

茴香

肥皂

薄荷

荊芥

夏枯

瓜蒞

灌陽縣志

卷之三

賦役

三十六

黃栢

山梔子

金銀花

草決明

木之屬

梧桐

松木

栢木

杉木

樟木

椿木

榔木

楓木

桑木

棠梨木

猴栗

栲

槐

竹之屬

筋竹

白竹

水竹

毛竹

釣絲

紫竹

箭竹

苦竹

花之屬

桂花

蘭

薔薇

芍藥

紫荊

紫薇

棠棣

杜鵑

芙蓉

木槿

金鳳

紅梅

絳桃

蓮花

菊花

草之屬

黃茅

馬鞭

虎耳

錢買

紅蓼

水草

紫草

艾

萍

羽之屬

鷄

鶩

鴨

鴿

鵲

鴉

鷹

鷺

雀

鷓鴣

灌陽縣志

卷之三

賦役

三十七

野雉

班鳩

鸕鶿

鷓鴣

啄木

伯勞

毛之屬

牛

羊

犬

豕

猫

鱗之屬

鯉魚

草魚

鮎魚

鯽魚

白魚

鯉魚

鰱魚

介之屬

龜

鱉

螺

蚌



之屬

蠶

蜂

蛙

蟬

蚓

蝻

蛇

營

蚊

蠅

貨之屬

香油

桐油

綿花

生絹

燒紙

瓦缶

紫草

花椒

五倍

煙葉

竹席

狸茶

布



灌陽縣志

卷之三

賦役

三十八

灌陽縣志卷之四

官師志

成周設官分職以為民極而縣師之任實掌邦教  
敷五典擾萬民者秦漢以來建設雖異要其與民  
相近咸畀以父兄師長之權焉然世代久遠文獻  
多所闕畧今第書其可考者俾後之人得指之曰  
某也賢某也否亦居官得失之鑑也仕茲土者或  
膺民社或司教誨或任贊勳必思隨分盡職求無  
愧於吾心而已述官師志

灌陽縣志 卷之四 官師

職員

漢

灌陽縣長

唐無考

宋

灌陽縣令

丞

簿

尉

儒學教諭

學錄

元

灌陽縣

達魯花赤

主簿

丞

尉

典史



儒學教諭 訓導

明

灌陽縣知縣 縣丞 主簿 洪武間有永 典史

司典吏 共十名 典史廳司吏 一名

儒學教諭 訓導 司吏 一名 廩膳生員 二十名 增廣

生員 二十名 附學生員 計不每試考取童生 二十名 武生

入學額同 大成殿門子 一名 祭器庫門子 一名 明倫

堂門子 一名

吉寧巡檢司巡檢員 一名 司吏 一名 弓兵 三十名

灌陽縣志 卷之四 官師

醫學訓科 一名 陰陽訓術 一名

僧會司僧會 一名 道會司道會 一名

按舊志載有稅課局 洪武六年河泊所 洪武十七年設尋裁

國朝

灌陽縣知縣 一名 典史 一名

司典吏 共十名 典史廳司吏 一名

儒學教諭 一名 康熙三年裁 汰 康熙

儒學訓導 一名 順治十六年裁 汰 文復設

廩增附生員額設一如明代

吉寧鄉崇順巡檢司巡檢員一 司吏名一

醫學訓科名一 陰陽學訓術名一

僧會司僧會名一 道會司道會名一

舊設守禦所指揮僉事一員正千戶一員副千戶七

員百戶十員鎮撫一員吏目一員司吏一名軍吏

十五名軍三百名 國朝禦所官軍悉裁

縣職

漢

長

灌陽縣志 卷之四 官師

三

熊尚初 春陵有熊君遺碑稱劉表為荊州牧選拜  
綏民校尉居五年去官未幾詔拜騎都尉

長 灌陽

唐代無考

宋

縣令

陸濟 熙寧 熊詢 建炎二

林文 淳熙 趙永 麻陽人淳熙九年任

浜若水 新喻人嘉定 張從龍 寶邨人淳祐間

黃子成 淳祐

元

達魯花赤

懷禿 泰定四年任

久住 至正十二年任有政蹟碑舊志遺

縣尹

董貞 泰定四年任

趙亮 至正十三年任見修學碑舊志遺

明初全設後省丞簿  
莫詳為何年詔議

知縣

王友裕 山東濟南府人 洪武元年任

姚思敬 直隸武進縣人 永樂間任

蔡庸 直隸江陰縣人 永樂十二年任

鄒本 廣東廣州府人 永樂間任

灌陽縣志

卷之四 官師

四

王思恭 江西人

王偉 湖廣沔陽州人 宣德七年任

馬驥 廣東河源縣人 有功德於灌邑 由舉人 正統二年任

潘文浩 湖廣黃梅縣人 景泰間任

曾貫 湖廣武岡州人 正統間任

楊仕逢 四川南川縣人 天順間任

劉仕達 湖廣溆浦縣人 天順間任 卒

彭侃 湖廣宜章縣人 舉人 成化九年任

龔俊 廣東曲江縣人 成化二年任

劉是誤 以西州知州 〇按全州 志作龔侃而逸龔俊 是誤以二人作一人矣

持政公平百姓保陞上石西州 二人作一人矣

徐浩 湖廣江夏縣人 成化十五年任

劉箎 湖廣溆浦監生 成化二十年任

周曾 湖廣安鄉舉人 弘治間任

陳昌期 廣東南海縣舉人 正德間任

黃潼 福建羅源舉人 弘治間任

陳昌期 廣東南海縣舉人 正德間任



陳猷 廣東潮陽縣舉人正德間任

李拱辰 四川人由監任

王志 浙江餘姚人由監任

志任六年修邑

周應祿 湖廣石首縣人由

黎鶚 湖廣靖州監生 王憲宗 湖廣黃梅舉人

謝泮 江西新淦縣人由舉

汪文 直隸東流縣人由監生

元祐 河南靈寶縣人由監

吳珙 江西德化縣人由監

灌陽縣志

卷之四 官師

袁鉦 江西豐城縣人由舉

黃仁立 廣東陽山縣人由歲

曾迪 廣東博羅縣人由舉

楊英 南京巢縣人由歲

張汝才 廣東化州人由歲

林子俊 廣東海陽縣人由舉

高世芳 福建莆田縣人由

丁汝翼 湖廣龍陽縣人由

周鍾祥 湖廣永明縣人由

費龜年 江西鉛山縣人 由

周 翰 湖廣寧鄉縣人 由

黃若倪 廣東長樂縣人 由歲貢萬曆十三年任全志作電

龍德正 湖廣應山縣人 由歲貢

汪繼明 江西貴溪縣人 由歲貢萬曆十七年任

賴繼亨 江西龍南縣人 由選貢萬曆十九年任

葉尚選 廣東龍川縣人 由選貢萬曆二十一年任

夏之時 萬曆二十年任 潘志立

陶思舜 張治

鄒啟光 宋應璧

梁 鏤 廣東高要縣人 由

熊 涇 天啟三年任 劉應期

唐時和 天啟七年任 陳可毅 崇禎五年任

汪大川 貴州貴陽府歲貢崇禎八年任 德政去思碑

王應元 蔣明良 崇禎十三年任 政

溫 厚 湖廣光化縣人 崇禎十六年任

國朝

知縣

漫遷名氏查  
民三灌陽志  
補填

杜魁林

江南人順治八年任

江楨

北直寧晉人由歲貢順治十一年任

薛煥

福建福清縣人由舉人順治十四年任

陳登瀛

江南望江縣人由歲貢順治十六年任陞德慶州知州立有生祠

薛坤

福建晉江縣人由舉人順治十年任以憂去

單父牧

山東

徐必進

奉天人由舉人康熙十年復任

劉喬松

陝西韓城縣人由舉人康熙十年任於官

宣文昌

鑲白旗人康熙二年任於官

灌陽縣志

卷之四 官師

七

陳一朋

奉天人由例監康熙二十四年任

周天位

福建平和縣人由進士康熙二十九年任

牛兆捷

山西高平縣人由進士康熙三十一年任重士愛民別除奸滑清廉自守卒於官

佟世芳

正藍旗人由例監康熙三十四年任

趙承燦

浙江錢塘縣人由監生康熙四十一年任於官

單此藩

浙江會稽縣人由恩監召講朝賞一次康熙四十四年九月十八日任四十六

年纂修邑志

署篆附

楊麟 江西上饒縣監生明嘉靖十一年以全文州

朱一元 明崇禎六年以都司經歷司經歷署縣

趙光勗 溧陽人國朝康熙二十二年以布政司

廟唐納牖有記

署事例不載志以上三公皆留心地方興起學

校者故附書於末以見彝好之同

屬職

宋

灌陽縣志 卷之四 官師

丞

張之才 長沙人嘉定間任

蕭致 嘉定間任

簿

項文子 嘉定十七年任見趙時逵紹定間任

尉

柳殊 建炎間任見修高著嘉定十七年任見

元

縣丞

謝鉉 秦定四年任見修學碑舊志遺

主簿

陳天祐 泰定四年任 見閩 漢至正十七年任

尉

押失罕 泰定初任 李鵬飛 至正十七年任

典史

段繼文 泰定初任 白 檜 至正十七年任

明

縣丞

蕭韶 江西右筠人 洪武初任 有惠政 李原受 洪武二十年任

灌陽縣志

卷之四 官師

九

主簿

胡冕 雲州人 洪武元年任 見修學碑 舊志作政

典史

俞真欽 直隸宣城縣人 洪武初任

陳昇 天順元年任 有修城功 化

梁禎 天順間任

謝政 湖廣人 成化

曲舒 廣東人 弘治二年任 全志作野

馬相 廣東人 弘治十年任

周冕 湖廣彬州人 弘治間任

陸仕進 廣東人 弘治間任 全志作士

藍椿 湖廣孝感縣人 正德間任

李敏 廣西融縣人 正德間任

柳端和 福建莆田縣人 嘉靖元年任

曹明通 湖廣永明人 嘉靖六年任 全志作道

丘紹賢 廣東保昌縣人 任 俞仕城 福建福清縣人 任

林釗 廣東潮陽縣人 任 鄭松 廣東順德縣人 任

趙液 福建懷安人 任 姜鏡 任

魏金韶 任 賴世顯

林槐 任 張宰

黎紀 任 鄭東京

徐大用 自陳昇至此二十四 任

蔡葵 萬曆二十六年 任

張必昇 崇禎十年 任 曾曰唯 崇禎十年 任

灌陽縣志 卷之四 官師 十

國朝

典史

趙攀蟾 順治十年 任 楊茂芳 浙江人 任

錢國昌 北直人 任 史建昌 陝西人 任

司朝常 浙江紹興人 任 姚文炳 浙江秀水人 任

袁林 河南人 任 汪銓 浙江仁和人 任

汪士隲 江南石埭縣人 任

元明吉寧司巡檢無考

國朝

吉寧鄉崇順里巡檢

郭

曹有學 直隸人 康熙元年任

鄭文獻 江西建昌人 康熙七年任

鮑國賓 河南人 康熙二十二年任

羅尚言 蘇州人

金履謙 浙江山陰人 康熙三十三年任

王啟琪 江西南昌人 康熙三十八年任

王建芳 山東人 康熙四十一年任

蘇崑 江南石埭縣人 康熙四十四年任

崔士元 浙江慈谿縣人 康熙四十五年任

教職

宋

灌陽縣志 卷之四 官師

十一

教諭

范昂 建炎二年任 見余元一 淳熙間全州教

元

梁林 至正初任 張秩 至正十年任

張顯仁 湖廣茶陵州人 至正十七年任

明

余本立 永樂十年任 李琛 廣東茂名縣人 正統間任

張魁 廣東莞縣人 張圭 廣東人 景泰四年任

黃紳 江西永豐縣人 唐良 湖廣醴陵人 成化

蒙儀 廣東南海縣人 正德 何錫之 廣東高要縣人 弘治 間任

禰鳳章 廣東人 正德 許琪 廣東人 正德 五年任

黎獻 廣東順德縣人 舉人 嘉靖 二年任 志見名宦

梁世鰲 廣東順德人 舉人 嘉靖 十年任 鄧尚材 湖廣永州監生 嘉靖 十五年任

關應賓 廣東莞縣人 任 李喬 廣東瓊山監生 嘉靖 二十七年任

胡銓 湖廣常德府人 任 曾仕隆 宣化縣人 嘉靖 三十七年任

熊琮 江西袁州人 嘉靖 四十年任 顏連 廣東長樂縣人 任

鄧肇震 上思州人 萬曆 元年任 元

高文獻 湖廣常德府人 任 曾守約 廣東增城人 萬曆 九年任

灌陽縣志 卷之四 官師 十三

覃演 藤縣人 萬曆 十一年任 林一岳 福建羅源縣人 萬曆 十四年任

蔣思齊 宜山縣人 萬曆 二十七年任 鄧宗閔 湖廣永興人 萬曆 二十一年任

張侯 貴縣人 萬曆 二十七年任 姚大武 崇禎 間任

歐泰 崇禎 間任 李豫新 崇禎 間任

沈澤晉 崇禎 十年任 汪公去思碑 見

國朝

劉尚爵 柳州府舉人 康熙 二十九年任 陞梧州府教授

胡貞弼 藤縣拔貢 康熙 四十年任 終養

盧攀丹 隆安縣拔貢 康熙 四十二年任 以憂去



陳廷藩 北流縣副榜 康熙四十三年任

元

訓導

陶同 泰定四年任 見袁誠 泰定四年任 見

明

袁誠 仲 洪武元年任 日新 齊舊志遺仲字

周應新 洪武元年任 時唐 曙 永樂十年任

林舉 廣東香山縣人 張 紱 廣東程鄉縣人 宣德六年任

陳經 湖廣來陽人 王尚質 廣東瓊山人 成化間任 弘治間任

灌陽縣志

卷之四 官師

十三

胡紀 湖廣零陵人 林友鸞 弘治間任

胡廷仕 劉珮 俱嘉靖

張繼嘉 廣東博羅人 嘉靖三 十年任 全志作姓袁

歐廷柱 湖廣人 嘉靖 葉禔 江西鉛山人 嘉 三十五年任

羅純儉 馬平縣人 隆 傅益 馬平縣人 萬 慶六年任

周環 富川縣人 萬 葉沾 廣東莞縣人 富川十年任

王賓 福建同安縣人 雷奮 湖廣零陵縣人 萬曆十年任

李憲 湖廣江陵人 萬 唐一俊 湖廣辰州人 萬 曆二十一年任

李大順 天啟二年任 周振 唐崇禎十年任 見 天啟二年任

國朝

周文麟 恭城縣人 康熙十年任

王植槐 平樂人 康熙十年任

車任重 賀縣人 康熙二十一年任

王納言 藤縣人 康熙二十二年任

梁惠材 北流縣人 康熙二十二年任

龐 簾 興業縣人 康熙二十八年任

緣縣訓導

蔣登鵬 桂平縣人 康熙三十五年任

羅世儀 羅城縣人 康熙三十八年任

陳御卿 思明府人 康熙四十年任

謝宗璜 博白縣人 康熙四十七年任

灌陽縣志

卷之四 官師

武職

國朝

吳興畧 全州人 康熙四十六年任

灌陽縣志卷之五

選舉

國家用人之途不一如周之論秀三升漢之賢良  
孝廉隋唐之進士制舉宋之經義明代與國朝  
之制科取士之法遂為定制而名公巨卿往往多  
出於是灌雖彈邑應風會者代不乏人宋元以前  
典籍莫考今輯錄僅始於明士子務自磨勵見賢  
思齊或紹其德行或媿其文章或絜其勲業於以  
增閭里之光而耀河山之色不亦偉乎述選舉志

灌陽縣志

卷之五

選舉

一

進士

明

文	楊	蔣	楊	李	陳	盛
文	楊	蔣	楊	李	陳	盛
正二保人	上四保人	永樂辛丑科	正德丁丑科	仁壽里人	上四保人	天啟壬戌科
洪武丁丑科	永樂甲申科	增城縣知縣	舒芬榜歷	嘉靖癸未科	萬曆丙戌科	文震孟榜
給事	甲辰科	鶴齡榜	鄉賢	御史有傳	唐文	

會試乙榜

明

王州 嘉靖癸丑科

時言 萬曆丙戌科

蔣字查民國三年灌陽志補填

蔣佳 蔭天啟壬戌科

舉人

明

洪武丙子科

文偉 見進士

永樂癸未科

灌陽縣志 卷之五 選舉

楊廷芳 見進士

戊子科

陳振 上四保人任交趾石塘縣知縣

呂昌 左坊里人任交趾清威縣知縣

辛卯科

蔣謙 上四保人見進士

何源 大保全人任廣東潮陽縣知縣

甲午科

鄧昌 上四保人

文華 正二保人任道州知州

蔣理 任廣東靈山縣訓導

蔣觀 任江西康縣知縣

丁酉科

蔣恭任廣東樂會縣知縣

庚子科

翟讓

周縉

癸卯科

周鼎

蔣良吉寧鄉州人任山東莒州州判

宣德乙卯科

陸全保正一人

周純粹左坊里人任廣東揭陽縣知縣

正統丁卯科

蔣興川正一保人任四縣知縣  
蔣瓊

灌陽縣志 卷之五 選舉

景泰庚午科

名二名 縣第一名

鄧順名上四保人

丙子科

王燦大保全人任廣東高要縣知縣全志作高安

天順己卯科

鄧綸上四保人任湘支本深保正一人  
鄉縣知縣有傳

弘治戊午科

蔣鍾西崇仁縣知縣  
大保全人任江

甲子科 全志遺

楊 鏊 見桂林府庠

正德庚午科

范 忠 廣安仁縣人任湖

癸酉科

李 高 桂林府庠

嘉靖壬午科

陳楚華 上四保人任

戊子科

范志文 右坊

卿朝賓 任南直揚

灌陽縣志 卷之五 選舉

吳 弼 左坊

辛卯科

戴 輔 大保

甲午科

文 高 正一保人任

徐 衍 仁壽

呂天相 左坊

丁酉科

楊 燦 仁壽里人任

呂天恩 左坊里人任廣

庚子科

石巖任山東陵縣知縣有政聲

周國材左門坊縣教諭任

丙午科

周應禮左坊里人任禮部司務

己酉科

蔡應麟右坊里人

壬子科

王州右坊里人癸丑會試副榜任新安縣知縣擢中書科中書會推福建大主考

楊淮仁壽里人任江西南宜黃縣知縣

戊午科

灌陽縣志

卷之五

選舉

五

蔣仕學右坊里人全州庠任潛江縣知縣

辛酉科

丁用中左坊里人任湖廣江夏縣知縣

隆慶庚午科全州作

鄧一元全州恩鄉人任宜真縣教諭

萬曆丙子科

卿廷彥大保全人任印江縣知縣

己卯科

盛邦奇仁壽里人

壬午科

卿廷聘 大保安全縣人任廣

乙酉科

陳蘊 上四保人

鄧化 上四保人任四

時言 仁壽里人丙戌會試副榜

戊子科

劉大縉 左坊里人任雲

辛卯科

陸德輝 任雲南楚

蔣正元 上四保人任江

灌陽縣志

卷之五 選舉

六

唐世熙 正二保人任福

甲午科

蔣繼孟 右坊里人任河

丁酉科

呂應奎

庚子科

蔣繼閔

蔣誥 任福建壽

呂鍾陽 任廣東瓊

文行

癸卯科



唐世賓 任四川渠縣 陸德英 任湖廣荊

唐世輔 初任直隸懷柔縣 再任浙江

陸應試 任湖廣永寧 文雲鵬 任浙江寧

丙午科

鄧林楨 上四保人 任廣吳國藩 任廣東羅

時敦中 任雲南鄧州 鄧林棟 上四保人 任江

呂應璧

己酉科

范效純 上四里人 初任北直武強縣 再任廣

灌陽縣志 卷之五 選舉

蔣瑞鯉 任湖廣醴陵 王用予 建安溪縣人 初任江

西瀘溪縣 知縣有傳 唐允中 正一保人 任湖廣

西建昌府 知府 祀鄉賢有傳

壬子科

唐世照 任湖廣蘄州 知

乙卯科

卿震臣 任福建安溪縣 唐世熊 任山東鹽運使 流

殉難有旨優卹 祀鄉賢有傳

陸經術 任四川成都府 同知 加授川

蔣元德 江任四知縣

戊午科

蔣佳蔭 解元天啟壬戌會試副榜遊南直與名流文會惜不永筭

戴明聖 歷官戶部主事見修城碑 楊士點

天啟辛酉科

蔣瑞鯨 平任南直太 盛興唐 見進

文王輔 府歷任浙江溫州府知國朝授溫台道

王嘉猷 大人保

甲子科

灌陽縣志 卷之五 選舉

戴明徵 蔣佳徵 南直盱眙縣知縣 兵廩戰死之詔贈尚寶司少卿賜祭葬蔭

生員一名祀鄉賢有傳通志作太僕卿

陸經緯 任山東夏津縣知縣

丁卯科

劉芳聲 任均州知州後 唐世珪 歸宗復姓胡

崇禎庚午科

唐之相 第四名任廣東肇慶府通判歷任瓊州海防同知性篤恩義歸里未治第先建祠堂

工甫竣旋欲置義田義學有 范文正遺意惜費志以歿

王道化 吳元樞 學問博富

癸酉科

蔣旭在任湖廣永

文雲騰

丙子科

蔣起元高尚好善

乙卯科

蔣學儒

壬午科

戴宸眷明季兵亂捐貲招募保障有功詔授兵部職方司主事

王象震有詩名

灌陽縣志

卷之五 選舉

九

鄧喬章

全州庠負異才明末扈蹕詔授翰林修撰

呂震聲

後乙酉年為鄉試期 國朝王師未到廣西沿

例開科灌陽中式有陸士望任博白教諭又副

榜蔣聞芳緣格於事例故附見於此

國朝

順治丁酉科

唐納欽

任陝西固原州知州通志作全州人

唐納牖

任河南虞城縣知縣康熙二十六年同修廣西通志

唐之栢歷任順天府治中擢刑部山西司郎中

庚子科

鄭國承

康熙癸卯科

文經任湖廣大冶縣知縣有政聲  
蔣維藩府教授州

丙午科

唐象益解元任湖廣湘陰縣知縣品貌魁梧文章政事為當道引重

戴宸綽任河南臨潁縣知縣  
周澤長

己酉科

灌陽縣志 卷之五 選舉

十

唐麟振第二名秉性方嚴滇黔之變深隱山林廼撫傅弘烈有不受偽職忠貞可嘉之薦語

卿昌運投新寧州學正康熙三年聘為鄉飲大賓

壬子科

蔣維嶺第二名任宣化縣教諭

辛酉科 壬戌年補

時樞任河南儀封縣知縣

甲子科

范慕淹第四名任河南王維泰府教授

翟振岱現任廣東信宜縣知縣  
慎府教授

丁卯科

蔣之彪 鹿北直知縣

王景昭 陵現任知縣

庚午科

鄧之黠 任博白縣教諭

吳之奎

范之茂

癸酉科

唐時棟 解元

時之華 第三名

莫應斌

丙子科

灌陽縣志 卷之五 選舉

鄧郁南 現任上林縣教諭

壬午科

卿 悅 解元

文奕彬

唐宜甲

蔣依錦

唐紹臨

乙酉科

陸生楠

鄧佳植 全州籍

文奕遠

蔣振芝


王文煥

戊子科

戴允成

蔣英

蔣英



淮陽縣志

卷之五

七

副榜

明

鄧林楨 萬曆癸卯科  
見丙午中式

國朝

呂新 順治庚子科

蔣生香 康熙己卯科

陸生椿 府庠

范之茂 康熙甲子科  
見庚午中式

鄧佳植 全州籍  
康熙壬午科  
見乙酉中式

卿怡 俱康熙戊子科

灌陽縣志

卷之五

選舉

十二

武舉

國朝

鄧大涵 康熙壬午科

翟于岐

唐

瑛 俱康熙戊子科

恩貢

明

唐之相 崇禎元年見  
庚午中式

國朝

唐納欽 順治十四年  
見丁酉中式

唐祚泰 順治十八年恩貢  
隱居博學訓子成

名康熙十年聘  
為鄉飲大賓

蔣昌縉 桂林府庠順治  
十八年恩貢

王維嶽 康熙四十年  
七年恩貢

拔貢

明王家柱 崇禎八年奉旨開場試  
文五篇選拔有傳

灌陽縣志 卷之五 選舉

國朝

文景麟 康熙十一年

文大忠 桂林府庠康熙  
十一年

文震遠 任平南  
縣教諭

唐時叙 康熙二十七年拔  
現任平南縣教諭

文運旭 康熙三十七年

歲貢

明

永樂

黃中 左坊里人任  
茂名縣教諭  
戴保 大保全人任交  
趾諒江府通判

何誠 正二里人任  
舊志作諒江府通判  
全志作州判



周申  
左坊里人任

栗林  
上四保人任  
黃巽  
任福建長

范純  
任湖廣沅  
蔣護  
任雲南長

蔣翺  
范麟  
任雲南長

吳許  
李鵬

范璉  
任安慶  
范詔  
通志

范琳  
蔣志  
吉寧鄉人

文奎  
正一保人  
通志作珪

宣德

灌陽縣志 卷之五 選舉

十四

王道  
陸亨  
正一人

蔣翊  
鄧義  
歷官廣東

正統

蔣旻  
吉寧鄉人任湖  
蔣福

蔣昇  
全志  
秦葵

何清  
任山西濟州吏目歷  
通判

文圮

景泰

戴質  
大保全人任廣  
蔣孟賢  
吉寧鄉人任靖

唐 寧 昭義鄉人  
唐 矩 昭義鄉人

唐 庠 通志作祥  
唐 堅 昭義鄉人

順天 唐 謹 永新縣主簿  
唐 周 正一保人任廣東莞縣丞

陸 典 正一人  
李 憲 吏目

何 瓊 正二保人任  
蔣 義 吉寧鄉人

蔣 源 永豐州同任潮  
范 瑄 右坊人

成化

萬 綜 任安祿州學  
陸 綱 正一保人任南京都督府經歷

蔣 本立 任廣東陽山縣  
陳 達 上四保人

灌陽縣志 卷之五 選舉 十五

唐 漢 正二保人任江  
蔣 本正

蔣 佑 永豐縣主簿  
呂 聰 左坊人

李 廣 仁壽人  
衡 宣 右坊人

治

何 安 唐 用

王 亨 任湖廣應  
周 景 任廣東海

彭 福 任江西弋  
汪 政 任鴻臚丞

趙 俊 仁壽里人  
吳 葉 右坊里人任

陸 貴 正一保人任廣  
東韶州府檢校

正德

呂溥 左坊里人

范賓 西上九江衛人任江

蔣廷章 永豐里人

王舉 大保人

蔣勵 永豐里人

張鑑 大保人

文顯 大保人

張憲 左坊里人

周國鳳 右坊里人

嘉靖

卿友臯 大保人任

范立教 上四保人

王爵 右坊里人

灌陽縣志

卷之五 選舉

十六

呂輔 左坊里人任廣

呂欽 任廣東萬州知

蘇金 右坊里人任廣

周國相 州全志作通判

李才鼎 右坊里人

廖景良 全州人

何震春

廖景賢

蔣廷楠 右坊里人

王應春 左坊里人

蔣廷梅 右坊里人

石魏 右坊里人

黃鍾 左坊里人

王國表 大保人

何宗教 大保人任江

蔡 右坊里人任永興

蔣澤 大保人任平樂

張羽翹 大保全人任 蔣桂 右坊里人任

胡德 右坊里人任 周守忠 大保全人任

吳守乾 大保全人任 樂韶 大保全人任

隆慶

唐鳳鳴 右坊里人任 蔣楨 右坊里人任

呂文夔 左坊里人任 蔣楨 右坊里人任

李宗節 左坊里人任 蔣楨 右坊里人任

萬曆

范廷弼 大保全人任 唐邦貢 正二保人任

灌陽縣志 卷之五 選舉

唐邦凱 正二保人任 蔣梯 左坊里人任

戴之聘 大保全人任 陳必道 左坊里人任

卿一鳴 大保全人任 陳必道 左坊里人任

卿一舉 任湖廣永 蔡愉 右坊里人任

李士貞 右坊里人任 蔡愉 右坊里人任

唐東 全志俱遺 范師淹

呂鍾陽 見庚子 呂鍾瓊

蘇應瑞 范效純 見己酉中式

呂鍾壁 通志

楊挺

吳懋

蔣繼美

蔣繼先

周泰 任福建福安縣教諭

徐儒

鄧應隆

天啟

卿純臣

任福建延平府訓導

蔡宗清

通志作親

蔣繼曾

呂承正

唐良臣

選授湖廣攸縣訓導

崇禎

李生華

呂學參

華字樸民三灌陽志改

灌陽縣志

卷之五 選舉

十八

唐世燾

任武宣縣訓導陞象州學正通志作烹

蔣繼光

卿文銑

歷任貴州餘慶縣知縣

文雲路

府庠任湖廣零陵縣訓導

鄧應旂

周桓

於可奇

文王臣

文雲煥

盛興虞

蔣佳衡

唐祚昌

任平樂府教授

丙戌年為灌陽縣學貢期時 國朝王師未到 粵西本邑照例起送唐祚新應歲貢後順治十

一年奉部例授恭城縣教諭又有恩貢文王  
弼唐納謨二人緣格於事例故附見於此

國朝

順治

鄭國承

見庚子中式

唐納忠

周公然

楊芳

康熙

蔣學元

任太平府教授

鄧嗣昇

文震天

平樂府庠

翟翼

任貴縣訓導鄉飲大賓

灌陽縣志

卷之五

選舉

十九

王之驊

任賀縣教諭

文灝

蔣懋昭

選授興業縣訓導未任卒

文莊

蔣維桂

桂林府庠

蔣開珖

太平府庠現任融縣訓導

唐象履

現任陸川縣訓導

唐懋德

蔣之彥

周易

陸運際

唐象允

桂林府庠

唐嗣寅

思恩縣庠

唐懋行

桂林府庠

蔣維淇

劉乃文

何愈

鄧文煜

例貢

明

蔣佳輔

陸道泰

國朝

唐時雍 康熙十七年由廩生援例現任富川縣教諭

監生

明

灌陽縣志 卷之五 選舉

二十

唐東楨

呂應旂 由廩生

唐世煦 由廩生

唐楷

吳洪先

時正晟 由附生

文紹綸

國朝

唐之澣

唐之渤 考授州同職

唐之澧

唐之澆

唐天祐

唐時幾

唐嗣孝

唐時登 考授知縣職

文振京 由廩生  
蔣元文 由庠生 榑城縣

戴允无 由生 增  
文 縉 由生 附

蔣振芳 由生 增  
蔣文卿 由生 附

蔣文會 由生 附  
吳國賓 由生 附

戴華統  
陸士亮

王景昌  
周 書

蔣開裕  
周鳴龍

劉嗣榮 由廩生

華 疑 誤

灌陽縣志 卷之五 選舉 二十一

薦辟

明

文衛欽 文市人 洪武十八年薦舉為廣西慶遠府知府 有政聲

鄧友夫 犂波洞人 洪武初以孝廉才能薦赴京 卒於途

國朝

唐祚貞 順治十八年奉 部例由廩生舉為已成材 咨 部 有事 母至 孝不履公門之語

委任

唐祚顯 順治十四年奉 部例由廩生舉任 賀縣教諭 康熙三十三年 鄉飲大賓 壽九十一

文 治 順治十八年奉 部例由廩生舉任 遷江縣教諭



文 璿 順治十八年奉 廩生舉任宣化縣教諭 部例由

吏材

明

唐 景

任山東萊州府 平渡州州同

唐

福

任廣東東莞縣典史

蔣宗耀

任左坊里人 大使

蔣

鸚

任右坊里人 驛丞

蔣萬材

任永豐里人 常 德府知事

萬

信

任驛丞

國朝

時雨降

仁壽里人任廣 東香山縣典史

周鳴鳳

仁壽里人考 授正八品職

陶應瑞

仁壽里人考 授正八品職

灌陽縣志

卷之五 選舉

二十二

武畧

宋

唐大隅

生有異質智畧過人 紹興初年曹成陷道 州岳飛提兵破之檄 隅剿捕餘黨隅收降

五千有奇聞於朝獎 投督寨弓馬使以冠 帶充 名色把總理評鄉事 閭閻肅然見唐氏家 譜

灌陽縣志卷之六

治行志

漢史傳諸吏往往紀循而兼酷郡邑傳諸吏則舍酷而登循亦以居邦不非義得從諱耳至其為德為怨原自較然也考之灌陽自置邑以來千有餘年其間慈惠及民歌思尸祝者僅列四人况僅署其姓名而政蹟並無記載於是歎文獻之多闕畧矣今近采輿論亦有愷悌廉明不容泯滅者特書於左所以著遺芳而起景行之思焉述治行志

灌陽縣志 卷之六 治行

一

名宦

宋

林文淳熙初任本縣令

黃子成淳祐間任本縣令

明

馬驥廣東河源縣舉人正統二年任本縣知縣

周應祿湖廣石首縣舉人嘉靖二年任本縣知縣

黎獻廣東順德縣舉人嘉靖二年任本縣教諭

江文直隸東流縣監生嘉靖十七年任本縣知縣

國朝

江 楨直隸寧晉人由明經順治十二年任本縣知縣時當李定國亂後隣兵藉奉調為名掠民子女公力請代為捐贖更誤陷平民為盜公堅持審辦悉釋遣保全甚衆遇事即決獄無滯繫每收銀令納戶照平自充不假吏手低昂收米斛平即止及接見紳士輒詢民間疾苦有所因革即為舉行尤甘淡薄日食蔬麵皆如市價士民德之以介性見忤解任去邑人送者數百人立石以記

灌陽縣志

卷之六

治行

二

按灌陽名宦鄉賢古未有祠明嘉靖十八年己亥督學使李義壯按臨灌邑始命知縣汪文教諭關應賓訓導林友鸞創建議祀宋令林文黃子成以下數人今考舊志刊於嘉靖六年丁亥徑登馬周黎汪四公祠內亦止列四主而林黃二公不與焉何歟至國朝江公省志已載名宦神主亦不附入然建祠有碑省志有傳皆前哲之所論定表彰者也爰敢訂正以昭崇祀之大典云

附錄碑文○今天下郡縣學皆有名宦鄉賢二祠灌陽之祠廢也久矣嘉靖己亥余行部至焉稽之

掌故問之博士皆曰未前聞也嗟乎十室之邑必有忠信灌陽豈但十室已耶乃檄縣尹汪文爰用鼎作以拓墜典乃經始是年冬十月朔踰年而落之乃度乃虔有嚴有翼縣尹又介學博關應賓議秩宜登祀者自宋林文黃子成而下若干人余聞焉孰賢於一鄉孰賢於一國孰賢於天下又孰賢於百世彬彬然也夫自一鄉以及百世宜亦遠矣然均謂之賢而所以賢乎其間者若爾頓殊而君子皆兼取焉何耶蓋處己欲重而待人欲輕惟其輕也故始諸一鄉不一鄉則人以難而易沮沮則弗前惟其重也故終諸百世不以難而易沮易而自怠怠則弗力弗前弗力人材益不古若矣孟子曰一鄉之善士斯友一國之善士孟斯友一國之善士天下之善士斯友天下之善士又尚論古之人是尚友也斯不可以定祀典耶嗚呼祠以廢起祠用秩修規構孔良道揆式協自今以始大夫君子以逮學士其尚思所以<sup>畫</sup>之哉進焉而不俎豆之思失之人也退焉而不弦歌之

灌陽縣志

卷之六 治行

三

思失之已也吾聞古之官於邑者求有裨於鄉之君子修於鄉者期有問於邑之大夫嗚呼必如此而後可以相觀而善而後可以相考而成而後今日設祠之意尚亦有辭於世世俾勿壞提督廣西學政按察司僉事三洲李義壯撰文嘉靖二十年辛丑夏知縣汪文立石

宦蹟

國朝

陳登瀛江南望江縣人由明經順治十六年授本縣

知縣性端肅寡言笑紳士非公不接見執法嚴竣剔奸除棍民賴以寧持政公平訟獄不作居任六年陞德慶州牧士民思之建祠以祀

牛兆捷字澱洋山西高平縣人由乙丑進士康熙三十一年來知縣事剛直廉介儉於自奉勤講約飭保甲見灌邑山多田少地瘠民貧銳意勸民種桑正名辨分一以古道為期事當執法雖權貴囑託富俠苞苴毫不相徇尤樂於造士勸勉諄諄文章不拘一格皆為成就嘗欲修明倫堂建學署齋房立義學課士以起斯文尋署全州篆不果未幾卒宦橐蕭條後署篆者欲變公政旦晝見公驚怖成疾其正氣如此士民建祠奉祀

灌陽縣志卷之七

人物志

士君子抱德懷才出為國家翊世運處為鄉黨樹  
儀型奕禩芳聲與山川炳耀良有以也灌邑清淑  
之氣代鍾偉人舊志所載有得與記者有未與記  
者要皆行誼卓卓足垂不朽今所采錄胥核其實  
罔有恕詞焉至若節義壽考咸表而出之以砥世  
風俾有所感發而興起云述人物志

鄉賢

灌陽縣志 卷之七 人物

一

明

鄧 義由歲貢生歷官廣東布政司右叅議誥授亞  
中大夫

楊 鏊由進士歷官四川按察司僉事誥授奉議大  
夫

蔣 澤由歲貢生任平樂府儒學訓導

戴之聘大保全人篤學有文名萬曆間歲貢授廣東  
普寧令有善政骨鯁不事逢迎改授益藩理問校  
尉有不檢者輒以法繩之忤王意遂拂袖歸杜門

著述教子窮經子明聖登戊午經魁歷官戶部主  
事以清節著明徵登天啟甲子賢書隱居不仕聖  
子宸眷復登崇禎壬午亞魁人以為厚德之報云  
蔣佳徵號虛舟天啟甲子舉人授南京盱眙令崇禎  
八年流寇犯鳳泗盱眙無城可守居民悉奔竄公  
獨率家人堵禦發伏殲賊賊怒襲而攻之公巷戰  
而死督撫疏聞詔優卹贈尚寶司少卿建表忠祠  
春秋崇祀督學王廓檄祀鄉賢

唐世熊號曲水萬曆乙卯鄉薦授富川教諭陞翰林

灌陽縣志 卷之七 人物

二

待詔崇禎初歷吏禮二部司務兵部武庫司郎中  
轉永平知府甫下車見民居半燬村落丘墟極力  
撫綏民有起色九年秋永復因於兵公捐俸賑救  
全活者萬餘人會宦者高起潛督邊聲勢赫奕監  
司以下莫不下拜惟謹公獨長揖不屈大拂其意  
後叙功應優陞僅移山東鹽運使十二年正月濟  
南城陷公守西門歿之巡撫王觀光上聞有旨優  
卹崇禎十五年督學王景明檄祀鄉賢

唐世照號伯闇萬曆壬子舉人幼孤奉母以孝聞仕

饒州通判改雁門關以邊才受知督府題署代州  
三年實授知蘄州廉敏有吏才士民愛戴時西川  
流賊張獻忠犯楚江黃騷動公設立三關募敢死  
士守禦間發伏兵屢殲渠賊城賴以全在任八年  
卒民歌思之祀名宦崇禎十五年督學王景明檄  
祀鄉賢

時敦中字厚予萬曆丙子舉人授雲南大理府鄧川  
州知州

唐允中字闢洪登萬曆己酉賢書其父唐子繼仁德

灌陽縣志 卷之七 人物

三

高隱鄉里推重公恂恂醇謹有古君子風歷官廣  
東提舉黃州府同知屢膺薦獎陞建昌知府乞歸  
養親父九十四歲卒公哀毀過甚歿崇禎十六年  
提學余朝相檄祀鄉賢孫象益舉康熙丙午解元  
元孫宜甲舉壬午賢書子孫蕃衍迄今四代列紳  
衿者四十餘人人以為世德之報

陸經術字仁敷萬曆乙卯舉人負性端方歷安仁臨  
安令以吏才薦陞北城兵馬司轉戶部主事剛直  
忤宦士官調綿竹令值流寇破川西公加築城垣百



計堵禦城賴保全收活流民以萬計叙功陞成都府同知加授川西兵備僉事以憂歸士民泣留建祠以祀提學余朝相檄祀鄉賢

士行

宋

蔣堯佐昭義鄉青岡人家世力田致富至堯佐喜施嘗曰積而不散與貪夫奚異有以急告者或予或貸從其所請視家所有助之嘉定十六年飢堯佐五日一發廩自二月始至七月早稻熟乃已邑人

灌陽縣志

卷之七 人物

四

以故得免流亡邑丞張之才中聞當路乞加旌賞安撫使真德秀檄縣表其門曰施惠

蔣志灌陽人歲荒出粟二百石助賑有司為記諸石舊志曰一節之士予重錄焉何哉去古日遠學裂而性情之德衰苟勉於力所能及亦足以敦鄙廉頑故表而出之

見全州志

明

唐沾昭義人弘治十一年戊午歲大飢沾散財賑濟附近居民賴全活者甚衆邑令白其事詔封義相

官人

李 高字仰之號古臺仁壽里人正德癸酉舉人嘉靖癸未進士為南臺御史時元城令張好古收泰和伯陳萬言家屬治之萬言藉寵白之上因遣官杖逮好古下獄高率諸御史上奏曰昔漢馬廖慮美業之難終三致意於宮中四方勸成明德號稱賢戚漢光武不以姊湖陽公主之故加怒洛陽令董宣史臣稱之願陛下釋好古復其官勸諭萬言追蹤馬廖不失賢戚之名不但元城人式歌且舞

灌陽縣志

卷之七 人物

五

天下必傳誦無窮已奏入下法司好古獲免入以高一疏婉切有體云

鄧 綸上四保人天順乙卯科鄉薦授湖廣湘鄉縣知縣作興學校勸課農桑適遇亢旱公教民築塞陂堰創造水車四境沾溉至今湘鄉之民咸利賴焉以親老乞歸終養民不能舍立有生祠復入名宦奉祀

王家柱字殿九崇禎八年拔貢生樂善好施精究醫術國初王師未到是時全灌一帶為焦璉郝永

忠曹志建等屯兵蹂躪民不聊生自丁亥至辛卯  
飢饉相仍殍屍載道家柱偕邑之好義者數輩發  
粟作粥賑濟飢民連年不輟兵荒之後時疫流行  
復廣施湯藥全活甚衆鄉人號曰王菩薩其母周  
氏年八十餘家柱曲盡孝養隱居不仕以壽終有  
子四之驥之驊之騮今子孫四世猶未析爨  
陸經宗字泗水為邑諸生有才每試必高等然數奇  
五赴棘闈不過遂棄舉業寄情詩酒以自適當掉  
小舟放浪於山涯澤泝間且吟且醉舟中惟携老

莊唐詩數卷晚年詩益工酒益豪金道隱先生被  
讒後稅鞅建陵聞泗水能詩相與郵筒往來彼此  
唱和稱莫逆云

國朝

唐之栢字長卿號松交昭義鄉人登順治丁酉賢書  
自幼敏慧讀書過目成誦經史詞賦靡不淹貫從  
學者甚衆性孝友諸父昆弟有婚葬者力為贊助  
孤幼者教育成立初宰漢陽均賦平訟賑飢革盜  
政難殫悉尤喜課士翰苑名流多出其門適滇黔

之變軍興旁午糗糧舟車戈矛繩鐵之屬莫不調劑咄嗟立辦而不以銖黍累民庚申蕩平陞南安州牧大僚以公有幹才調繁昆陽招集逃亡課耕勸讀擒渠魁贖難民政蹟丕著戊辰丞京兆尋擢戶部員外監督海運倉出納不苟再擢刑部郎中慎覈爰書獄無冤民引年致政歸里十年恂恂謙約惟以訓課子姪為事足跡不入城市知縣牛兆捷聘為鄉飲大賓士庶咸稱為名實相副云

<sup>唐</sup>周象益字受人號東園少有雋才工翰墨衡文諸當

灌陽縣志 卷之七 人物

七

事見咸異之未幾果以鄉試中丙午榜首自是才名愈著且負性豪曠品行端嚴筮仕湖廣湘陰令三載中丞丁公以下無不交相獎薦因小恙憚于逢迎遂步萁羹鱸膾之風稱疾告歸優游林下人僉謂大才小試恒為惋惜焉

文王卿字映西生平力學攻苦文行兼優屢試輒高等一中天啟丁卯科備卷賜匾曰預兆飛黃再中崇禎癸酉科備卷賜匾曰儲才待醮壽登八十有

四

唐納牖字白生號省庵明山東鹽運使唐世熊次子也自幼孝友穎異出羣甫七歲隨父宦京師肄業十載經史文詞靡不博洽貫通同宦先達咸奇之及父殉節濟南納牖年十九哀毀伏闕陳情皆出至性崇禎十五年就童子試輒冠多士是科卷已首薦因二場被誤主司為之歎惜督學黃公景明特恩准補廩餼每試屢居首等文皆鐫傳國朝定鼎即登丁酉賢書己亥北上考擢司李職凡五上春官甲辰庚戌兩闈卷悉薦焉後奉

旨裁汰司李改授河南虞城縣知縣精勤慈惠任兩載以河決被擬議虞城人士愛戴之攀留不克歸里後適際逆變孫延齡屢檄逼仕納牖不願受職惟嗜學力行著有受堂詩文集手錄本邑志稿及本家族譜遇有公事關乎通邑利弊者不避利害不惜己費必力為當事請命梓里多有裨益常思慕之康熙二十二年巡撫郝公浴徵修省志賜額曰三江文獻壽六十有八其生平持己嚴正與物忠誠文章德行至今猶在人耳目也

王之驥字龍友邑廩生賦性通敏邃心理學每試輒  
列前茅尤敦孝友重氣節知縣單父牧以國士期  
之循例起應康熙十一年分歲貢適丁母憂未  
赴康熙十三年將軍孫延齡叛之驥挈家避跡深  
山賦三峯烟雨以見志延齡慕其名次年五月檄  
下有司迫令出山督餉之驥憤恨疾作行至城西  
興賢坊堅臥不食而死時年四十有五所著有格  
致集

節烈

明

蔣氏灌陽人年十九適庠生唐東眼

通志作東昇誤東昇乃其弟也

生子世照纔三月眼卒蔣矢志守節毀妝躬操井

臼奉養舅姑延師訓子課讀常達旦後照登賢書

以名宦著天啟五年伏闕陳情下巡按王一心覈

實通志作旌其門曰貞節

張氏灌陽庠生唐應星妻貢生張鑑女也隆慶五年

吉田搖賊作亂肆劫全灌張年二十一歲為賊所

灌陽縣志

卷之七

人物

九

獲厲罵不屈賊怒揮刀腰斷之崇禎六年巡按畢

佐周疏聞詔旌其門曰節烈

張氏係右衛人嫁軍人馬晟生二子晟年二十四卒

張氏時年二十二守節至五十餘歲卒閨門肅清

無玷

見舊志

義夫陸備節婦鄧氏係瓦窰人補充本縣學廩生娶

鄧氏正德十三年蠻賊劫掠鄉落隨衆潛避巖內

衆度不能守各棄妻子逃出獨備夫婦不忍離相

戀餓死巖中賊退後其屍俱在

見舊志

蔣氏大坊人適唐家田唐承誥為妻年二十二誥卒  
遺腹六月生子履泰其翁姑以蔣少欲令再適蔣  
矢志守節孝敬端肅無一可議後壽八十有七履  
泰亦壽七十餘惜子孫貧賤致六十餘年苦節未  
及顯揚悲夫今按其家譜得之亟為表出以慰幽  
懿

滕氏全州舉人滕元坤女適邑庠生唐納凱年二十  
四凱卒滕撫孤守節孝事舅姑八年明末被兵所  
獲痛哭詈罵奪刀自殺時年三十二歲

灌陽縣志

卷之七 人物

又九

國朝

唐氏灌陽唐世燾女適庠生蔣維藻 國初庚寅年  
夫婦同被亂兵所擄行至拱橋上兵欲拉藻別去  
唐顧藻大呼曰吾不即死以君偕也今君別往  
矣遂躍投江流藻亦從溺

鄧氏灌陽庠生唐納俞妻全州舉人鄧廉維女與妹  
鄧氏為庠生唐之夔妻 國初庚寅年亂兵恣搶  
同被擄閉倉中尋驅眾婦行鄧氏姊妹誓不從相  
持痛哭詈罵投崖下兵怒揮刀兩刃之



陸氏灌陽庠生文樞妻順治十一年李定國亂兵搶掠避於火星山陸語其姑兆祥曰我輩良家婦女義不受辱須懷刃以俟倘勢急惟有死耳次日兵果搜山遂自刎

文氏小名兆祥灌陽庠生文王卿女也年十八未字順治十一年李定國亂兵恣搶掠兆祥與其嫂陸氏同避火星山箐中見搜山勢逼各手刃自刎時稱為雙烈

通志合傳

鄧氏全州舉人欽禎姑適灌陽庠生唐允隆年二十

禎查民三  
灌志補墊

灌陽縣志

卷之七 人物

十

一允隆歿生子祚任方四十日鄧哀慟幾不欲生既而曰妾不惜死其如呱呱何唐氏之鬼未可餒也為營祭葬一如家禮兒漸長出就外傳夜歸必焚膏督誦躬織紵課家僮力耕祚任補弟子員鄧年七十九事上巡撫郝浴疏題旌其門曰松節冰操後壽八十八歲

鄧氏全州舉人一鼎女適灌陽廩生時正煜未十年煜故生三子長甫八歲兩弟皆襁褓時流寇氣熾粵兵四出無寧日且歲數大歉全陽紳士雖男子

有力者多斃於催科鄧拮据家計百務支持撫教  
諸孤皆得成立康熙二十一年補行辛酉科鄉試  
子樞登賢書人以為食母之報鄧今行年八十猶  
健飯事上巡撫郝浴疏題旌表曰艱貞勁節  
唐氏者蔣之蘭妻唐納論女之栢之姊也 國初己  
丑年為亂兵所獲欲污之唐罵不絕口終不可犯  
尋驅挾入舟不屈躍投江歿數日始得其屍於花  
石潭膚色如生後葬於館驛渡至今人稱為烈婦  
墳云

蔡氏者蔡伯夏之女也適里人陳敬甫生二子所居  
葉官營距城二十里康熙三十六年六月十八夜  
盜劫其家敬甫鬪死其長子出就外傳次子方六  
歲越戶匿稻苗中蔡氏被執強之出門不肯脅以  
兵不屈賊怒捽其髮拽之以行越十餘里膚綻筋  
露頭髮盡脫蔡罵不絕口賊不能奪遂遭洞胸剖  
腹之慘聞者傷悼紳士咸有詩弔之

陸氏者文王旦之繼室也王旦初娶妻生一子文治  
甫一歲妻故續娶之陸年十七歸王旦舅姑俱先

逝次年生一女年二十四而王旦故矣或以陸年  
少且無子勸其再醮陸矢願匪他撫文治如己出  
延師訓課成功名任遷江教諭甫兩載夫婦相繼而  
歿所生二子尋亦皆殤陸以一身哭文三世痛其  
絕續乃謀諸族人撫姪孫振泗以繼文治後整飭  
家道不遺餘力鄉里稱為節婦康熙二十二年  
恩例咸欲舉報陸力辭而止迨康熙三十三年卒時  
年七十有七計其守節五十餘年備歷諸艱而又  
能存文氏之世嗣不可令其終泯故表而出之

蔣氏者蔣佳徵女也徵以流氛殉難贈尚寶司卿而  
無子遺氏尚幼迨年十五適時敦中長子太學生  
正晟為耦孝順端勤鄉里有大家之譽年三十不  
育急謀娶小星龔氏生子二不減膠木之仁迄今  
孫枝林立其婿唐象晉撰有墓碑稱為賢母今書  
於此所以興起乎逮下之心者


鄧氏係犂陂垌鄧本然女年二十一適瓦窰坊陸濬  
為妻甫及六月濬故遺腹生子承繼鄧誓不再醮  
撫繼長大成名閨門整肅壽七十有一後子孫科

第綿綿稱為巨族其苦心勁節惜未及傳今採其  
家譜豈以年遠而忍令泯沒耶書之以俟司表彰  
之權者

灌陽縣志

卷之七人物

十三



耆壽

國朝

唐象乾 增生康熙三十一年舉為鄉飲介賓現今年八十有四

王守典 庠生康熙三十二年舉為鄉飲介賓

戴華纓 庠生康熙三十二年舉為鄉飲介賓

文樞 增生康熙三十四年舉為鄉飲介賓

周勳然 左坊里人康熙三十一年鄉飲者賓

周鼎臣 左坊里人康熙三十一年鄉飲者賓

徐誥 鄉飲者賓

灌陽縣志

卷之七 人物

十四

呂兆熊 大保里人康熙四十二年奉

劉懋學 永豐里人康熙四十年奉

封贈

明

鄧學通 以子義貴贈奉政大夫廣東高州府同知

黃氏 鄧義母 蔣氏 鄧義妻 贈宜人 封宜人

李法森 以子高貴贈文林郎京山東道監察御史

竇氏 李高母 封太儒人

時序 邑庠生以子敷中貴贈文林郎江西贛州府寧都縣知縣

蔣氏 敦中前母  
翟氏 敦中母

蔣氏 敦中妻

唐子繼 以子允中貴封奉政大夫湖廣黃州府同知

文氏 唐允中母  
蔣氏 唐允中妻

唐東煥 廩生以子世熊貴贈中憲大夫直隸永平府知府

鄧氏 唐世熊母

蔣必薦 以子瑞鯉貴贈文林郎湖廣醴陵縣知縣

唐氏 蔣瑞鯉母

戴之聘 以子明聖貴贈文林郎湖廣通城縣知縣

灌陽縣志 卷之七 人物 十五

卿氏 戴明聖母

文國相 以子王輔貴贈中憲大夫浙江温州府知府

蔣氏 文王輔母

國朝

唐納論 以子之栢貴贈奉直大夫雲南雲南府昆陽州知州

劉氏 唐之栢母

仙釋

蔣興灌陽人早中鄉試不仕隱於仙源洞修煉不知所終州守顧彝嘗訪其洞得興故樓石題詩其上池道澄朝元觀道士年四十有九一日晚飯飲酒數壺語其徒曰吾今夜丑時一刻當別人間矣沐浴衣冠禮三清果至丑而逝

傳疑

丁三郎不知何時人相傳一日廬舍忽沉舉家盡為馮夷所劫其地化為百尋深潭因名丁塘秋水澄

灌陽縣志

卷之七

人物

十六

澈鄉人偶有見其廬舍者至若顯聖洞廡楚人像祀附於湖之龍王廟者亦曰丁三郎鄉人遂謂三郎歿為水神嗣是全灌渡湖者必具名投祠瞻拜從無風波之險商舟有搭全灌人亦私心竊喜今本朝勅封為靖江王立有專祠夫流言決於智者丁公之事無志似未足信然其塘可攷也丁王即灌之丁三郎似亦無稽然前人何故具名瞻拜全灌之人何以獨無風波之險舟人何以偏喜搭全灌之人使是說果真丁公聰明正直宜於人無所不

庇豈獨偏護全灌示篤鄉情哉或者丁公雖為神靈究不忘生前出處其事跡未嘗筆之於書千百年後或為異鄉援引是出處不明也故以無所不庇之心而尤加意於全灌所以默示曰吾灌人也灌隸於全皆故鄉焉使人因是而曉然其為灌邑丁塘之丁三郎與



灌陽縣志卷之八

兵防志

易曰王公設險以守其國張仁愿亦謂築城固壘以守其攻蓋安內攘外必有備而後無患也然山川風土因時變更昔之所為險者今已不足恃昔之所為平者今或有可慮此制治保安者誠不容忽也舊志兵防簡畧未備茲悉采補以為未雨之綢繆庶覽者周知境地以度機宜而胸中自有成竹矣述兵防志

灌陽縣志

卷之八

兵防

兵制

明

洪武元年平章楊璟克復平定人民屬湖廣所轄無軍鎮守洪武二十六年徭獠生發本縣縣丞李源受具奏調湖廣都司寶慶衛指揮使孫宗領兵收捕至二十八年寧息調撥廣西所轄就於本年十一月二十四日開設守禦千戶所

灌陽縣守禦千戶所指揮僉事一員正千戶一員副千戶七員百戶十員鎮撫一員吏目一員司吏一

名旗軍一百八十六名又守城東西二營打手共七十二名新安堡打手二十名粟木堡打手八名獅子堡狼兵十名粟木堡狼兵四名三峯堡狼兵十八名

國朝定鼎定新兵制設分防城守

灌陽縣駐防城守官一員係全州營千把總輪撥每年十月初一日更換原撥防守兵九十名康熙二十三年奉 部文裁汰一十四名今駐縣防守兵五十六名駐崇順里防守兵二十名俸餉俱全州

灌陽縣志

卷之八 兵防

二

營分發糧米本縣支給

民兵

明原額八里編民款一百三十名正德十四年被賊殘破具奏准併作五里編一百一十名就其內選百長二名每月以一百長帶款五十五名往守復順里定岡隘以禦夷獍往來以一百長領款五十五名在縣守城以備不虞他郡有警亦聽調用如此永為定式今廢

官署

明設守禦所在縣治東洪武二十八年建有威武堂  
儀門大門後堂鎮撫廳吏目廳軍器局公廨俱全  
自崇禎末年兵燹焚燬今址存

國朝分防官署未建初任府館康熙三十年災燬今

寄住朝元觀

武備

演武場 在城西一里

演武亭 在城北舊設有磚瓦官廳一座今圯址存

營堡

灌陽縣志

卷之八 兵防

明營二  
堡四

東關外營 在城東防守打手三十名

西關外營 在城北一里防守打手三十名俱萬曆二十九年知縣夏之時建

獅子堡 在城西南二十里防守狼兵八十八名三峯堡 在城南三十里防守狼兵十八名

新安堡 在城西六十里防守打手二十名栗木堡 在城西六十里防守打手八名狼兵四名

後又設寨五堡十

巖寨 月山寨 春立寨 掛子寨 李公寨

杉木堡 峯山堡 仁山堡 江東堡 傅山堡

板橋堡 赤巖堡 文村堡 官莊堡 木老堡

關隘

石匱關 在城北八景之一曰石匱歸樵

昭義關 在城北六十里 永安關 在城北八十里

定岡隘 在城西一百一十里 正德十四年 張華督修守禦

以上營堡關隘皆設以防寇者 廢今俱

國朝革其軍卒今設崇順隘撥守兵二十名防汎

寨

蓮花寨 縣西十五里 地名豐下屯

龍岸寨 縣西二里

真武寨 縣北十里地 名排復周

黃牛寨 縣西四里

灌陽縣志

卷之八

兵防

小江源寨 縣東南二十里 名秀江屯

烏龜寨 縣西五里

太平寨 縣北十四里 地名蔡所屯

白面寨 縣西八里

仁山寨 縣西十里地 名仙源洞

貴魚寨 縣西九里

吉寧寨 縣西百里

觀音寨 縣西三里 觀音岩上

王樓寨 縣西三里

白沙寨 縣西三里

俊山寨 縣西三十五里 原名槽山

魯塘寨 縣西一里

寧江寨 縣西十里

獅子寨 縣西三里

馬山寨 縣西南三十里

人頭寨 縣西四里

獨山寨 縣西四十里

下薛寨 縣西九里

水口寨縣西一百里

以上各寨俱民間修築以避寇者廢今俱

道路

東出德化門至馬口石里五至秀江屯里十至孫家嶺里十

里至昌家渡里三十至蔣家嶺道州界六十五里

南出鎮遠門至下臺里五至古鐘源里十五至三峯山里三

里永明縣界

西出崇順門至王樓渡里三至牛頭口村里五至范所里十

至鄉繼村里十五至雀兒山里二十至唐官屯里二十至

灌陽縣志

卷之八

兵防

五

白沙村里三十至俊山村里四十五至烏龜山里五十至老

婢塘公館里五十至東江峽里八十至東江上七下八

八十里至崇順司里九十至定岡隘恭城縣界一百十里

北出龍川門至心田村里三至寺木村里七至排復岡里十

至姚家村里十五至赤頭岡里二十至新墟里三十至栗

灣三十五至下坪田里四十至瓦窰里五十至文村里五十

至巨巖村走道州里至昭義里六十至會湘橋全州界七十里

灌陽之寇密邇恭城北鄉且與南江源勢江東寨

青水諸峒巢近故時時剽掠然寇至必由東鄉入

唐黃過陶川江經平原臺塘大畔源乃尋山徑肆  
害於灌百姓曠土裹糧有限寇來去無置足之地  
不過棲息草莽踪跡易露則我亦易追襲彼安敢  
長驅數犯哉聞之洪武初邑未有猺獞也永樂間  
邑人薛昌黃秉仲輩始招至二三耕作無敢寇害  
自正德乙亥賊大猖獗其後占踰遂繁而恭城田  
主潘欽輩廣為招集湖北諸種幾遍臺塘灌之富  
人又引古田獞夾板猺散布田間名則藉力耕種  
實陰通羣寇為害不細今耕作既久林翳漸盡田

原曠土編布墾種民饜山澤之利結廬保守遠近  
相望無復昔日梟獍之慮 見全州志

單父牧曰灌邑設在全州之東南一百二十里水  
陸俱可通而大勢却在桂林之東北水路由全州  
紆迴而上到桂林五百餘里陸路由建安司轉西  
南三百二十里若西走山路由魯塘鼓子嶺延沙  
界等地方僅有二百二十里然山路峻嶮止可步  
行轎馬則不能施矣又考灌陽昔為全州之清湘  
驛乃由州入平樂之孔道也山路僅三百四十里

較走桂林則大捷矣然水路不通商賈圖便走桂林驛遞遂廢然由全州取便入平樂莫有逾焉者也又東接湖廣之道州經文村大營等堡一百四十里入州城南雖與湖廣之永明縣接然出城十里之外皆青山險絕無路可通西九十里觀音閣設崇順司巡檢一員弓兵二十名防守此則灌之西界再八十里即入恭城矣北五十里羅板田設舖司大路與全州接壤再七十里則入全州城矣此灌之東南西北大勢也其境內形勝西北自羅

板田起五十里入縣又轉西九十里至崇順司東西縱共一百四十里中通一水如帶百姓枕河而居橫南北兩岸數里之外皆青山無復民居東北有下歸化里徭民西北有上歸化里徭民為民無多頗稱淳良至境內之水由牛江發源紆曲層折五十餘里皆暴瀑至俊山黃牛寨河水稍平可容小舟四十里過縣前轉東北經大龍三桂大埠等灘皆險灘也四十里過伍家灣五十里過文村六十里過昭義皆屬境內居民亦有商賈畧集六十

里至全州與湘江合今稱三江會口灌江其一也  
第灌江上流大山隔絕不能與平樂大江通故行  
者寥寥稱僻地焉

按灌邑西鄰恭城南鄰永明但自定岡隘以南山  
勢延亘接通富川賀縣各界而平原臺塘皆恭城  
之地大畔源為永明之地皆不能越境置守今恭  
富與本邑各境雖有獠人居住但屋舍星散不成  
村落且山林深密路逕多岐寇之出沒亦未可賴  
其悉諳也然則大荆源大溪洲響水巖毛竹江陡

水源大竹山烏坭塘判官山安樂源陳蒲江頭道  
水皆與平原大畔相通極為險要寇盜出入必由  
之路不可不時存於心目之間也下鄉之陣伯界  
牌下歸化小路勒塘各處又與道州全州接壤亦  
宜嚴密保固其魯塘盤江山鹽田源烈溪源沙羅  
源大源小龍牛埠嶺  
烏石岡上歸化一帶上界興安下界  
全州雖屬內地然山勢高大連接寫遠安不忘危  
似亦未置之不道也惟保民者留意焉



灌陽縣志卷之九

事紀志

嘗披麟經年月宴會災祥寇盜或喪之屬莫不有紀厥後作史者遂有編年起居時政紀傳各體近代邑志亦往往祖之夫經史天子之書邑志似非其埒然邑天子邑也民天子民也四海一家吉凶同患寧謂邑志非天子書乎揆其義蓋取由人事以挽天道俾司風會者有所省察而幹旋之以廣天子之聲教云爾述事紀志

灌陽縣志

卷之九 事紀

歲時

立春先一日有司率僚屬簪花披紅迎土牛芒神於東郊鋪行妝扮故事春色前導是日飲春酒時至打春有司扶犂三推以小土牛分送薦紳

元旦各家夙興焚香拜天地祖宗長少以次稱壽至明謁拜官長親友往來交賀蓋重元始虔正朔云元宵自初十日為始懸綵燈於庭或舞獅象龍鳳各燈遍造官長親友之門以為樂至十六日早乃已二月上戊社日同里共祀社神以祈豐年鄉村為盛

清明日晨起插柳於門各詣祖墓祭奠標紙錢於竹枝成禮而返謂之掛掃

端午插艾虎於門飲雄黃菖蒲酒辟毒以角黍相餽遺觀競渡之戲童男女以五色線綰赤靈符佩之七夕士人於是日晒書籍及衣服取水以造醬醋至夜亦有陳瓜果以乞巧者

中元自十一日為始家列先祖位每日三進茶菓羹飯如事生禮至十五日焚冥衣楮財以薦之

八月上戊社日記社如二月儀

灌陽縣志

卷之九事紀

二

中秋食月餅煮芋魁設宴席賞月

重陽間有登高飲茱萸酒者

冬至紳士公庭行拜賀禮民間則否

小年夜臘月二十四俗謂竈神昇天具菓酒以祀焉除夕掃舍貼門神春對利市錢設酒榘祀先祖竈神放爆竹以度歲

事蹟

宋

淳熙七年上頒字民銘於縣俾勒石於堂側朝夕對

越知警銘曰

蒞事必公 拊民必惠 邇者有訓 亦既切至  
咨爾令長 守以勿墜 宣朕實意 斯為愷悌

國朝

順治九年部頒條約八款勒石學宮名臥碑有曰  
朝廷建立學校選舉生員免其丁糧厚以廩膳設學  
院學道學官以教之各衙門官以禮相待全要養  
成賢才以供

朝廷之用諸生當上報

灌陽縣志

卷之九事紀

三

國恩下立人品所有教條開列於後

一生員之家父母賢智者子當受教父母愚魯或  
有非為者子既讀書明理當再三懇告使父母不  
陷於死亡

一生員立志皆當為忠臣清官書記所載忠清事  
蹟務須互相講究凡利國愛民之事更宜留心

一生員居心忠厚正直讀書方有實用出仕必作  
良吏若心術邪刻讀書必無成就為官必取禍患  
行害人之事者違違自殺其身常宜思省

一生員不可干求官長交結勢要希圖進身若果  
心善德全上天知之必加以福

一生員當愛身忍性凡有司官衙門不可輕入即  
有切己之事止許家人代告不許干與他人詞訟  
他人亦不許牽連生員作証

一為學當尊敬先生若講說皆須誠心聽受如有  
未明從容再問毋妄行辯難為師者亦當盡心教  
訓勿致怠惰

一軍民一切利病不許生員上書陳言如有一言

灌陽縣志

卷之九事紀

四

建白以違制論黜革治罪

一生員不許糾約多人立盟結社把持官府武斷  
鄉曲所作文字不許妄行刊刻違者提調官治罪

康熙十年頒到

聖諭十六條令鄉約於每朔望日宣講勸化曰

敦孝弟以重人倫 篤宗族以昭雍睦

和鄉黨以息爭訟 重農桑以足衣食

尚節儉以惜財用 隆學校以端士習

黜異端以崇正學 講法律以儆愚頑

明禮讓以厚風俗

務本業以定民志

訓子弟以禁非為

息誣訟以全良善

誠窩逃以免株連

完錢糧以省催科

聯保甲以弭盜賊

解讎忿以重身命

二十五年頒到

御書萬世師表匾額懸掛於文廟

三十二年奉

旨諭恩免錢糧一年

三十四年頒到

灌陽縣志 卷之九事紀

五

御製孔子及顏曾思孟四子贊勒石豎於學宮

四十年巡撫蕭永藻奏請奉

旨勒石禁革不許私派上司節禮生辰無名夫船解

糧傾銷填平解米水脚鋪墊楚塘工食表箋工墨

奏銷編審冊費貼解銅鐵脚價科場不敷等費科

歲兩考棚廠鋪設執事等費修理城垣文廟陝河

等費修理倉廩營房塘鋪砲臺柵欄哨船等費里

長見面陋規均平現年大辦公務等費

四十一年奉頒到

御製訓飭士子文教官不時宣諭多士文曰

國家建立學校原以興行教化作育人才典至渥也朕臨馭以來隆重師儒加意庠序近復慎簡學使釐剔弊端務期風教修明賢才蔚起庶幾棧樸作人之意乃比來士習未端儒效罕著雖由內外臣工奉行未能盡善亦由爾諸生積痼已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有叙爾諸生幼聞庭訓長列宮牆朝夕誦讀

寧無講究必也躬修實踐砥礪廉隅敦孝順以事親秉忠貞以立志窮經考義勿雜荒誕之談取友親師悉化憍盈之氣文章歸于醇雅毋事浮華執度式於規繩最防蕩軼子矜佻健自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦滑欺孤凌弱或招呼朋類結社要盟乃如之人名教不容鄉黨弗齒縱倖逃褫朴濫竊章縫返之于衷能無愧乎况乎鄉會科名乃掄才大典關

係尤鉅士子果有真才實學何患困不逢年願乃  
標榜虛名暗通聲氣寅緣詭遇罔顧身家又或改  
竄鄉貫希圖進取囂陵騰沸罔利營私種種弊情  
深可痛恨且夫士子出身之始尤貴以正若茲厥  
初拜獻便已作姦犯科安望其秉公持正為國家  
宣猷樹績膺後先疏附之選哉朕用嘉惠爾等故  
不禁反復惓惓茲訓言頒到爾等務共體朕心恪  
遵明訓一切痛加改省爭自濯磨積行勤學以圖  
上進國家三年登造束帛弓旌不特爾身有榮即

爾祖父亦增光寵矣逢時得志寧俟他求哉若仍  
視為具文玩愒弗儆毀方躍冶暴棄自甘則是爾  
等冥頑無知終不能率教也既負栽培復干咎戾  
王章具在朕亦不能為爾等寬矣自茲以往內而  
國學外而直省鄉校凡學臣師長皆有司鐸之責  
者並宜傳集諸生多方董勸以副朕懷否則職業  
弗修咎亦難逭勿謂朕言之不預也爾多士尚敬  
聽之哉

四十二年奉

詔恩免四十三年錢糧一年

災異

明

**弘**治十年五月二十日仙源垌漲水五尺許死者七十餘人

正德六年土名丁塘地陷二畝許深四五尺

十年潤閏四月初一日漲水進城四五尺

十三年四月初一日漲水進城四尺至五月初九日

又漲水進城三尺是年蠻賊起流劫鄉村

灌陽縣志

卷之九事紀

八

十四年恭荔寇陷城冬竹生荳角楓樹結梨子

通志作弘治

十五年四月十五日漲水進城二尺

十六年桃李冬花

嘉靖元年五月十三日漲水進城三尺至十六日又

漲水進城二尺以上見舊志

國朝

順治丁亥戊子己丑三年皆大饑庚寅年李定國兵

亂殺擄尤甚

康熙二年九月初八日下鄉大營山崩水湧剝去民



田本縣知縣薛坤單父牧經詳巡撫金光祖

題報豁免田稅一十二頃九十七畝三分五厘在案

四十二年大水鄉茶山口永里所沿江一帶田畝

臨成坎澤

四十四年正月二十九日災東門內外民房盡燬焚

死嬰孩二月虎入城食馬

四十五年五月大水沿江田畝多被剗壞

四十六年五月大水所在田畝剗陷者多

灌陽縣志 卷之九 事紀

九

墳墓

明

監察御史楊鏊墓在丁塘去城西十里

監察御史李高墓在綿谷庄去城西二十里

勅祭葬贈尚寶司少卿蔣佳徵墓去城東南三里

獠獠

大源獠 居在縣北三十里所沙羅源獠 在縣北三十里

東西兩山獠 在縣西六十丁鹽田源獠 在縣西七十餘丁

上復順里獠 縣西一百有餘里下復順里獠 縣東六十餘里

東西六十里東  
西兩字疑誤



灌陽縣志卷之十

藝文志



邑之有乘義取詳載往事以垂鑑將來至於詞章詩賦似可弗錄然經國係乎謀猷民情見於歌詠太史採風往往不廢灌邑山川奇秀甲於鄰封搨管抽思靈幻奔副前人治定勒銘登高作賦皆以經濟為文章典核高華何所不有茲於傳記取其有裨政教者於詩賦取其足發感懷者他非紀乘所關珠玉琳瑯必有選集登棗也述藝文志

灌陽縣志

卷之十 藝文

一

重修城垣記 嘉靖十一年

明李 高 御邑人

灌陽在禹貢荊州域漢以前無攷武帝元鼎間置零陵郡統縣十其曰洮陽即今全州而灌陽為昭義鄉隸境內獻帝末劉表為荊州牧制拜熊尚初騎都尉灌陽長而灌陽之名見於史然未始有邑也三國吳得蜀零陵等郡地遂分陵泉等十一縣灌陽其一而邑始名矣晉地理志作觀陽蓋觀灌字通也郡志分野謂零陵入軫十一度而灌陽之吉寧灌合二鄉析自昭之恭城則有越焉然不著其分析之年隋大業

十三年蕭銑析湘源置灌陽豈二鄉之析在斯時乎  
自是歷宋元俱屬全州隸零陵郡國朝洪武二十八  
年征南將軍韓觀平戢後奏改全州隸桂林而灌陽  
隨屬馬邑誌謂前洪武平戢之歲築土城高丈五尺  
週四百七十丈大門四東德化南鎮遠西崇順北龍  
川串房五百間覆以茅西北浚濠天順元年守禦千  
戶陳銘典史陳昇等撤茅易以瓦東南浚濠五百五  
十八丈然則自五代至宋元如聚落歟邑西二十里  
有古城岡廢堞猶存誌謂隨建後遷今地而建置遷

廢之歲月漫不復紀嘉靖壬辰春臺察崇明施君一  
德按廣西巡部至灌陽識山川形勢為要害地當嚴  
城守以制勝適州別駕楊君麟視邑事飭飭有舉廢  
才臺察發公帑若干緡付楊君以修舉事君唯唯受  
委託偕守禦千戶陳楚雄計畫之則陶甃之費版築  
之役動以千計公帑所出三之一耳楊君毅然任之  
曰事在我耳咨詢邑人之材者得蔣勸張欽周豪吳  
鈇輩謂可以義動而誠屬之也舉垣地而四畫之始  
各總其綱又得幹治如方鑾輩四十餘人計丈尺而

而分授之使各任其事千戶王勝龔湘劉朝印鎮撫  
李鑾百戶徐興宗等又各任督率之責以盡其才揚  
君躬蒞之欸欸渠渠視若家政倡之以久安之以義  
動之以歡洽之情懸法以懲其情明賞以程其功遠  
邇咸趨百堵俱作四閱月而功成內城甃以陶甃外  
城治其頽壞撤串房之舊而新之其下可以通輿馬  
改櫓堞之廢而葺之其上可以通矢石望之巖然為  
堅城是役也雖臺察之首事而楊君飭理之力居多  
蓋其推誠以待幹濟之人聲義以風執役之衆故事

集而民不倦役成而用罔乏公帑所給未半赴義之  
民不計直而終其事者衆焉君之功為可紀矣或曰  
一邑之垣才彈丸耳胡喋喋為予白曰不然大厦之顛  
始于一椽尺畦不治百畝就荒國無小胡忽焉况邑  
之形勢西捍桂林臨桂之背南當恭城平樂之衝北  
蔽全湘東連水道得堅城完壁焉阨險而守之策之  
良也自洪武割附之後民不知兵者百年餘近正德  
己卯間恭荔洞猺蹂踐邑境而全永之墟亦多寨柵  
壁壘矣嚮使灌陽得堅城勁卒而守之則安枕帖席

之地當不少也然則楊君今日之完葺所以保障方  
來者其功庸可以無紀耶抑愚竊有議焉孟軻氏經  
世之儒而有地利人和之說夫灌編氓單寡而差派  
不少殺屯日蕪而徵科不少恤流獯漸入而人情不  
少警履霜之勢不啻被髮野祭為可虞也則夫百年  
之後所以為城守計者復何如耶楊君深籌遐識士  
也經遠之猷尚於城垣之外有深望焉邑尹王守之  
以記請為書其役事如左而終致區區之意云

增修城垣記

崇禎十  
七年

明戴明聖

邑人  
主事

國家設賢辨官遵其畫一與守民之鮮有弗欲相安於  
無事之福者然外不足以捍牧圉內無以盛民物毋  
問時當擾攘也其能晏然也乎故一勞永逸明智所  
必先難與圖始怨勞所不恤抑視其當務者斷然行  
之已矣矧城大役也春秋所慎書令非其時驅農以  
從事於約楮之間謂之諄無所注措而臨事以斂民  
私謂之剝非其要輒興人徒以窮力於無所緩急之  
區謂之嘗是以計度而築不愆於素周乎慮也大飢  
以修俾食其力因乎時也斯善道也余邑僻在一隅

不患虜不憐倭非通道所必經非要害所必爭是以古未有城國朝始兩治之然徂於承平率皆卑脆不知此就大勢言耳若論一邑固亦有隱憂焉崇順永豐則與恭城峙江唐黃諸洞接三峯孫家堡則與永明永藍接小龍徐所一帶則與大巢諸源接文市巨巖一帶則與春陵接昭義關一帶則與零陵接不逞之徒在在思起丙寅藍寇之劫竟跨城闖入戊寅阮賊之變雖全州為蔽風鶴之警猶不免乎張皇茲近事之鑒也前牧此者未嘗不感慨於中然時絀舉羸

往往束手侯下車見城處處皆瑕穆然計曰此在承平時不可矧擾攘之秋乎乃平版幹程土物議遠邇量功用度有司捐俸以倡紳士和之工執其事民獻其力經始於癸未之正月侯戴星出入寢食弗遑者幾半載低者甕之隙者實之堞增八尺有奇龍川德化二門建月城各一東西城峙敵樓各一形不易而勢增雄暨冬芝城零道處處告陷寇在門庭人得憑城以固不復阮賊之變之張皇矣侯之功也是侯若先曙乎此而城之者侯諱厚楚之光化人具文武幹

有折衝樽俎之風殆龔黃而韓范者歟尉張君必昇亦與有賢勞法得備書

修建縣治記

淳祐辛亥年

宋趙嘉慶

提點刑獄

縣固有宜陽之大曲逆之壯介通道大都為四方萬里所屬目者吏於其間銛厥芒穎以眩能名流治聲於天朝馳逸駕於官路殆如建瓴之水敷揚四達所居然也至若附庸之邑不能十五鄰於蠻獠僻在遐陬學士大夫率多陋其土而夷其民民亦恃陋阻其教也然則幾何而不胥為夷哉全為州窮湘源而瞰

灌陽縣志

卷之十 藝文

六

嶺右於湘部為陋灌陽又其支邑去郡且百餘里遠中土而逼蠻蜚前後令長計資者翫唱以俟去苟祿者侵欲以自腴傷紀頽綱顛仆相望連帥旰江鄧公堦念棠芟之舊思所以惠綏其民諏詢歷歲始得今今張公從龍而刻辟朝廷從之張字子雲老儒也博聞強識篤善行而不怠歷仕以廉敏稱命下不得辭則單車至縣實淳祐辛亥八月八日也始至謁舜祠於華山之陽拜禹廟於澥江之澌退而嘆曰是知所尊良心古意未泯也若之何使舜禹之澤不下於吾

民乎入視公廨棟梁欲離咿嘍作聲吏雨立於頽廊  
囚露坐於隳圉則又作而言曰是聽政修令之地今  
堙圯至此茲心不爽昏亂百度於從政乎何有因命  
撤之有悚而告曰郡急索租且無所出奚暇及此則  
應之曰於我視成汝無苦自是捐已所有得六十萬  
鏹士衆叶助亦如之掄材於野甃瓦於陶傭工於市  
公役而私酬之民用懽趨往往恨不及與也甫再閱  
月門庭革故矣又不踰時廳宇鼎新矣廊以間計者  
皆應時而具辛亥十月僞功壬子九月告成爽塏高

明閉閤楹翼咸中矩度民奔走受令於畫簾之側吏  
重足一跡於軒廊之下巖墻凜凜視昔何如而前突  
兀乃遽見此張君豈以是炫能名於通道大都乎又  
豈以是緩租賦於觀察刺史乎遠民望之森然魄動  
曰吾慧君哲父之所宅也則信之滋篤奉之益專教  
化號令之孚於民顧豈貿貿而來憤憤而居遂遂而  
去比乎噫是真能且賢矣予方以其治狀轉而上聞  
郡太守等衆揚公太雷亦交薦之張乃具顛末要予  
記其事顧讞議積未暇也而請益力乃為援毫抽思



直記其實而慨嘆士大夫分量之天有不可同日語者以膏腴之地要害之郡而姦利浚財怙冒賊虐大刻於民者類以不可為藉口灌陽叢爾邑外足貢輸內給營繕官不知費民不知役化行俗易庭戶肅然郡邑有不可為者乎青衫葉枯恩愛滋洽癡聒鼓腹野人挽鬢令尹鳴琴不下堂而<sup>壽</sup>此壽之宏洙於四境宜陽曲逆之大固未必能然而耀能名鈞聲利殆智之鑿耳張君所羞道也新令尹至盍告之曰子善繼之國無小

灌陽縣志

卷之十 藝文

八

重建縣廳譙樓記

至正十七年

元張顯仁邑教諭

全湖南州灌陽其屬邑國朝混一來錫其地為開國元勳廣平王分地仍命位下入怯薛有牧民之資者授以是邑掌印之職兼勸農事為其親民而能達上下之情者也伯咬斤氏久住公乃廣平金閨之籍入怯薛侍衛且有日至正十二年春奉命監灌邑比至洮陽參政太守石侯遂謁奠廣平王祠祠在洮陽城北積年廢弛前居官者若罔聞知公惕然於懷有創修意太守嘉其忠厚不忘本及到任時四方搶攘適

周伯顏據春陵叛流劫縣治荼毒生靈官為調兵克復公夙夜思撫其人民平易其政寬賦簡役惟恐傷之人懷其惠先是鄉民有流移入廣聞風而願復者若凡幾家自是田野廣闢年穀順成休養生息民俗小康迺舉廢興故十三年冬修縣廳十五年春葺譙樓十六年春葺文廟建明倫堂塑先聖先師像冬十月朔三皇廟塑三皇聖像是舉也皆捐已俸鳩工掄材秋毫不擾於民民亦不知其役觀棟宇鼎新翬飛輪奐山川改觀風氣頓回老稚歌謠過客嘆羨公之

灌陽縣志

卷之十 藝文

九

治邑蓋善於政而敏於成功也昔韋恒令碭山而後人懷其惠何武為京兆而後人思其恩今公之恩惠在人心事蹟滿邊邑而聲名洋溢乎遐邇蓋與華山灌水同其悠久勸來招而垂後世固不偉歟邑之士民感念不忘屬予紀念為椽亦嘗親相其役辭不獲遂書於石

重建縣治記

宣德七年

明林

舉邑訓導

縣為百里人民聽政之所設官寘吏於其間自非廳宇壯麗廊廡端嚴則何懾以威儀俾民有所瞻仰哉

朝廷建立衙門官有堂吏有廡前有儀門後有公廨大小各有規制而不可缺焉宣德甲寅臘月既望適灌邑耆民李得聰等謁余而告曰灌陽隸湖廣風俗頗淳不幸洪武癸酉外境猺獠劫掠縣治燒燬譙樓既而大軍勦平乃改屬於廣右迄今四十餘年地方寧謐咸沾治化柰何邑堂久遠頽敝梁棟傾欹前後來為政者咸弗克治歲月愈深頽敝益甚宣德七年歲在壬子夏六月幸遇沔陽王侯偉膺命來宰斯邑每欲興修禮樂制度嘗自嘆曰琴堂之敝壞者吾躬

行之不速也學校賢才之不振吾提調之未至也制度之有缺者其譙樓之未復也三者之事在於目前苟不能以理之又何以利一邑之人而安於遠乎遂於八年冬十月農隙之時經營厥事鳩工集匠掄材於野甃瓦於陶自本月甲子之吉易梁換棟重葺公廨復建譙樓繼修幕廳學校數月之間煥然並舉視向之頽頹敝壞者今則如鳥斯革翬斯飛是皆王侯篤勸於民而能有成也願先生一言刻石以紀之俾傳之悠久而思不忘予聞之亦竊自謂忝處邑

庠以司訓職常賴大尹公之愷悌益以斯文之誼豈徒尚其空言而不記其實耶夫以王侯之能奚特以興修縣治復建譙樓外飭之容以徼虛譽歟其心必欲篤近而舉遠使百里之民各遂其家業安居而定食不有破屋敗廬凍餒之患以已任也媿余學識淺陋曷敢道其一二哉姑以民情衆志次言以記其興修之歲月俾後之來者登斯堂而覽斯紀又豈不以王侯為法而尤嘉意於斯邑哉詩曰蔽芾甘棠勿剪勿伐其此之謂歟於是乎記

灌陽縣志

卷之十 藝文

十一

重建大成殿記

建炎三年

宋熊詢縣令

灌陽為全之支邑在州西南踰百里不當郵傳顯塗山突然而大峭卓如簪水滲乎其清縈紆似帶木拔疑撓天石怪類躡虎清淑之氣多萃於此故士人衆多而賢肄業於學者蓋十數而未止也然其俗以耕耨為業不汲汲於營利齟齬之童皆善誦書雖負販者莫不能筆具字故民間而性淳事簡而訟少盜賊希有囹圄常空為令尉者督賦役之外遊無他適每至學評論古今較畧人物且聽其議善否以為已師

也往時學在縣東崇寧間以舍法養士謂其地道隘  
遂遷於西邑置丞乃以舊學易為廨宇自時厥後舍  
法丞職相繼而罷進士范昂乃請教廳仍復為學書  
齋講堂升處自適獨未有殿以居夫子像庭廡虛曠  
若非學校者余建炎改元之明年冬以漕檄姑置湘  
潭簿書權攝茲邑范侯以余舊嘗應詞賦舉朝晚過  
余以資講習余亦喜其勤嘗至於學聽其誦詠之聲  
若出金石觀其締繪之文如鋪繡錦愛玩無歎每至  
忘歸因謂范侯曰羽衣緇裳之流為觀與寺必雄建

殿堂嚴設像貌以崇奉其教非特務為觀美也且使  
人知欽畏而嚮懼罪福焉今有學而無殿夫子之像  
闕然未有所覩何以使人瞻仰是將為釋老羞范侯  
躩然而起曰吾徒居此皆羸糧而相從非資於官也  
舊學有殿請以餘資徙於此可乎余唯而諾之請助  
於後乃鳩工集徒不旬日而徙置焉輪奐一新丹碧  
相照聳動人之觀聽又命匠人重飭聖像繪羣弟子  
于壁間纁裳元衣秉圭端冕乃左乃右若趨若揖燦  
然可觀既成適當仲春上丁恭循舊制釋奠而奉安

之籩豆簠簋陳列于前觀者如堵後至無地跂踵而  
望以不獲覩為歎祀事云畢升堂而坐范侯領其徒  
進而請曰禮殿既成聖儀是設願得文以記其緒余  
應之曰論吾夫子之道如天焉不可階而升如日月  
焉不可得而踰仰高鑽堅瞻前在後不可以心期而  
智素無像也可也何以殿為然學非殿則學之制不顯  
殿非像則殿之名莫立像設而道寓于其中學者觀  
像目注心存殆將達其所以言與其所以行期底於  
道豈特嚮懼罪福而已哉范侯之心知所本矣請為

灌陽縣志

卷之十 藝文

十三

之記時建炎三年二月十五日也

重建儒學記

淳熙十年

宋 余元一 全郡教授

灌陽令趙君永始生之日躬謁 先聖覩其學庠陋  
湫隘愀然言曰是非為政者所當先耶武城絃歌風  
馨億齡吾雖不逮古人敢不盡心乎茲邑也介楚粵  
之間山拔而奇水清而駛魁奇秀異之民豈無生其  
間者獨未聞顯然見於世何也干越夷貊之子生而  
固聲長而異俗教使之然也文武之道未墜于地在  
人賢者識其大者不賢者識其小者今講肄無堂雖

有美玉不礪不錯非為政者之罪耶治之西廡土爽  
壇襟抱環密廼度廼營廼基廼築聞者相與觀焉有  
者儒曰此崇寧間之故址也後雖更徙不常而莫宜  
其地抑天將昌吾邑而留之以俟今乎趙君聞而益  
喜之縣之士相勵而趣成之財不賦而美工不召而  
集期月告成先聖之宮從祭之士貌像顯肅講道有  
堂棲士有舍門序庖廩無不畢備時淳熙九年十二  
月也夫庠序廢而不興為政者之責也庠序興而學  
不講為士者之責也趙君之為是舉也知為政之先

務矣士之學豈惟習陳腐以應有司程尺為利祿梯  
媒而已哉夫人之生與太極同體天地之心鬼神之神  
會五行之秀萬物之靈也故旦晝之枯亡而良心苗  
裔未嘗不發見去聖賢於千載之遠而方冊所存有  
默契而自得者秉彝在人未嘗泯也故曰學問之道  
無他求其放心而已矣放心求則良心存矣君臣父  
子兄弟夫婦朋友必思有以盡其分視聽言動洒掃  
應對進退必思有以循其則持敬以居之致知以精  
之二者不可偏廢也後之學者務外而不由內計利

而不明義文華之趨而操履之不顧記問之矜而大  
原之不究隨流而堙半塗而止非力不足也志不立  
也昔有問孟子以士何尚孟子告以尚志舜為法於  
天下可傳於後世我猶未免為鄉人也孟子之志蓋  
如是宛彼鳴鳩翰飛戾天源泉混混放於四海君子  
察於此可有志於學矣窮則獨善其身達則兼善天  
下窮達於我何加損哉元一既樂趙君之有成而望  
學者之有立於是乎言十年二月既望日郡文學莆  
陽余元一記

灌陽縣志

卷之十 藝文

十五

重修學門記

嘉定十  
六年

宋 陳德一 宜州  
勸農

灌陽為全湘壯邑地居郡之東南距城一百里而近  
按圖志於大業十三年夫子之廟於是始立焉今學  
乃三舍舊基其山來自八桂號曰臺山面古鍾源源  
上群峯森列參錯秀整左曰華山有舜廟前曰澗江  
江有禹祠又其前曰笏山西曰王樓山有望華巖有  
古城崗西向洮水水流揖學前有亭曰雩亭環亭皆  
江也洪濤沃日澄瀾際天蓋其亭登覽之勝士夫經  
從每疑嘆賞云嘉定辛巳冬邑令洪君若水佐張君



之才寔來時郡首蕭侯一致終更掇郡帑之贏十萬  
為興修學校計若大成殿進德堂齋舍廊廡悉已告  
備一日張君勾稽之暇來觀其成廼觀山水之奇因  
集邑庠諸生懿言曰灌陽縣建以來登春宮者五人  
自前己丑而後甲子凡再周獨間然無間開豈人才豐  
於昔而嗇於今耶意者地靈之秀未有所寓而人傑  
固間生歟且邑之風水與潭之湘鄉往往相類湘淳  
熙繇丙午改櫺星門向所朝水丁未大魁王公作焉  
諸生翕然辟席以敬受教遂以學門更向大江江水

灌陽縣志

卷之十藝文

十六

自鯉魚潭來朝幾十餘里以甲申元日鳩工以中夏  
朔旦新成門成諸生乃命邑士之秀者文其姓元其  
名以余丞清湘時嘗遊余門移書來曰願請先生文  
以記其實先生燕寢餘暇盍為諸生揮之以為一邑  
之重念灌邑諸生有志功名大喜張君期士子者不  
淺故不避荒陋拂拭而為之辭洪君婺源人張君長  
沙人蕭侯臨江新喻人今為春守云

重修儒學記

泰定四年

元全州趙文蔚  
路推官

欽惟推聖元之有天下以仁義立極詩書立教中外郡

邑悉皆有學所以育人材敦教化丕變民風城比戶  
可風之俗也全之屬縣灌陽廟學建自前宋暨丙子  
歸附迄今頽圯特甚至治癸亥東原董公來尹是邑  
下車首謁先聖周旋顧瞻殿堂廊廡傾摧朽蠹若弗  
能一朝居者廼歎息曰學宮之殘敝若是凡受命而  
守茲土者寧無愧責耶退而謀諸僚佐屬其耆宿及  
巨室之家勸分所積為營繕之資舉欣欣然曰賢令  
尹之念及此實邦人之幸也於是輸財獻粟惟恐其  
後乃鳩工僦傭廣闢舊基運陶桴材工役具舉命前

灌陽縣志

卷之十 藝文

十七

邑教何明遠董其事直學崔志遠領金穀出納學吏  
范湏司簿書程度公於退食之暇躬臨指授規制戒  
以不擾泰定乙丑七月壬子殿宇告成輦飛輪奐視  
舊宏麗及夫講授之堂課習之齋戟門櫺星皆易而  
新之向之耆庶咸喜而相告曰我侯之於學校殫慮  
竭誠其偉績之昭彰如是盍刻堅珉垂不朽宜也乃  
狀其巔末使來請記固辭不獲予慨茲灌之為邑介  
乎楚粵之交風俗彬彬雅其士討論於文學者居多良  
巾子矜秀穎咸篤志於濯磨也况又屬濂溪周子波

潤之所及乎使此邦之後進者益觀感而起從師鄉  
道正心誠意尋洙泗之源衍伊洛之派研精覃思講  
肄不倦異時將有過其邑則絃誦之聲藹聞問其俗  
孝弟忠信相尚詢其由則曰自董侯作新廟學敦崇  
儒術士風因而日茂也顧不韙歟遂樂為之記泰定  
四年歲次丁卯良月朔吉立

重修儒學記

元至正十七年

至聖五十四代孫

孔思坦

清湘山長

興文學於多務之秋淑人心於罹難之後此當時之  
急務而任守令者所宜究心也然嘗聞之武事用於

灌陽縣志

卷之十 藝文

十八

戡亂文教行於治平孰知人心之趨向由於教化之  
素明而學校之興乃所以固結人心之本其事似緩  
而實急灌陽為全屬邑值壬辰之變縣學廢焉至正  
十七年丁酉監縣公久住慨然以興復之責為己任  
致教諭張顯仁具其事言於郡郡嘉其請費不勞於  
民不斂於眾悉捐己俸市材鳩工程督以勒靡間朝  
夕是年三月壬辰建大成殿繼之明倫堂次及兩廡  
戟門櫺星門五月塑先聖四公像成顯仁以監縣公  
志用有成欲為文勒石以傳永久而思坦適遊學至

焉遂俾記其事於戲自淮漢兵興湖南諸郡相繼陷  
沒時真定石侯治於全大興學校以結人心故克保  
其民不變城池以固閭井以安文化以行風俗以厚  
當時宰屬邑如君者舉能知學校之為重不以其不  
切於所務而可緩也然昔時際承平民庶且富尚或  
廢弛矧今閔難四郊多壘峙乃貲糧求洙泗於瀟湘  
者或願咏歌於斯學者不其盛歟君號敬齋為人豈  
弟慈良有長者風嘗修縣署建譙樓既揭牌而隣寇  
息改思濟為順濟振坊名而四境安雨暘時若歲屢

灌陽縣志

卷之十 藝文

十九

豐登故能招復流民惠及隣邑其力行善政蓋出於  
天性而於建儒醫廟學尤加意焉

重修儒學題石

洪武元年

明袁誠仲

邑訓導

洪武元年知縣王友裕原吉縣丞蕭韶宗原聯至下  
車謁先聖見殿宇聖像雖備而展禮之地卑濕廼命  
匠伐石甃砌丹墀戟門廊廡新建明倫堂東西齋舍  
射圃墻垣并選師訓導生員靡不畢備為師生起蓋  
屋宇間架地基射圃四至丈尺敬刻於石

重修廟廡明倫堂記

正統二年

明張

綈邑教諭

正統以元之明年丁巳夏六月馬侯驥奉命來知灌  
陽事進謁夫子廟庭仰瞻聖像殿廡塵舊隳落無以  
壯觀瞻崇祀禮遂命工修飭之燁然改觀歲己未孟  
冬朔旦詣學課諸生而勸勵之載觀明倫堂暨兩齋  
舍湫隘卑陋且朽蠹阨剝垂就傾壓膳堂久廢會食  
無所射圃蓊蕪有難觀德與夫櫺星門墻同為壞垣  
俱多頽毀學前路卑濕不便往來大懼弗稱育才意  
旨欲更為之然役大費繁難以具舉盍亦急其所先  
而緩其所後乎是日遂定重建明倫堂之議計工聚  
灌陽縣志 卷之十 藝文 二十

材既備乃以臘月三日撤去舊伐其大木墾闢地基  
取土實學前路既地平路康而堂亦於是月二十三  
日建矣寬四大深二丈八尺高殺深三之一直正適  
宜輪奐俱美民不告勞帑不知費公私胥慶焉復於  
堂後闢地以舊堂材木而增益之為屋三楹以為膳  
堂比堂稍降復議聚材鼎新齋舍建櫺星門修射圃  
亭貨磚饒明倫堂伐石砌月臺紅墻與兩齋階級未  
果而初考瓜期及矣乃獻績之京正統八年冬來任  
一日語予曰吾向所欲為而未就者斯其時矣然吾

受百里安民之寄修學本以導民而反勞民吾不忍也計出安在予曰無已則有一焉制為短疏叩邑之有官君子賢達士庶莫各出貲以助庶其事有濟侯曰然遂親為之俾前太學生周思器卿<sup>彦</sup>全生員秦彝等往致其意於時前潮陽知縣何源致任松滋縣縣丞蔣賜靈山訓導蔣理任莒州判官蔣良者捐貲若干士庶陸衡敬等又若干由是百費孔具群能畢效遂大更新之凡為齋東西各四間高一丈四尺有奇仍取舊齋可用之材建為廚房二間於膳堂後復

於明倫堂下砌臺命生員唐綱取杏樹種之爰及百廢皆興向之所欲為者悉皆以次修舉未迄工以丁外艱去全郡司漁前徽縣教諭趙侯昂來攝縣事乃完其所未完就其所未就猗歟休哉蓋自興建以來未有盛於此時者也僉謂予掌教是庠知構興之顛末且與司訓吳先生俱有協相之功宜記歲月竊為廟學實政教之所自出新之所以導斯民也導民而勞乎民仁者不為是役之興不勞民力不費公帑而厥績有成可見侯治事有宜而愛民誠心足以感孚

於人也不謂之賢令可乎吾知由今而後師傅之教於茲士子之學於茲其功名事業昭著於時蓋將千百倍於昔矣侯之嘉惠於人寧有紀極耶人之感慕於侯豈有窮已哉侯字子良廣東河源人由鄉貢進士太學生試事通政司適駿有聲來為是邑其學問政事中外推先云董是役者耆士范子英呂宗源皆集勞可書出賢賢達悉著芳名於後庶傳永久而益有光焉

重修廟學記

成化二十三年

明陳

瑤全州人  
御史

灌陽縣志

卷之十 藝文

二十二

古昔王者之建國若民也教學為先學校之制至周為大備自辟雍類宮達之黨庠家塾無在無學故成人有德小子有造歷春秋叔季天下猶知有尊周之義者學校之教有以固結乎人心也自是以來上下數千百載間教則治否則亂載在簡冊昭然甚明我國家肇造區夏百有餘年惓惓以崇儒重道加之意而職守令者亦以克奉德意興學校者為賢也灌陽為全屬邑地僻民衆山水清竒甲於旁邑廟學據邑之陽尤專形勝士之遊其地者或以德行稱或以文

學著或以政事聞具於誌顯於時後先相望歷歲滋  
久雨鋤風銷日就頽圯成化甲辰冬淑浦劉侯麓來  
知邑事不期年政通人和邑用大治遂撤其故而更  
新之作大成殿六楹奉先聖以及四配十哲東西廡  
各十楹奉從祀之賢前作戟門又前作櫺星門皆六  
楹殿之後作明倫堂堂之前作日新時習二齋各六  
楹他若師生會饌之堂藏修之室暨凡倉庫庖厨射  
圃秩秩咸具又以卧碑及諸石刻樹立失次俱徙置  
於戟門之下况學門遷徙不常以故二十九年科第之

人矣今侯躬親相視徙於櫺星門左甃砌以石素而  
且堅經營之周密規制之偉麗以前未之有也司訓  
來陽陳公經既協相厥力復遣庠生周景來請書其  
成夫為政者以正風俗淑人心為要而風俗人心之  
所由善必在於興學校明先王之法為政不興學校  
不能善其道為政不明先王之法不能善其治學校  
之關係於世大矣若劉侯者其知敬重殆見異時閭  
巷絃歌孩提俎豆人人有士君子之風比屋有可封  
之俗可與成周比隆可為四方取則俾向之稱德行



著文學聞政事者不得專休於前未必不基劉侯作興之所致也矧是役也不費公帑不勞民力以底於成職此不可以無書謹為記之使刻石以垂諸永

重建廟學記

嘉靖二年

明蔣

冕

大學士

灌陽有縣自吳始得蜀零陵等四郡地遂分泉陵等十一縣統于零陵郡而灌陽居其一其詳載於晉書地理志荊州部下灌晉志作觀唐長孫無忌撰隋志其註湘源亦謂有觀水正與晉志相合蓋古字通用也灌自置縣至今千有餘年其隸全州為屬縣自石

灌陽縣志

卷之十 藝文

二十四

晋天福初至今垂六百年縣之有學在宋慶後桂林志謂建於隋大業十三年不知何據其始初於縣治之東崇寧中遷縣治西慧明寺右其後更復不常淳熙十年縣令趙君永始即崇寧故地建置廟學教授余元一記之嘉定間全州守蕭一致楊若先後修葺楊守又給田於學以養士學制既備自是士風民俗皆有可觀一時守令作興之功蓋有不可泯者歷元至我皇明學皆建於城外地既荒僻且規制卑隘無以仰稱累朝興學養賢之盛典又縣之南境與昭

州接其吉寧灌合二鄉舊自昭之忝城割而隸灌二  
鄉旁近恭城之蠻往往來肆剽劫學宮既居城外蠻  
來輒恣意踐躡殿堂焚圮荆榛彌望過者陋而弗睨  
乃嘉靖二年癸未廣西按察副使楊君必進行部至  
灌祇謁先聖畢周覽慨嘆倡議遷復謀於提學副  
使李君中且請於巡按監察御史汪君淵議皆克協  
爰檄知縣周應祿任其事以其年十二月十八日肇  
工廟自大成殿以至東西兩廡戟門櫺星門學自明  
倫堂以至左右二齋號房射圃及儒學門與夫庠庾

灌陽縣志

卷之十 藝文

二十五

庠福百爾咸備公館居其左縣治居其右高敞壯偉  
甲於鄰邑明年四月二十六日周令率師生釋奠於  
廟以竣事告適予得謝歸教諭黎獻太學生張鑑等  
詣予請曰願有記也諾之未果作周令又數來速之  
予聞淮夷病杞及鄆而魯為之懼興學崇化夷患始  
息故其詩曰既作泮宮淮夷攸服其獻馘獻囚之在  
泮且致其懷好音而獻琛於庭詩人頌之吾夫子取  
焉非無是事而有是詩也今嶺外諸蠻其獍獠狡悍  
未必過于淮夷而乃憑恃險阻頻來弗靖擾我疆場

戕我黎庶聖天子既後先簡命總理戎務重臣次第  
草薶而禽獮之區區公魔若灌之邊徼小醜猶疥癬  
之在手足間耳何敢伸螳臂以犯雷霆之威哉今日  
之歌頌聖明視魯人之於僖公蓋不啻逕度矣興學  
崇化以息夷患今豈異於古哉灌自肇新學宮以後  
凡學於斯者宜何如其用力耶孝弟忠信禮義廉耻  
以修其身頌詩讀書求師取友以窮事物之理二者  
交盡一遵乎朱子之教出而効用於時則隨所器使  
盡心職業俾國家生民有所倚賴潛而未用亦必謹

言慎行有所不為使宗族鄰里稱為一鄉善士或出  
或處而皆不失乎道義之正士風由是而盛民俗由  
是而美不但僅有可觀如在宋時而已可憲三君子  
所為惓惓焉求以祇承朝廷興學養賢之盛典意寧  
有外於此乎予故丁寧以為爾灌之士告其尚相與  
勉之以求無負焉可也斯學之遷非楊君慨然倡議  
且計處財費以給之功必不成而終始規畫備殫智  
慮又力助用度之不足者以迄於成則周令之力至  
於朝夕贊相黎諭之勞亦足錄云

重修儒學記

康熙二十四年

唐納牖

邑人知縣

考古者凡始立學必釋奠于先聖先師虞夏商周之時治教不分立學惟各祀其受命之祖自漢以後謂孔子道備百王教垂萬世命太學及郡邑皆崇祀之俾天下咸遵其教所以一道德而同風俗也吾邑學宮始創西關改遷重建蔣文定公記之詳矣惟時太平日久老幼不見兵革家絃戶誦人文蔚起迨經兵燹學宮鞠為茂草僅大成殿以聖像巋然獨存兩廡數椽卑陋尤甚諸賢牌位遺散無一存者雖屢奉

灌陽縣志

卷之十 藝文

二十七

修葺之令類多因陋就簡循為故事而已癸亥冬漂陽趙公以藩幕來署邑篆下車拜謁愾然思有以新之會新令至遂不果既而院司以趙公有幹才長于吏治特命復署灌事會廷議廣厲學宮檄郡邑官紳士庶捐修疏名以報趙公捐俸首倡詳委邑尉司朝常董其事晨夕監督凡匠石斲砌以及椽桷構櫨之細稍有敝壞者輒更易之改建兩廡高其垣墻飭其戶牖序置先賢先儒神位增飭名宦鄉賢二祠以及戟門墻屏丹雘黝堊煥然肅然度材估值稱事廩

工財無虛費役不勞民經始於甲子孟冬告竣於春  
仲時值上丁致祭趙公方奉文兼攝學篆宴集諸生  
核實典禮牲帛儀物悉遵舊制環橋門而觀者莫不  
悚然起敬嗟乎數十年來風雨不蔽烏屬鼠不除之區  
一旦棟宇維新宮墻峻肅以享以祀執事有恪非藉  
趙公毅然改作能若是乎夫文教之興關乎運會治  
化之盛兆於人文方今六詔逆氛盡掃八閩逋寇歸  
誠我 皇上右學上文特命儒臣輯經書直解刻頒  
天下且躬詣闕里親行釋奠正孔子之道大明孔子

之教大行之日也士君子幸生其時豈僅株守一經  
區區獵科名博青紫遂謂讀聖人之書遊聖人之門  
乎詩曰菁菁者莪在彼中陵蓋言養也又曰如圭如  
璧如取如攜蓋言教也藏焉修焉講習於詩書陶淑  
以禮樂篤行乎子臣弟友之道出所學可以黼黻皇  
猷守其道足以訓方型俗庶幾不負趙公振興文教  
之盛心趙公亦可藉手以對揚

聖天子廣厲學宮之休命矣落成屬牖一言記之牖  
推魯無文敬述修建始末併詳督修義助姓名於碑

陰以示勸云

鼎建學門記

康熙四十七年

陳廷藩  
邑教諭

灌學建於明代嘉靖癸未迄今一百八十餘年歷經修葺壯偉不替惟聖域賢關二門由櫺星門直出以達通衢氣散不聚且往來行人得窺內殿民間婚娶多有乘驕而過者禮法重地豈可聽其褻慢竊怪當日創建經營何忽乎此而後此者亦遂踵其成也康熙四十三年甲申冬予來視此學篆即欲更之艱於財用未果會戊子冬街遭回祿延及椽桷目擊其岌

灌陽縣志

卷之十 藝文

又二十八

岌乎將就頽圯乃不容已自捐俸資并鄉貯貲學數金集材鳩工擇是年十二月十八日改建於門之左右稍退丈許作東西兩向其原門之處則橫砌照墻以蔽之一以蓄堂氣一以遠褻越雖樸素無華而體制規模始覺完備是舉一百八十餘年之所忽者而足之從此

廟貌尊嚴人文蔚起當必有大過於前者是則予所踳而望之者也工竣後適鄉官王君維泰偶過予齋謂事屬創始不可不記爰述其顛末以俟後有所攷

云

增置學田記

崇禎七年

明盛興唐邑人知縣

今夫譚吏治者先學校則作養士類似非第二義矣  
第實政從實意而流未許徇名獵譽者可襲而居也  
今上六襪仲冬既望閩司參軍朱公來署余邑公台  
鼎世家才品卓越當道并竒之適灌之員特况試焉  
公視所司為熟路輕車游刃立解且素穢阿堵中物  
以故徵督吾民如負冬日平遣吾民若飲醇醪然灌  
故瘠土士生其間單寒者衆惟士無田莫飽半菽雖

灌陽縣志

卷之十 藝文

二十九

士之常亦士之厄也越明年公代兆將瓜宜委若傳  
舍廼下車謁先聖即與兩先生咨論學田一事作而  
嘆曰士固謀道而矯語貧賤然而沮志喪氣鮮不繇  
之典顧可少也歟哉第余閩司祿薄傾囊羞溢但為  
邑人之倡則可耳亟購民間得土名呂家洲田二十  
工估平價直捐金二十兩以易之并學博金公所置  
唐官屯田五十工歲計收租穀共貳百柒拾陸桶儲  
之學宮永為士糈脫非誠意篤摯者能若是乎又計  
為士病民叛弗善也於是總其賦之必輸者酌其租

而裁給之良法美意并存無害視昔之田在官而稅  
在民者天淵懸矣此非公之實意而流為實政者耶  
自茲以還寒士免吞紙囊螢之苦咸得專舉業而飲  
詩書逢時得志無愧科名皆我公栽培之澤也其裨  
益乎灌庠詎淺鮮哉大都公以品勝而才其餘緒獨  
善一鄉兼善天下此物此志不必問秩之專假與夫  
局之久近也公之義足以風矣語曰道路之口可當  
春秋然非壽之貞珉無以作和者機也請勒諸石暨  
之膠庠用垂不朽云公諱一元浙江山陰人時崇禎

灌陽縣志

卷之十 藝文

三十

七年甲戌也

四友堂記

淳祐庚戌年

宋江萬里

朝請大夫

灌陽令黃子成書抵予願有記於四友堂問其所為  
堂直縣治西偏屋纔三楹蓋子成以政之暇賦功慮  
材稍埃陋其以宣幽滯明意慮標之曰四友也問其  
所與友則儼立其前松其後桂其中央梅與令四也  
灌陽介道永昭桂之間遠地下邑風俗淳儉雖甚清  
省無事顧所以治之何如耳設有所不屑於此為躁  
為惰非慢不訾省即盛氣鋤斲之其下必且爭氣拂



鬱則有甚汗漫麤梗者矣雅聞子成靜撫之甚宜其  
邑人降心條理求事情審實實其便處不立節限遠  
邇爭委邑庭常空竟歲無留罰旦出視事不過食頃  
終日相對寂寂清露者玉雪者礫砢多節者環顧其  
中有足友者而後友之云耳予同子成生廬山之陽  
最與故極知其意氣悠然生事作業絕不營獨寒苦  
自課不一日輟業從其俗委心師友膾理灌輸踏省  
門未得第名其為武人偶失路誤入仕正與寒士等  
妻子遠不能致單車來臨栖栖羈旅殆衣服飲食不

如其私宮室起處不如吾廬乃皆安之無一不可東  
坡所謂不擇居而安安樂樂而喜從事是真足書者  
也雖然紆墨綬佩銅章後來繼令者予又將有以告  
之邑無小皆古子男邦君也湖廣之交見謂天遠小  
吏易有忽恣多以不能聰明材智者少其民必至設  
志豐大立名自造威福貪不畏人慮非願計彼益者  
三友正自義不受汙望望若將浼我強而附曰四友  
則不與之友矣友也者令之友桂友松若梅乎無亦  
桂松與梅求友於令而後為友乎子成名時今以為

忠訓郎淳祐庚戌仲冬之吉

長寧橋記

天順六年

明黃

紳邑教諭

灌陽千戶所距東不百步許市當四達居人輻聚每  
遇積雨則群流合出勢湧難泄溢泛街衢旁多衝激  
甚為未便况往來術者嘗謂其西望空曠地勢傾歆  
溝渠直注於風水欠關所知多嘗患之然亦因循未  
定其計今年春本所武畧將軍千戶陳侯銘獨知當  
務為急乃謀諸同寅及邑大夫輩曰街衢不便行者  
心惻風水有欠居者所慮茲欲鳩工作石成橋深溝

灌陽縣志

卷之十 藝文

三十二

高拱以通驟流上覆以亭且障且蔽以為風水便不  
亦可乎時僉曰善遂各樂捐已俸仍擇戶侯方均宗  
偕朝元觀道士張惟性遍募眾助其所費得錢若干  
緡得粟若干斛遂命工砌石二拱高五尺上重以石  
為夷衢東西廣二丈有奇南北廣一丈有奇橋之亭  
廣數楹覆以陶瓦不丹不斲樸素渾堅經始於天順  
六年四月十二日告成於本年九月二十九日規制  
壯嚴攻作鎮密甚為觀者嘆羨既落之頃且謂歲月  
不可不記遂屬予文以記之予善斯橋之建也其費

出於宦豪樂助而不費于下其工出于傭力而不勞  
乎衆其水得以無壅滄激剝而行者以便其地理得  
以成其所利而居者攸寧此其不徒為一人之益而  
實為千萬人之益不徒為一年之計而實為千萬年  
之計也稽之杜預之在晉嘗造河橋於富平津於橋  
成上從百官臨會舉盃勸預曰非卿此橋不建預曰  
非陛下聖明不成今觀是橋之建亦非陳侯方侯諸  
君子之經營不立非遇乎聖天子在上四海安寧治  
非晉比干戈不試任嘗多暇亦烏見成之若是之易

灌陽縣志

卷之十 藝文

三十三

耶雖然創始者固仁人君子之心而後之享其利者  
亦不可不念前人之志於歲月悠長之中脫少有損  
缺雅宜即續而修之俾愈久而愈新斯不負創始之  
計而為斯橋斯亭之大幸也所有樂助之芳名用刻  
于石碣之陰

德興橋記

景泰五年

明

王

利

靖府  
伴讀

灌陽縣治之北相去十里許有水曰臨源江正當驛  
路之要國初邑人蔣登甫砌石為兩厓架板為橋名  
曰登雲歲久圯壞雖有繼作徒勞民力而不禁久治

縣者亦因循莫之能振所以民病涉也聖天子厲精圖治親民之官務在遴選楚山潘公文浩授命來宰是邑公自下車積習之弊政以除更始之良規聿新政今既通民乃孚和問過其地目擊之愀不寧迺戒於衆曰橋梁之設責在於宰不可廢也為吾民者雖欲造作夫孰為之倡哉遂首捐已俸命其嗣廷器偕邑之善士陸衡敬輩若干人或輸以錢或薦以力協謀併智以任其事而公則提督焉於是招工伐石掄材揆日興作以畚以築以繩以削因其河之勢而甃

虹橋三拱高廣若干尺延袤若干丈覆以瓦亭若干間易其額曰德興橋誠以非公之德之所感於人烏能臻茲視昔之隨補隨潰者大有徑庭肆久遠之計大有可徵蓋始事於甲戌十月而訖功於乙亥二月也時太學上舍戴質歸省於家深重其事授簡語予曰昔隴西公作計川東西水門韓愈有記嚴大夫開興州江運柳宗元有述雖水門江運二君子嘗書之况我大尹公倡為斯橋利乎民有久遠不磨之計可無刻乎予故然之宜有所刻也洪惟朝廷混一區宇

太平無事而斯民遂休養生息之安若在唐虞三代  
之時矣灌陽為邑僻在廣西之隅號稱沃壤民物豐  
盛薄歛之外其樂固有餘且又重以大尹公而阜成  
之是以斯橋之作民用歡趨不勞而成自非大尹公  
有慈祥愷悌之德剝繁治<sub>劇</sub>戲之才亦孰能作為有如  
是之敏乎予無韓柳之筆力不敷以敷陳曠世之盛  
事于斯橋之上以永夫大尹公偉蹟於無窮臨文惴  
惴不勝歔然雖然斯橋也鬼神為之守護天地與之  
長存奚似<sub>俟</sub>於區區之筆而後遠譽也哉姑刻於石來  
者庶有考焉

重修馬渡橋序

康熙四十五年

單此藩邑令

縣治之北十里跨河而橋名曰馬渡其來舊矣自前  
任佟公重建而後迄今十載行旅相安今春忽遭暴  
雨連朝湍急瀾狂因塌其半揆厥當年創建工鉅費  
繁良非易易若不速加整葺第恐將來由漸而圯民  
之病涉有不可勝言者矣况係士庶經由之要地車  
馬往來之通衢與其舍現在之津梁何如計綢繆於  
未雨此平政者所以惓惓在念而不能去諸懷也茲

據鄉者劉懋學等以募序請予深喜而嘉與之特捐俸金以為修橋倡凡闔邑紳士以及四鄉人戶亦宜共勦厥事量力而行隨意樂輸無論椿梁灰石皆為有用之資即運力擔勞亦屬經營之助此通邑利涉攸關當乘時以鳩工庶一勞而永逸予且拭目以觀落成焉是為序

通濟橋記

康熙丙戌九月

單此藩邑令

環灌皆山也其層巒疊嶂洪濤澄瀾俱有可觀非必雲夢七澤武夷三山也予待罪於斯且一年矣自慚

灌陽縣志

卷之十 藝文

三十六

撫字無長催科政絀未暇與諸君子周覽灌邑山川之勝然而謁會城歷湘山經寒閱暑車騎往來舉目憑眺亦可見其大概矣茲距縣治之北十里許跨河而橋邑之通衢也籃輿鞍馬偃僕提携者絡繹而不絕昔名馬渡今更佟興蓋以前任佟侯為之董修也予方慕侯之遺愛為無窮無何春夏之交靈雨連旬橫淤汜濫而此橋衝決焉行道之人莫不咨嘆嗟息徒涉為患彼岸莫登予聞滋戚自維綿力不足以勝事且不欲以土石違農時也緬懷徒杠輿梁亦王政

之一事必待農畢而後舉此則何堪久待正在仰屋  
間適邑之紳士鄉耆等公呈願各捐資修砌乞予言  
以為引予忻然捐俸以為倡遂命工估料而士民等  
俱不吝橐金囊粟樂輸勦事不兩月而落成焉向之  
殘橋斷石徒涉興嗟者今則工石完固巍然煥然歌  
咏而過矣工既竣復請予為文勒石更名以垂不朽  
予以簿書鞅掌何能援筆為文且一橋細行亦無定  
述而况羅衆功以為己力乎乃循士民所請故不辭  
而為誌其樂善相成之雅名曰通濟非惟邑之人士  
有步履之安凡四方之賢士大夫遨遊至止者亦得  
停驂而曠覽焉未必非灌邑山川聚秀之小補云是  
為記

唐安橋

成化十五年

明鄧

綸 邑人知縣

縣之北六十里有支川西流合於灌水舊名唐灣灣  
之左右皆腴田有源自東來歲獲有秋右之田乃大  
覺之常住源流罔濟遇旱不獲洪武間處士唐以廉  
與大覺僧異泉輩相度其勢始架木規由左引水以  
灌溉之其道路襟帶乎舂陵全州間往來之人悉由

規以度每有臨深履薄之懼前人莫之為意而因循  
焉至於春夏水生規亦浮去行者填路耕者滿岸臨  
流浩嘆如隔霄漢一旦有行義之士唐氏子叔紀錦  
春者昕夕覩之深加憫恤乃謀于大覺老比丘一鑑  
曰唐灣之規歲架歲圮不惟妨于行而甚妨於耕吾  
不忍二者之患蓋為永遠之圖於是一鑑捐積所有  
以為倡既而蔣氏子繼栢唐叔綸錦洪錦旻湖適相  
附近忻然協從各出已資遍募於眾不吝揮金求工  
於大方伐石於近地甃為三門以導湍急其長若干

丈其廣若干丈其平如砥其形勢如虹霓之飲澗計  
所用之費百有餘緡經始於戊戌冬十月訖工於己  
亥春二月又從而安規於其旁耕者喜而行者悅也  
時予息肩於家有俟銓官唐錦軒同一鑑之徒志海  
乃以記來請且曰萬古之計一日而成旌善之言宜  
在于子辭而弗獲因謂之曰徒扛輿梁為政者之責  
尚能感時而成竟以免人於病涉今諸君率眾施財  
古所未甃之橋者今而成之古所難架之規者今而  
易之可謂一舉而兩得矣其用心之仁誠與天地相



為長久者諸君子豈以是要譽于人哉而利之所及者自有以來人之感激也若子若孫乘駟而過此橋者信有徵焉予也樂道人之善故不禁而書其成績用用為世勸云爾

會湘橋記

天順癸未年

明張

紱邑訓導

灌陽縣為全州壯邑之北距城六十里有溪一泓名曰會湘左則介乎全境右則接乎舂陵渡往來絡繹實茲邑之要道津也先于淳熙五年邑人范達鄧寧輩伐石為梁規模體制其前碑述之盡矣迄天順初

灌陽縣志

卷之十 藝文

三十九

年罹水冲激木石悉為之蕩隳矣厥後往來之人病於涉近因署縣事教諭黃君紳偕典史梁君禎命工架板暫利于濟人已感其惠矣歷癸未秋曲江龔侯俊承命來宰茲邑政急先務修百廢矚此慮非經久之計慨然以興復為己任越明年於政理之暇乃謀議於僚眾意者在於不傷財勞民而成厥功遂捐已俸若干為倡於時幸獲仗義鄉老陸衡敬往代其勞共同二三知事唐淑剛王產安等協力共董其事凡計所費有乏者既各捐貲以應之仍持短疏遍詣貴

官巨族之門勸耶貲給時而全守蔣侯順邑之守禦  
千戶陳侯銘暨凡諸士庶罔不嘉其盛事成出所藏  
以題於疏乃于是年十月大興厥工木石並舉下枕  
堅砌作三門以導其流上翼以亭覆陶瓦計一十有  
二間以障風雨凡<sup>袤</sup>若干凡廣七丈規模壯麗悉中  
矩度視舊大有徑庭矣於乙酉年二月匠工告成而  
陸氏具以事之顛末徵予為記予嘉而重之因曰橋  
利之興誠王政之一事也今斯橋之落成朝夕以濟  
民無病涉其為政之施也平其為澤之及也博而功

之貽斯世其不大且遠哉雖然人皆知功之在<sup>于</sup>橋  
而知其所以出於人捐貲出於衆而功在於衆也然  
微陸葦力成其事則衆之功無所歸焉事成于陸之  
葦而功固在於唐陸之葦也然非龔侯作念于先則  
陸葦之功無所自焉事兆于侯而功之在于侯似無  
疑而使非聖明在上擇賢之適宜又烏足以致侯之  
政化若是哉以是知功之不可專一人然後見其功  
之所以成也大矣昔晉杜預建河橋於富平津橋成  
上舉盃勸預非卿此橋不立預曰非陛下聖明不成

愚亦以是為今日頌言畢陸唐氏揖而謝曰謹奉奠  
登名於疏者悉勒於二碑其一誌於橋東其一誌於  
邑之儀門右庶幾傳之永久不忘

鹽田六小石橋記

明李高邑人御史

灌有源曰鹽田其內多山幹異派分疊出層見有阜  
而崇者有紆徐而遠者有屈曲縈迴若龍蛇之盤旋  
者有屹然而立若虎豹之蹲踞而駭人矚眺者有滾  
然瀉出若揚彭蠡之狂瀾而走洞庭之怒濤者有疾  
馳銳下若鼓函谷之兵於戰者又有清妍嫵媚若立

灌陽縣志

卷之十 藝文

四十一

西子而為之塗抹可人視者變態萬狀莫可究而溪  
澗隨之流瀑衝激與山迨合故有深以尋仞計者僅  
有以丈尺盡者道路經之既險且阻自鹽田屯抵兩  
江口溪澗凡六每春夏之變天澤頻澍則澗水四溢  
汗漫涵湧出者入者 騎而馳者徒涉者咸艱焉有  
涉而濡其首者有褰裳而睨者有立馬涯側而徬徨  
四顧者有老而羸稚而弱延旬月而不便往來者歲  
以為常也予家君川蕃公目擊而感慨之乃率婿彭  
君良卿姊李氏及先兄通嫂盛氏暨小姪輩相繼為

之募工伐石以弭厥艱險阻之區坦然如砥其費雖微其利溥哉惟一大溪每歲怒濤尤盛摧折古木混流而下其為力不易而有待焉此則予之責也因記之以為後人告

### 登瀛橋記

明雷震郡人郎中

橋名登瀛蓋自灌邑庠生蔣公謙登永樂十七年進士第晝錦榮歸遂名其橋橋在邑之南鄉上四保地名大坊晉陵蔣氏世家居馬路有溝渠道通西北一水發源於東南常因春漲夏滂奔騰澎湃過者病涉

昔人架木為橋即所謂徒杠成者是已柰何歲久屢更屢廢蓋由不用堅珉故耳去年之冬蔣進士後裔有曰存量曰毅曰存本因橋不堅於是議於眾曰是橋之建因吾家先祖登第而得名今雖歷年而是橋之名不泯吾輩能礎砌以石而為經久之計則前人建橋命名之義不亦彰彰然而明甚矣乎遂各捐已貲卜日鳩工鑿石于山就河運甃揣高低俛滿洩物土方以石圍之橋之上覆之以亭但木石工夫非一力所能為仍化鄉之達士隨其多寡而樂助之橋砌

於癸丑之冬十一月成於弘治甲寅之春二月由是  
堅固久遠雖往過來續如履坦途自無揭衣涉水之  
勞厥功可謂懋矣橋成之後一日郡掾蔣稱來徵予  
文以記之予惟陰德之積以濟人利物為先顧在人  
用心何如耳昔宋郊編竹以為橋以渡群蟻即獲狀  
元登第之報如以石為橋其用心之善不亦遠乎其  
濟人之功不尤大乎况蔣氏之先既登科甲以食陰  
德之報今其子孫尤能崇德繼志積功累仁惓惓以  
甃砌為心以便往來俾無傾溺之患殆見天心祐之

將來食報不惟降福瀼瀼而已後有高才疾足出而  
大題橋柱登科登第為卿為相以乘駟馬高車將與  
垂名於永久矣天豈負善哉予因其請以是為記仍  
將捨貲姓氏列於碑陰以示勸善之意云

復興橋記

正德二年

明陳昌期邑令

夫橋梁所以濟險阻通往來路道衝要不可一日廢  
也灌去城西南十里許有溪焉拔源於萬山間春夏  
漲溢秋冬涸而凡賢勞之馳驅商賈之貿遷置郵之  
傳遞與夫邑之耕者薪者咸于茲焉取道舊有既久

而圯憧憧者病焉予蒞政兩月掌史周君文中以告而縣帑枵然莫能倚辦爰各捐俸以為之倡於是致政驛宰萬信輩鄉之耆庶岑孔銘黃仲海周廷全王秉茂王秉時輩出貲樂助駢首繼至遂募良工掄美材礮堅石因舊址而新之拱其脊而狂湍遠轟壓之患亭其背而風雨無摧壞之虞斃其楹而行人有憩息之所崇一丈三尺廣如之修倍於廣之數堅鎮傑麗過舊遠甚復會其財之餘砌小橋二座於橋之東往來者若履平陸且相誇詫以為不多見也經始於

乙丑十一月丁卯二月役成周君文中請記於予曰成橋梁有司事也而循德輩乃能出已有以為助不

鼎建思柳亭記

明顧璘  
全州守

昔唐柳氏宗元謫永司馬篤好山水著奇文傳于世灌固永屬今年秋予以平賦至聞有柳子遺跡往尋弗驗不敢以傳會於戲已之或問曰子厚以文稱世其

所樹立闕於前乃修于後君何慕焉予曰否君子居是并思其賢者效之此尚友之道也子厚之治民於永無所見觀其所著捕蛇說惻然有仁者之心厥後為柳州刺史果多惠政其民頌德至今洋洋不已非賢而能若是乎璘朴蹇寡陋不足以進于文負罪明時賜之大郡又無所裨於其下雖後柳公百倍者吾猶師之况賢者乎君子尚行匪貴言也學宮之西江流澄滙有巖穹然面流背阜而後隙地可亭乃構數椽以籠取其勝題曰思柳用終前好云贊成守禦千

戶劉表蘇文王勝引予至其地者教諭榻鳳章也

重修慧明寺記

景泰癸酉年

明張

圭

邑教諭

環灌皆山也其縣南峯巒秀麗尤最而慧明寺出城西半里許上學官而下民居面華山而挹灌水餘山羅列左盤而右距接九疑跨水道高不知其幾千萬疊其水縈旋北折而東注會三湖入湖海遙不知其幾千萬里寺之所奠形勝如此可謂壯矣是寺也其來甚遠稽諸記載先夫李唐之創始暨元至治而重修今去至治又百有四十餘紀寺名雖存其舊物漸

壞繼修者誰僧會志仁義天也志仁出家名義天其別  
號灌陽昭義王家子先大覺寺僧也生不味葷酒自  
幼落髮領牒時年方十六其住持慧明寺以千戶蘇  
公忠舉也後官僧會司又衆所薦也自入慧明寺約  
十餘載靜則面壁端坐動則思緝道場昔之所未有  
舊之所未更者皆力為之多方善化以克九厥費乃首  
建無量壽佛殿次修東西廊廡外大山門諸佛天王  
及勅賜慧明寺匾額皆極莊嚴事在正統癸亥踰乙  
丑三載間也其詣北京萬壽戒壇禮欽依宗師月溪

受戒得傳衣鉢南還之日則己巳歲也仰瞻大殿穹  
簷甍落梁棟椽題螽剝日侵羅漢像座影壁多蟲鼠  
穴慨然嘆曰若俟其極而後行是用力巨矣肆景泰  
改元庚午春援疏果行不顧勞瘁周灌陽之地屆鄰  
封之鄉無門不登於是宰尹將士以下人人罄喜  
發囊多者施錢倍千而萬約者或施半千而百時歲  
癸酉乃計丈數揣高低量費用卜日定方集材鳩工  
革故鼎新進堅易朽其故物之美者雖細必存惡者  
雖大必退冬十月一月己巳工乃告成又構法堂廣



月臺通梵羅漢座位恭奉聖壽龍金亭字牌位而百治  
俱備縣令黃梅潘公朔旦謁神於茲不一視功就許  
立石垂久遂具其事之始末徵文以勒焉咨夫寺創  
始於唐李經世歷年震風凌雨詎得不朽而常新哉  
是在更革之有其人耳志仁秉心堅貞智德可尚以  
緝寧寺事為心今則衆務舉百廢興內外修巨細備  
前佛有殿萬歲有牌諸佛有像中有法堂東西有廊  
左右有房外而山門門表有額下而道路路旁有植  
一規一模盡善盡美整然一新燦然可觀不惟奉佛

參禪之有所而文武臣僚祝聖拜舞有其位矣祈  
晴禱雨演法誦經有其處矣行脚遊僧遠方而來又  
不患無其托矣至于來遊來觀者又大有竦其瞻仰  
侈其心目脫其塵想而興起善心焉彼其用心實勞  
而成功亦大矣是故由至治而來微志仁孰興寺門  
之盛志仁而後微茲石又殊知何人之功哉抑佛之  
教言浮吾言道外吾道非吾所知也惟其形勝山水  
可取興修歲月可述予得而記之

重修大覺寺記

元貞元年

元唐堯佐

全州司講

太極肇分天位乎上地位乎下人居乎中而為天地之心也鴻荒既遠所以為天地立心為生民立命為萬世開太平者吾道之功用也羲皇數聖人以是傳堯舜禹湯文武畢稷契伊傳周召世至春秋網淪法數字宙晦冥如混沌未分人文未著則有夫子德合太極再造乾坤然後往聖人之絕學可繼而三綱九法得不泯焉及兩漢而老氏之教興焉至東都而釋氏之教行焉於是三教鼎立相與天地相為長久宗老氏者謂之道道有觀宗釋氏者謂之僧僧有寺猶

儒之宗孔氏而有學也觀與寺又皆有三清如來殿亦猶儒學之有大成殿也昭義大覺寺舊名潢潭創於湘源未郡之先而勅賜今額實在宋德龍興治平之際如來殿興一寺之規模至熙寧壬子乃大備遂為灌陽二十五寺之甲至紹興重修迄今元貞乙未垂百六十七載中間淳祐景定以來興廢繼絕則有如超公長者焉至元戊子以來喫緊葺立則有如寶院公主春焉獨如來殿將遂頽圮而工博浩大非一木可支一力可成茫然無緒其徒弟行忠顧瞻咨

嗟失今不圖後至愈大吾為佛弟子寧不愧乎此念  
一啓俄市溪蔣公宗海上殿仰觀梁記所謂蔣公道  
安者實其祖喟然嘆曰殿中佛像吾家功德也諸公  
既揮金而新之矣吾為人子者又安可以時艱力匱  
而忘我祖之德哉歸而謀諸弟姪曰吾老矣不忘吾  
祖願揮中統鈔一錠為之倡三公尚念祖烈其出此  
數可乎咸曰諾遂得鈔一百兩米二石為起首之資  
行忠感之勉盡心力德惠蔣少淵勸緣而十方毗耶  
長者悉來助以七月戊申下工八月初十壬子起注

至一陽而告成忽踵門謂予曰三教雖不同亦各言  
其師也行忠不忘其師有志於斯殿而屈於力之不  
瞻幸而蔣宗海弟姪不忘其祖十方善姓又不忘同  
趨於善卒之有成就有願克滿使大覺洪基與天  
地相為終始誰之賜也今將勒石以造無窮而師曾  
祖張公闍黎君之叔也君其念之願有述焉予嘉其  
志告曰如來殿不修僧之責也大成殿不修非士之  
責乎王通氏曰吾於夫子受罔極之恩今有出自先  
聖之門委學校如傳舍日擊聖殿如廢祠視行忠有

覩面目否乎方今旦望必令儒生諸殿祝聖特不啻  
老釋弟子吾徒儒者所願學者孔氏所期望者為天  
地立心為生民立命為萬世開太平乃不知二氏弟  
子之不忘其師其可乎行忠墨者也而行則儒是可  
書也安得不表其志以為儒之不如墨者愧亦以為  
蔣之不忘其祖者勸

朝元觀記成化二  
十四年

明譚如春邑儒  
學傳

考邑志朝元觀創於洪武之初歷年既遠或興或廢  
難以枚舉正統年間市民周思器張道真同本觀道

士張漢清崇建殿宇塑繪神像敬粧萬壽龍牌至成  
化間風雨震蕩漸乏修理殿宇傾頽時道士熊震童  
化緣施工捐世拂果至乙巳孟冬適縣令劉侯來宰  
是邑越三日辨香展誠至觀一觀則傾危尤甚顧千  
兵蘇陳輩慨然嘆曰斯觀之廢神無所棲人安所妥  
且灌陽圖之西南萬山環拱民徭錯處諸公職司茲  
土乎惠生靈必托神以默相今觀之廢如此昌各節  
俸修葺眾皆曰然遂議道士周元震持疏叩邑之官  
達軍民各助以共成之殿宇煥然神容燦若金碧輝

煌以安神靈以祝聖壽以資生民之福是則劉侯之  
盛心也元震具修舉始末囑為記刻諸堅珉以昭令  
尹暨千兵倡修之功以及施資姓氏用垂永久劉侯  
名麓字國器湖廣淑浦人由太學生知灌陽縣事乃  
前大尹仕達之姪也

創建迴龍庵記

在縣北  
三里

明李

高邑人

灌陽為湘南右臂邑據江山瓌麗之間治之北三里  
有水曰龍川過川北去而諸峯之競麗尤甚眾峯之  
隈有岡躍然如驚虬游龍勢雄偉甚予友王君道生

灌陽縣志

卷之四

藝文

五十一

之先塋適窅其吉左右二岡疾趨來拱揖環抱之群  
岡又緝緝糾結蓋風氣之鍾也自塋右去北百餘步  
許抵兩岡之隈爽然以明煦然以溫出泉一泓甚清  
冽蓋天造地藏有仙風道氣然正德之五年庚午春  
臨濟道人圓玉來方上拜王君之先塋而喜得其地  
之勝懇址誅茅廬焉戒行清苦邑人駭以信向越歲  
丙子全州守吳郡顧東橋華玉來行縣踪跡柳子之  
遺眷岡下憇道人廬矚峯嵐之佳致特勝道人又清  
苦將之謂故千騎劉表宜創庵與居道人得大人君

子之賞鑒也募勸諸姓易以椽楹不二三年為屋若干楹完旃檀之像具優曇之器有灌北諸峯之勝翼然為香火道場道人方且甃泉以汲引水以田怡然以待老子凡兩度拜王君之塋因遊焉丹黝輝映輪困出藜第間若祥雲彩霞重為之慨以嘆世固有六經之敗簡敝之焉以終蓋優游苟且之志多故卒竹以無成也道人清苦一節已懇懇而人與之盤旋荒茅斷巖間卒自建立如是夫人亦為之而已母道人愧也庵始創於正德丙子落成於次歲丁丑道人號

圓玉俗姓王兀兀有戒行人尤重之既畢事磨石鐫擅越之姓氏予為之記如此

西竹庵記

康熙四  
十三年

王之驊

邑人  
教諭

嘗聞我佛度世惟在慈悲大眾信心即能證佛然必佛土淨而後心土淨道場編而後慈雲編也如灌之慧明福慶諸道場建自古昔巍峩閎麗闔邑瞻禮為邑慈航尚矣溯洄而上則窮鄉僻壤聾無鐘鼓惟白沙曲岸有芭芒田者乃先大人手置山莊也田皆石田地盡斥鹵廢明以來蓁莽荒穢順治十四年歲在

丁酉有僧行修住錫其隈攘剔所至江山列秀啓闢  
所經黍稻薦馨結茅為庵昕夕經懺先大人喜之聞  
之前任邑侯薛公煥匾其額曰西竹庵後有參仰者  
繼而修之閱十年又值變亂復為荒廢茲有自縈者  
請葺其址予愀然曰夫民神之主也今連失其稔室  
多懸磬柰何衲曰是乃諸信善意也衲來數月諸信  
善會集瞻禮欣忭翔洽生大歡喜因憫其烏兔穿梁  
金風颭榻共發慈悲願築垣堵未幾而工竣復請予  
以記之予曰噫是即所謂信心之妙因也子能信心

即感諸大檀越若大眾信心未有不共證佛果者也  
將見心土淨而佛土臻道場肇而慈雲編又何慮歲  
之不登俗鮮仁壽耶聞藐姑射之山有神人焉吸風  
飲露乘雲氣御飛龍而游乎四海之外其神若凝使  
物不疵癘而年穀熟大浸稽天而不溺大旱金石流  
土山焦而不熱是其塵垢秕糠猶將陶鑄堯舜者也  
子其旦暮遇之乎遂書之以為信心者勸

朝陽庵記

王之驛 邑人

常住猶長著也長著者何為止觀也止能捨樂故能

修心觀能離苦故能修慧然非藉膳膳於常住不可王  
半山云何如直截踢倒軍持盈取為山蓋謂勿事行  
脚僧不離山乃能持此止觀為無上法寶以演無上  
妙法也然而難言之蓋時有未至法寶未逢焉能宏  
啓道場瞻厥常住哉故朝陽一庵自昔明季買地建  
刹予祖安庶公獨叛於前迨本朝初年予父殿九  
公繼建于後當時雖有一二者鬣以常住未瞻衣鉢  
隨身譬如飛鳥嗚呼住既不常長着云乎哉今得曇  
印師為之住持雖不敢遽謂法寶在是但見其氣尚

容寂無念無營上為當事所推許下為士庶所信  
孚俱各現在披誠或捐資豎造或喜捨田山遂爾常  
住有資興建日廣是常住因曇師而啟則止觀亦將  
即曇師而驗良非偶也將見浩劫巍我法眾群普其  
道場永肇表揚當事者固自有在而常住之田與  
山出於某某之捐置功德盛勝宜先誌焉以垂永久  
乃為立石以記之吁昔龍湖問山先感止乾住陳之  
囑曹溪行派預承嘗水開地之功否則道場未啓常  
住無瞻法寶難逢勝會烏覩嗟夫予祖與予父往矣



予特於曇師深致意焉異其珍重自持以持此止觀云爾

重建貞烈陸氏碑記

康熙四十五年

單此藩邑令

竊以盛世有褒崇之典首重堅貞熙朝端風化之由必先節烈雖云中帼不異鬚眉粵稽故介賓文樞之妻陸氏靈鍾望族天篤純貞幼習端莊僉謂幽閑第一長嫻閭教咸推敬順無雙司中饋以案齊眉無慚德曜却鉛華而全嬭道克紹桓君不謂當顛沛之秋遽爾矢冰清之節可知守貞有素方能視死如歸避

灌陽縣志

卷之十 藝文

五十五

賊而身隕丹崖陳仲妻後先媲美捐軀而名傳青史王貞嬭今古流芳樹閨閣之風標吐乾坤之正氣埋香塋玉鬼神之守護森嚴繞栢環松樵牧之侵漁凜戒本縣職司民牧愧無入告之權心仰芳徽薄效採風之錄爰織蕪詞用旌烈範祭田再設聿增俎豆之光碑記重宣丕煥林泉之色從此清風明月常安窀穸之魂將來春露秋霜永享蒸嘗之祀一碑允勒萬古長垂未盡表揚之章聊作闡幽之意云爾是為記

苦節陸氏孺人傳

唐宜甲

陸氏孺人乃大車田彥傑公女也生明萬曆戊午年  
十七未字適土溪原任遷江教諭文治公之父諱王  
旦公絃斷遂續焉及歸舅姑業見背而其御內接外  
皆孺人是任真有鄭盧陶柳遺風至十九歲巽一索  
越五年而王旦公赴玉樓召矣當是時孺人年纔廿  
四且未獲弄璋即有前室子治又甫八歲將柰何有  
勸其<sup>其</sup>他適者孺人曰寧死不願吾雖子未育<sup>育</sup>前室子  
即子也子雖幼及長或可亢宗吾亦終身焉倚之奚  
他適為嗣是矢栢舟延師課子歷廿餘載辛勤<sup>勤</sup>子果

秉鐸遷江斯誠愜孺人願孺人將藉以終身矣無何  
未兩年子捐館舍婦亦相繼而亡孺人處此又柰何  
然猶幸有兩幼孫在孺人含弄之而嫠守焉此亦不  
幸中之幸也乃未幾兩幼孫又皆修文地下哀哉孺  
人苦斯極矣惡乎賴已而孺人謀諸族人爰撫一孫  
名振泗以為後循是以往又歷廿餘載辛勤<sup>勤</sup>砥厥孫  
振泗公於有成遂於康熙甲戌棄世矣迄今家道昌  
元曾玉立有曾孫 惠補弟子員人僉曰此皆孺人  
冰搯之報也壽筭七旬有七孀居五十餘年於康熙

癸亥

皇恩旌表節婦衆咸舉之以邀旌獎但孺人自謂予命薄何敢膺此榮褒因辭焉是以空餘此苦節于天壤間嗟嗟以幼女而繼人室人所苦也為繼室而無親嗣且哭文之三世尤人所苦也且夫子兩世之事以一身為之而節搯又多歷年所其苦更何如耶令當日夫沒而子存其節未為苦矣即夫歿子歿而孫存其節亦未為苦矣即夫若子子若孫俱歿而嫠居未久則其節雖苦人又孰諒之而舉之惟如此備歷

灌陽縣志

卷之十

藝文

五十七

諸艱而又年將耄耄夫然後孺人之節全名亦全也即較之古來之烈女節婦寧少遜乎孺人洵苦節矣乎雖然孺人之事原有鄉評初無俟余言之瑣瑣然余忝孺人之至戚其得諸所聞所見者詳且悉今特慮其事之湮沒無稱也爰效闡幽之意執筆而表彰之

賦

平賦賦

明顧璘

肅吾駕以晨征兮首龍川之綴邑涉湘流之浩洋兮  
度雷嶺之萃嶽慄天地之既秋兮氣愀感而颼栗行  
原野之迫仄兮顧物情而增息峽憑雲而下注兮波  
聲砰其若雷巨石礮砢以軒壯兮劃壁斷而中開木  
幽陰而虬鬱兮仰不見白日之輝射虎伺人而卒發  
兮猩孤立而旁咤猿猱失步於窞檻兮嗚嗚而夜  
哀亦有怪鳥不知其名兮忽投人而下來嗟予生之

灌陽縣志

卷之十 藝文

五十八

扼塞兮蹈畏途其猶未已脫梁宋之戈矛兮又南尋  
乎魑魅睇夔龍之克庭兮予獨何為乎荒裔陽春豈  
其遺照兮實狂夫之自取託巫咸以三占兮又謂吾  
行為近是苟大道其在斯兮抑何憚乎虎尾皇恩沛  
其雨露兮侈專城而揚蓋雖九死其何以報兮誓捐  
軀以逭罪念仁者之多憫兮囿萬物而無外矧茲邑  
之有屬兮夫孰忍其凋瘵展圖版以料其民兮悼十  
室而九亡失慈母之摩煦兮毒蠱螫而肌瘡矧口賦  
之日增兮蹄涔豈勝其庠量猥獯伏莽而獸擾兮墮

臂困於拒攘雖茲歲之穎粟兮其猶未冀於蓄藏吾  
將剔蕪政之汗穢兮揚糠粃而棄之三賦之盈胸兮  
裒贅疣而益虧鑽巨蠹以榮植兮發蒙蓋而風滋倘  
尺寸之可裨兮詎昔夫終夜而營思評群疾之聚體  
兮豈一一之能治矧拙臂之短用兮非三折而成醫  
服孟氏之格言兮求芻牧云已疲歸牛羊而東返兮  
將與世路乎長辭

詩

宿灌陽灘

唐戴叔倫經畧使

十月江邊蘆葉飛灌陽灘冷上舟遲今朝來遇高風  
便還與沙鷗宿上湄

花石巖

唐柳子厚郡司馬

憶昨籌戎事不同曾聞燕集此巖中軍聲孰與水聲  
勝虜勢難爭山勢雄芋畧縱能親朗日安全還記暮  
遺風我來忽動晏安志為拂蒼崖記雋功

昭義驛

宋朱子恭州守

灌陽縣志

卷之十 藝文

六十

霜林紅葉襯桐花路轉崖根百尺斜霽日斷雲成徙  
倚湘南秋盡未還家

遊通真巖

宋徐大著判簿

官事癡兒無了日賞心底事莫相違試沿溪足臨清  
淺復旁山腰入翠微突兀階梯登石陞玲瓏戶牖歎  
巖扉塵埃作吏渠應笑更與從容待月歸

遊通真巖

明劉麓邑令

政暇追遊到水隈水隈一竅豁然開看來彷彿桃源  
景只少桃花洞口栽

遊通真巖擬作思柳亭

明顧璘州守

蕩舟緣西溪風物如虛爽忽得通真巖眾喜得奇賞  
石壁倒千仞洪濤漱中廣通天貫靈竅雲氣恣來往  
玉髓墮陰滴蓮花抱煙長居然神仙窟所愧繫塵鞅  
緬懷柳愚溪千載記幽想其人雖已歿精華尚星朗  
願言作新亭延此煙月黨今古兩悠悠江波日東響

華山舜帝廟

顧璘

隱隱蒼梧映郭門滔滔江水抱山根群峯獨捧重華  
廟大地誰云五嶽尊雲暗九疑迷葬處月明孤竹見

灌陽縣志

卷之十 藝文

六十一

啼痕長將澗藻修寅祀願就琴薰與德溫

仙源洞

顧璘

柳侯昔放逐頗好山水事觀其著文詞動以喻來世  
逮今歲月改陵谷莽遷異我行徂灌川聞有招隱地  
懷賢慰遐想吊古動幽意塵館休吏衙秋原散遊騎  
度嶺疲登頓涉沙苦沾漬空潭激哀流古木隨餘翠  
窮搜盡陽景屢剔斷碑字豈無會心觀往往悖圖志  
興盡且須返聊以展同致

以上二首全  
州志作李遷

又

顧璘

曲坂凌虛度七盤仙源何處問三韓溪門古木蒼雲  
濕澗道疎花白雪寒短髮愧從愁裏老青山疑在夢  
中看還誇野興秋難禁莫怪巖陰日易殘

題蔣道人故棲石

顧璘

水曲桃花暗靈巖信有仙蟲書留古洞鶴駕去何年  
白犬眠金竈蒼龍飲玉泉愧非稽叔夜來此竟空旋

出峽

顧璘

群峯高束灌江流雪浪清秋洒客舟古木倒垂雲上  
下亂灘交瀉石沉浮猖狂阮籍窮途哭浩蕩王陽渡

灌陽縣志

卷之十 藝文

六十二

坂愁料乏雲臺酬馬革願攜霜鬢老狐丘

放生潭

明龍澄 僉憲

石潭潭上達鬢宮隔斷紅塵遠市風波映龍鱗清見  
底秋明月渚碧涵空杏壇涼入琴書潤芹沼流凝蜃  
氣通士友觀瀾窮道體盈科漸進莫停功

文峯潭即放生潭

明劉台 提學副使

數峯高聳逼文星潭底蛟龍睡未醒我為品題龍亦  
喜便看突起駕風霆

公館留題

明陳宗德 按察副使



六年踪跡不曾停  
冒走風塵每見星  
按節敢辭灘路  
惡好山隨入灌陽  
青竹籬茅舍千門  
月石徑溪橋幾  
處亭但得容身長  
是健瘴鄉雖久不  
妨經

公館留題

明劉台提學副使

灌陽風景似仙家  
十里藩籬總是花  
水自洞中梳石  
髮風從叢裏摘蜂  
衙槎牙樹古皮皴  
溜翠嶺峯竒頂  
月霞最是地靈人  
傑處愧無椽筆付  
籠紗

公館次劉韻

明沈尚經州守

容裏相過即是家  
阿誰栽得滿城花  
雲開疊嶂春橫

灌陽縣志

卷之十 藝文

六十三

幃縣僻常年午放  
衙簷溜可堪心苦  
雨村沽那得面  
烘霞蠻荒三月寒  
如許却道征衣錯  
帶紗

月岡公館

明劉梅國提學

稅溪亭子面溪開  
四處青山點翠苔  
小坐亭臺無箇  
事清風明月甚幽  
哉

前題

明姚東泉提學

叱馭朝登峽停驂  
夜傍營郊迎來洞  
客庭拜謁書生  
雨帶溪聲急雲連  
樹影橫未須巖擊  
拆此地久無兵

平賦詩

顧璘

累歲倦行役茲晨仍灌川路危纏嶺脊草盛隱人肩  
逐客窮愁日荒村大有年不才寬罪遣何以報皇天

又

顧璘

我聞皇<sup>黃</sup>虞民罔識官師名老翁披素髮壤歌如孩嬰  
季氏廣法令民心始忡懔馬牛急租稅鷄犬紛鬪爭  
茲邑苦窮僻曾獻紓荒城謂去華胥國頗遂桃源耕  
咨諏速幽隱轉痛閭閻情山深吏治猛里胥日縱橫  
執執不以灌煎膏難及明府帖增新役賦籍何由平  
水枯網罟亂孰使魚不驚投筆坐長嘆淚下霑綾纓

灌陽縣志

卷之十 藝文

六十四

種桑曲十章

牛兆捷邑令

救窮無藥羨天孫織錦光華歲惠存指點金絲丹不  
遠仙農陌上是靈根

枝枝樹樹掛絲羅萬樣經綸未足多叢雜荆榛來白  
眼秋空黃葉歲蹉跎

圖王定霸倚君材衣被蒼生計日來六筐星暗無人  
採冷落江皋伴綠苔

漢天管樂寓隆中八百桑株無曠工治國如家香火  
遍零陵漢郡意神馮

載績朱陽公子裳條桑贊月預玄黃環河函魏同流  
遠十畝間間願作行

史遷貨殖傳瀰漫鹽鐵機絲比例看煮鑄有官山海  
貢桑麻無罰情游難

村竒富國績間投恨不成行抱子愁摘用浮沉沉實  
好布畦千種出平疇

甚供鳩食大無聊食肉遺元怨滿條早洗穢清君子  
長竒材無數映崧喬

樂親戕斧到如今枯槁形同不易心間歲發榮資給

灌陽縣志

卷之十 藝文

六十五

遠材成端借刻核深

牽牛伴讀老農夫政學親民襦褲無先覺空桑含愧  
甚難言被世有竒謨

種桑歌八首遺其二

牛兆掟

灌民貧因桑少有田有地不種桑止收田禾那是好  
灌民貧因桑少無田無地不種桑赤手空拳那是好  
灌民貧因桑少種桑一畝可完公十畝五畝家成寶  
勸吾民學種桑種桑不費田和地屋基沙嶺皆生意  
勸吾民學種桑種桑不費人和工老人婦女皆經營

勸吾民學種桑種桑不費日和月一時經理三年業

遊九龍巖

明黎獻諭邑教

人間何處訪仙踪策馬追尋興正穠皂卒每為山路  
引瑞雲長把洞門封隆中還未來昭烈晴彩曾因點  
葉公莫謂蒼生霖雨少九龍猶在石巖中

華山雪霽

明龍澄僉憲

積雪初消見華山端巖有路可躋攀暖回陰壑冰皆  
釋流引寒泉落碧灣

前題

明劉箎邑令

灌陽縣志 卷之十 藝文

六十六

華山雪霽見山巔峭壁懸崖勢挿天欲呼神祠愁突  
兀人言有路可攀援

前題

明王州邑人  
中書

玉液琉璃日在山金鰲銀海許誰攀詩人只恐梅花  
瘦踏遍華陽個個灣

前題

陳廷藩諭邑教

三冬雪蓋巧於春妝點華山燦似銀暝色未開先凜  
冽曉煙初散更紛綸寰中瓊閣來天上平地蜃樓出  
海濱信是豐年農有兆光輝還映讀書人

華山雪霽

唐宜甲邑孝廉

華山輝媚直如綃瑞雪平鋪美更賒最愛風和催玉  
樹復欣日暖燦瓊花光聯銀漢天邊色影射姚君廟  
頂霞此景明明高洛浦閉門僵臥幾人家

前題

王維嶽邑明經

曾聞積雪艷我嶺華頂青輝足並奇匝地同雲初散  
後行天化日正臨時影浮銀漢明湘水色借蟾光映  
薄帷對此聰明渾欲淨玉山朗朗豁襟期

三峯煙雨

明龍澄

灌陽縣志

卷之十 藝文

六十七

濛濛煙雨蔽三峯迷樹漫空翠且重風起雲開飛散  
處依然秀削玉芙蓉

前題

明劉麓

望外三峯入品題年來煙雨苦濛迷有時雨散煙收  
後秀挿晴空孰與齊

前題

明王州邑人中書

遙從雲外落危峯抹雨塗煙氣象重煙淨天然去雕  
筋雨餘秋水出芙蓉

三峯煙雨

陳廷藩

三峯削出瞰平田不俟村村社鼓籟風約半山飄素  
練雲籠絕頂降清泉名亭曾誌東坡喜膏黍常思名  
伯賢試上高樓舒遠望耦耕饁餉各紛然

前題

王之驥

邑庠生

縹緲三峯拔地起蜿蜒磅礴幾千里南聯五嶺北衡  
廬巨靈畫疆奠厥址簇簇芙蓉侵九霄日輪月馭纏  
山腰鍾竒毓秀知何限竹箭丹砂與鳳毛我家開戶  
當山面青眼相看兩不倦秋月春花互勸酬襲人爽  
氣有餘善無端密雨雜煙來巒壑濛濛散劫灰失却

灌陽縣志

卷之十 藝文

六十八

三峯真面目軒牕秀色幾時開煙深虎豹嘖其族雨  
集龍蛇競起陸匝地陰風草木腥題詩誰向峯頭竹  
安得山靈謁九天肅將帝命揚羲鞭飛廉建旆相後  
先馳驟須臾遍八埏驅出千山雨共煙三峯豁然流  
翠萬古妍

前題

王維泰

邑人教授

三峯矗雲端羣巒讓清峭煙雨蒙其巔盛德不自耀  
氣象愈冲穆淵然涵衆妙孕育贊元化靈籟鳴古調  
舉世想丰儀閉關炯內照空濛隱現間仰止發長嘯

三峯煙雨

時之華邑孝廉

巨靈特闢數峯奇，二氣氤氳望不知。  
高撐雲天原在列，平分楚粵亦相宜。  
曉煙重疊描難盡，春雨涇濛瀑易施。  
自是名山多養晦，個中隱見只隨時。

前題

唐宜甲邑孝廉

天際奇峯峙邑南，形成筆架起晴嵐。  
煙橫絕頂拖輕素，雨滴巒頭聳翠藍。  
玉筍依稀雲裡插，瑤枝恍若露中含。  
何年約伴層巔上，指點微茫孰可參。

前題

唐家允邑明經

灌陽縣志

卷之十 藝文

六十九

奇峯矗峙勢相連，高出龍川山萬千。  
樹擁晴嵐輝反照，雲生谷口彌青天。  
迷離玉笋空中影，蒼翠瓊芝雨後妍。  
每憶天台難可到，且隨鹿豕臥山巔。

前題

王象升邑庠生

三山秀起列雲端，米氏奇峯耐遠看。  
煙雨日多晴日少，懸知絕頂最高寒。

前題

王之騏邑庠生

三峯突兀挿天雄，變幻煙雲在望中。  
晴好雨奇堪入畫，慚非摩詰寫難工。

王樓晚渡

明龍澄

日晚人歸聚水濱小舟渡此幾番春莫言漁父能辭  
劍若在當時為問津

前題

明劉麓邑令

王樓山水如梭薄暮居民待渡多不是公私忙似  
箭此時那得有人過

前題

賴繼亨邑令

卞璞天成百尺臺仙舟江上暮飛來茫茫湘水波千  
里利濟應須傅相材

灌陽縣志

卷之十藝文

七十

王樓晚渡

單父牧邑令

大江之滸玉樓臺山峙水流去復迴仙槎若不殷勤  
渡何處遊人敢上來

前題

明王州

待渡歸人簇水濱樓臺倒影掉翻春孤鴻聲斷行踪  
跡撐入菰蒲月滿津

前題

陳一朋邑令

瞰江高矗儼層臺渡口舟通任往來絕勝乘輿溱洧  
濟令人却憶國僑材



又

凌空差擬化人臺  
細篠蒼枝石罅迴  
望處炊煙浮淡碧  
一航欸乃逐波來

王樓晚渡

陳廷藩

西關路接小江頭  
踏破巖心一徑幽  
月洞空教飛雪練  
寒波無復卧沙鷗  
忙趨且讓人喧渡  
緩步非因客倦遊  
聞說古來靈跡在  
晚歸時或遇仙舟

王樓晚渡

有序

王維泰

城西三里許有仙渡  
舊在望華巖去今渡口二

百餘步巖口臨江東西洞穿路經其中相傳行人抵暮喚船輒飄飄自至寂不見人宋理宗時有道人過此語衆曰刺船者仙人王樓也其船忽沉遂不復渡後人因以其名名山今關口懸崖上尚鐫有王樓山路記其字大如椀萬曆間邑侯賴公泛舟賦詩題曰王樓晚渡世人以訛傳訛遂號玉樓山不復知王樓為仙人姓名矣但賴詩猶有仙舟江上暮飛來之句則其實終不可沒予因感而賦此蓋不欲使古人奇蹟湮

沒於今日云爾

何年渡口泛仙舟  
仙去江山依舊留  
壁峭倒撐天在水  
巖空暗換夏為秋  
夕陽紅樹禪關寂  
明月蘆花漁唱稠  
吹罷洞簫聞鶴淚  
令人千載憶王樓

王樓晚渡

唐宜甲

邑孝廉

津頭渺渺灌城西  
絕岸青山業品題  
水際浮漚堪玩戲  
巖陰石磴好攀躋  
烟昏暮客悠悠會  
日落虛舟自爾低  
非是王樓深普度  
晚來欲濟叫誰攜

前題

唐象兌

邑明經

灌陽縣志

卷之十

藝文

七十二

灌水悠悠野渡浮  
昔時曾此泛仙舟  
層巒巖岫蒼苔冷  
虛谷玲瓏景象幽  
千里行人悲隔岸  
扁舟薄暮到津頭  
幾回愁裡覓仙跡  
直上瀛洲洲上游

前題

王象升

邑庠生

絕壁巍巍聳渡頭  
千秋勒石記王樓  
昔人已跨凌雲鶴  
今日空餘戲水鷗  
好句幸添湘浦色  
良辰應作武陵遊  
黃昏最可移情處  
明月蘆花風滿舟

前題

唐時啓

寶慶人

關畔秋殘細草芊  
白鷗飛盡水同天  
僧歸紅葉林間

寺人喚斜陽渡口船  
渚面已臨三岳黛  
槽聲搖碎一汀煙  
蘆中老大今何在此  
日江干有伍員

龍岡擁秀

明龍澄

龍岡水遠接平沙  
秀擁林巒一望賒  
紫翠四時晴綉錦  
勝遊何日過仙家

前題

明劉麓

龍岡岡上勢嵯峨  
疊障層巒擁秀多  
閒暇携琴遊賞處  
無端佳致恣吟哦

前題

陳廷藩

灌陽縣志

卷之十 藝文

七十三

岡矗蜿蜒岱太空  
相傳體勢似隆中  
瀑飛曲澗時行雨  
氣結孤雲晚出虹  
幽僻莫看成官徑  
仰高惟喜挽儒風  
地靈發秀多人傑  
天矯由來迥不同

龍岡擁秀

唐宜甲

勢若龍遊一矗岡  
端凝浩氣鎮清湘  
名高鳳穴峯巒麗  
翠拔虹橋岫碧蒼  
塢雨塢花添野景  
溪雲溪水映嵐光  
頻看恰似王維畫  
占盡觀陽衆嶺芳

前題

王維嶽

崇岡東折復西灣  
形勝雄蟠楚粵間  
一線峽門嚴鎖

鑰千重保障衛城關物華天寶光難掩競秀爭流意  
自間莫道此邦文獻少五雲如繡擁名山

前題

王象升

崇岡曲折勢凌空翠壁丹崖一望中野樹拖煙籠淡  
月斜陽帶雨挂長虹林巒起伏如人意洞壑玲瓏類  
鬼工况得高賢垂鑒賞山川輝媚更何窮

靈巖秋月

龍澄

靈巖幽邃自天開翠壁丹崖玉作臺秋月照臨清似  
水人間何處問蓬萊

灌陽縣志

卷之十 藝文

七十四

前題

劉麓

靈巖儼若神仙境一竅天然似牖開秋夜月來先到  
影好邀佳客酌金壘

前題

陳廷藩

秋來明月十分嬌雅愛靈巖興倍饒洞闢冰輪圓不  
闕光流瓊影照偏遙溪山豁我忘年譜造化愚人覆  
酒瓢一任曉昏千古永莫論三五始良宵

靈巖秋月

唐宜甲

靈巖窈窕復穹窿疑是五丁鬼斧通秋到洞門騰玉

鏡月移竅穴透玲瓏谷音似奏霓裳曲花影恰如丹  
桂馨天上人間無二樣何須更覓廣寒宮

前題

王象升

問誰假手五丁力穿石臨江開太極東面能通西面  
風元竅湧環非徑直日影星光齊借來透入空山成  
月色造物遊戲弄神怪另闢蟾宮示莫測靜斂清輝  
湘浦明萬古常圓不受蝕蒼茫煙水蘊輕雲隔斷炎  
蒸寒氣逼恍然天上在人間應有嬋娟箇中匿我欲  
策杖相追尋愁殺仙靈難認識桂花香裏暫開尊醉

灌陽縣志

卷之十 藝文

七十五

倚冰壺長嘆息霓裳羽衣曲不聞四壁虫聲空唧唧  
又

探奇着屐破蒼苔山下何年石洞開紅葉滿林秋色  
醉娟娟寒月夜深來

前題

王維嶽

茲巖何以靈元竅含素魄萬古盈不虧清輝自朝夕  
誰鑿混沌精斧斤渾無跡洞中別有天靜理耐冥索  
我來值高秋水天同一碧空光悅精神四壁生虛白  
清風穆然來如入廣宮宅皎皎月窟中天根會可闢

石匱歸樵

龍澄

雲連石匱樹陰陰  
山徑崎嶇澗壑深  
堪笑歸樵何太  
急營生愁晚一般心

前題

劉箎

歸樵石匱倦躋攀  
相喚相呼過此關  
薪擔重時難疾  
步到家日影已西山

石匱歸樵

賴繼亨邑令

玉洞清虛舊有臺  
爛柯仙子去還來  
豫章特出高千  
尺留作天朝柱國材

灌陽縣志

卷之十 藝文

七十六

石匱關

單父牧邑令

山盡江門一線通  
踞天躋地總無功  
石帆方轂應難  
渡嶺外險深第一峯

石匱歸樵

陳廷藩

未信樵林逸興多  
關前翹首定如何  
風生峽口天鳴  
籟人唱巖陰谷  
答歌水畔環山通  
石路松枝帶葉東  
藤蘿歸不踐魚翁  
約知恐觀棋久爛柯

前題

唐納牖邑人  
知縣

絕巘臨流一徑通  
水光山色有無中  
夕陽返照歸樵

急幾筆雲林疑未工

前題

王維泰

絕壁俯澄潭殘霞明遠樹習習谷風生隔水樵歌渡  
捫蘿下山腰石髓滑芒屨相逢不識名渾身帶烟霧  
歇擔憇崖側談笑饒野趣負薪豈不苦生涯託平素  
寒夜一爐紅舉家當襦袴美人來不來榛苓思叔度

前題

時之華邑孝廉

人世優閒孰若他斧斤活計在山阿肩持枯朽懸崖  
下足踏莓苔傍壁過返照入眸紅漸斂歸雲隨笠碧

灌陽縣志

卷之十 藝文

七十七

還多前途各認來時路行望柴門且笑歌

石匱歸樵

唐宜甲

巍巍石匱碧烟多此處歸樵景若何壁峭岿懸人在  
水林深波靜谷酬歌披雲擔上飛花木戴月枝頭縛  
薜蘿隔岸看來名手畫不知幾個爛其柯

前題

唐象允

懸崖峭壁俯深淵路旁山邊與水邊斜負薜蘿山底  
日倒懸人影水中天漁翁欲訊觀棋處樵叟茫歸不  
記年若使王維圖勝跡輞川石匱共流連

前題

唐徵古 邑庠生

何年神鬼劈鴻濛半壁江山一線通  
波靜魚龍驚返照壑深鶴鶴嘯迴風  
丁丁伐木追隨樂浩浩歸歌負戴同  
肩息茅蘆閒臥月幾忘身在斧斤中

前題

王象升

關畔樵夫接跡多無如夫識姓名何  
忘機但見行還止遣興時聞嘯且歌  
早去穿雲盤谷磴晚歸踏月出烟蘿  
往來此地知何限幾箇看棋得爛柯

前題

王之騏 邑庠生

灌陽縣志

卷之十 藝文

七十八

閒步荒郊望落暉偶逢樵子荷薪歸  
崖邊聽得相邀語明早穿雲入翠微

紫竹掃臺

陳廷藩

茫茫何處訪天台忽聽歸樵細述來  
萬丈巍峩難履道一區方正宛棋臺  
松聲帶雨還青嶂竹影搖風拂綠苔  
不有真人常止息肯令頑石絕塵埃

前題

唐宜甲

方石一區竒矣哉曾聞仙侶作棋臺  
子分黑白星辰樣紋列縱橫經緯才  
不用緋衣楸玉局惟憑紫竹去



纖埃風清節亮無如此俗客焉能跨鶴來

前題

王廷鐸  
邑庠生

不識此山奇勝處四時但怪雲鋪絮客言採藥此山中  
絕境依稀尚能語覆頂青天尺五高俯看雲背若  
波濤琪花瑤草名難辨員嶠方壺觸處遭中有巨池  
漾空碧脉連江海通潮汐陰陰洞壑老藤纏黑處應  
有蛟龍宅往年禱雨來山隈風轉靈旗萬壑哀飛電  
奔雷驚躡踵盆翻馬鬣破蒼苔更訝池邊方石起天  
然棋局平如紙仙人奕罷幾千秋黑白縱橫半生死

灌陽縣志

卷之十 藝文

七十九

蕭蕭紫竹倍孤清長伴青松守石枰風細月明時為  
掃不教玉局點花英只恐觀棋柯匪故撥雲且覓來  
時路捫蘿幾日出層巒山上自晴山下雨我欲探奇  
杖短藜客言神境絕丹梯天台流水偶然遇著意尋  
源路已迷

前題

王維嶽

始信蓬萊境不在東海東但令世情遠丹梯若為通  
茲山蘊靈秀萬古青濛濛俗子詎能踐得窺惟野翁  
上有紋石枰琢削非人工黑白子可數旭日照瞳瞳

紫竹蔭其側高節揚清風殷勤掃莓苔繳塵未敢蒙  
何年商山叟彈棋冷碧中棋聲敲竹韵逸響流虛空  
日月本遲遲蜉蝣自忽忽揖讓暨征誅半晌局未終  
茫茫宇宙間消息誰能窮推枰起長嘯跨鶴遊蒼穹  
千載遺片石摩挲景仙踪竹影搖參差風雨吟如龍  
徘徊恐爛柯披榛出蚕叢回首白雲多再覓已難逢

栢亭別意

明劉麓

結亭栢下幾春秋冠蓋紛紛送遠遊名利兩途人共  
逐攜壺挈榼日無休

灌陽縣志

卷之十藝文

八十

栢亭別意

明王州

栢亭風迥鴈拖秋把酒臨歧送客遊翠葉蒼枝渾惜  
別暮雲春樹那能休

前題

陳廷藩

滿酌玻璃暫栢亭知他心醉酒偏醒不憂險阻迷前  
路惟檢謀猷答大廷交道每維駒皎皎離懷多折柳  
青青何當重作千金贈聚散真如水上萍

前題

唐納牖知邑人

行行送遠到郊垌握手啣杯古栢亭不盡離懷魂欲

斷野雲歸去萬山青

前題

王維泰

共嘆王維畫裡詩  
栢亭寫景倍淒其  
神君立馬啣杯處  
父老攀轅墮淚時  
芳草斜陽新有恨  
稻花踈雨舊無私  
輿情戀德今猶古  
布政須留此日思

前題

唐宜甲

駿馬簫簫樹色明  
栢亭祖餞送嚴程  
如今風月杯中物  
異日雲山夢裡驚  
愛埒甘棠方結想  
操侔玉鑑自關情  
昔人別淚非無故  
敷化盍留去後名

灌陽縣志

卷之十 藝文

八十一

恩豐春曉

劉 篴

恩豐春曉景融融  
夜氣都歸旦氣中  
無限風光看不盡  
遲遲麗日又升東

石匱關銘

顧 璘

巖岩蒼珉壁立千尺  
匪斧伊削混沌攸闢  
藉此神用爰著佳名  
中藏伊何曰維邑城  
以鎮國封以固民衛  
蠢爾猥夷罔不惕畏  
山無厲氛江無揚波  
民行其下咸嘯以歌  
噫我來斯實屢觀風  
爰刻銘詩以彰有功

遊靈巖

明 陸經宗 邑庠生

峭壁峩峩傍水湄幾家醉墨有誰知不須晚渡跨前  
事一竅空靈也是奇

遊華山

陸經宗

帝闕何年倚碧空山山都入畫圖中振衣直上連雲  
處領取南來萬壑風

九日登華山

劉昌運邑孝廉

最愛登臨攀絕頂况逢九日好晴天問樵識徑漁磯  
斷信馬遭歧鳥道懸伸手欲爭仙掌露飛身直入翠  
微煙無窮山色供舒嘯破帽隨風落日邊

灌陽縣志

卷之十 藝文

八十二

九日同登華山步韻

王之驊邑人教諭

何日重華居絕頂幸逢九日仰中天挿萸少一情偏  
苦落帽多同興自懸千舞遙疑湘荻影風薰時裊嶺  
梧煙醱酏已入都吁代勝似浮槎到日邊

步入响水江

陸經宗

瀑布掛前山飛流等激箭千年未始停一刻何曾倦  
可以代禪機亦堪供茗戰不妨省俗緣朝暮與之見

題槽山

蒸雲煮霧盡由伊壁立千秋永不移報到龍砂將聚

會胡麻萬斛也堪炊

又

巨靈丹鼎逼虛空  
流俗難施水火功  
十二萬年周一劫  
看余煉就日輪紅

舟經峽山

明王 志邑令

自入湘江不計程  
灌山風景可圖形  
水推滑石可噉  
曉山隱流鶯睨腕  
鳴板隔黃泉  
身命重舟顛  
白浪宦情輕  
民瘼未療心  
應病謾倚蓬  
牕細自評

金鷄渡

在全州地

唐納牖

灌陽縣志

卷之十 藝文

八十三

千尋丹壁拂雲低  
綠樹清波相映迷  
石罅洞開懸玉乳  
渡頭人共說金鷄  
樵歌落日催歸棹  
漁唱前汀起宿鷺  
勝每何年傳遺史  
漫將斑管為留題

前題

王之騏

丹洞幽棲別一家  
不餐香稻只餐霞  
何當詔旦鳴天上  
喚起人間睡夢賒

曲水亭

唐納牖

懸崖石立孤舟繫  
絕壑漸流曲澗分  
歷歷遠峯青插漢  
森森古木白留雲  
忘機鷗泛頻相狎  
避繳鴻飛獨

不羣幽興未闌還倚棹數聲漁唱帶斜曛

前題

唐之栢邑人郎中

廿年滯跡向殊鄉乘興歸流曲水觴少長喜偕新歲  
月溪山不減舊風光三峯畫裡開雲軸八桂香飄襲  
草堂花塢漁磯應有約薊門遲我問清湘

曲水亭

唐之翰邑人文學

汪漢歸來八載身蘭亭今日始相親曾過花縣思湘  
瑟更到漁磯想渭濱放眼縱看天地濶舒懷拚醉歲  
華新明朝醒憶山陰會好倩王維一寫真

灌陽縣志

卷之十 藝文

八十四

曲水亭

唐時雍邑人教諭

趨庭千里返昭關杖履追隨曲水灣氣淑林清松檜  
茂春濃沙暖鶴鷓閒流觴有句皆王謝洗盞何人問  
阮山最喜天倫多樂事東臯月上醉遲還

又

選勝昭關上維舟曲水濱雲移潭影靜磯任渚流分  
舞綵還修禊開樽更樂群書來筆未醉敢擬永和文

遊葛背嶺

明唐納邑人明經

置身天半立把酒連雲吸醉艇泛滄浪滄浪一曲長

此處一行半  
原版損缺

吾廬近南湖南湖絕囂塵手拍南

月為南湖秋花為南湖春湖樂市不樂市貧湖不貧

吾廬此湖足不足湖笑人秋月一輪白南湖萬頃深

大堤何迢迢眾籟已沉沉幽人來水邊緩步以微吟

愴然念此時可以彈我琴我琴不在絃披月迺知音

效牙塘

劉子名代無攷

百年高况還安仰一段天然畫不成何日了吾經國

志漫收形勝繼芳名

灌陽縣志

卷之十藝文

八十五

效牙塘

范子名代無攷

一石釣臺濶誰云姜子成寒潭清似渭故以效牙名

峽中遇雨

唐之銓邑庠生

凜凜九秋風歸舟過峽中四維雲冉冉六合雨濛濛

犬吠山庄側雞鳴茅舍東地天渾未闢澗溢灘聲雄

吊陳烈婦蔡氏

王維泰

恨乏青萍戮獷蠻妾身安肯丐生還事當墮膽銷魂

際心寄冰壺玉宇間擲却頭顱輕似葉扶來節義重

如山鬢眉尚恐慚巾幗俠骨峻嶒不可攀

其二

結髮恩深山海齊，死生細事復何啼。  
生來不愧儒家子，死去真稱陳仲妻。  
日映丹心皆古雪，天垂碧血化長霓。  
香魂冉冉如仙也，月下駭鸞手並攜。

其三

及郎同穴尚何言，泉下遙憐二子存。  
苦雨淒風頻憶母，空山荒塚獨歸魂。  
報仇鑄劍奇男事，作癘飛霜烈婦冤。  
墓祭不勝狂賊首，松楸夜夜哭哀猿。

其四

若非嚴雪慘無情，誰識松篁苦節清。  
天義玉成一義俠，人間閃出眾猙獰。  
蛾眉得正寧辭死，馬鬣雖封不葬名。  
千載有人存直筆，譜成烈傳凜如生。

其五

歷觀女史畫蘭荃，香國長開不壞天。  
杞婦城頭餘涕淚，曹娥江畔尚嬋娟。  
豈知罵賊聲尤壯，不覺捐生氣獨全。  
若比常山三寸舌，頰間只少數莖髮卷。

其亦

誰容四境集飛鴉，坐令雙鸞彩羽凋。  
霧鬢雲鬟新兵



燼天荒地老淚難焦  
孤村夜月啼紅鬼  
華屋春風舞翠翹  
若使升卿今日在  
管教甯季入烟銷

前題

王象升

綠林嘯聚鬼應愁  
抗節遙同賦柏舟  
自誓丹心懸皎日  
故拚白骨委荒丘  
欽哉匹婦能輕死  
何必將軍可斷頭  
若比投崖張氏女  
巍巍同踞百層樓

其二

無端豺虎肆猖狂  
粹髮登途向異鄉  
聖子哭夫心欲碎  
捐生取義行偏芳  
身全大節鬚眉愧  
血濺深山草

灌陽縣志

卷之十 藝文

八十七

木香何日輜軒巡  
下邑願將俠烈上  
君王

閱蔣虛舟先生死節詩傳

時之華

流氛百萬向南都  
危急時間忠義孤  
不作楚囚徒對泣  
寧為厲鬼蔽三吳  
政成渤海真民牧  
死效常山大丈夫  
南北俱如君抗節  
豺狼焉得直長驅

行經蔣虛舟先生墓

時之華

疾風吹草自萋萋  
石柱荒涼野鳥鳴  
諸葛惟期生對壘  
睢陽豈料死孤城  
丹心千載河山壯  
正氣一時天地橫  
扶植綱常今古重  
身殉不似一毛輕

王樓山亭

顧璘

不柰城中役重尋  
水上游秋光俱白  
舫山翠忽王樓  
竹覆溪門靜雲藏  
石洞幽誅茅吾有意  
留語報沙鷗

泰華塢

唐象益  
邑人知縣

有上人者行光灼灼  
字母輪迴逢性以覺  
表曰泰華  
嶽嶽嵯峨我心儀之  
亦孔之嘉出自柳源  
奉母雲遊  
拄錫鹿苑鼎慈焚修  
心契岑寂阿耨創基  
軍持不借  
了無餘思維古大覺  
歷有傳鉢發願飛來  
儵然解脫  
產佛之鄉選佛之場  
始焉終焉上人難量

灌陽縣志

卷之十 藝文

八十八

雷嶺

唐象益

十里行來此更高  
草標木末響雲璈  
小亭縱目窮天際  
無限襟懷不記勞

唐象晉  
邑庠生

我來趁新晴留為暮  
且醉去住兩無心  
一宿山中寺

從望月嶺過沙坪

前人

濕雲片片落平沙  
憔悴西風幾歲華  
短髮漸隨秋病減  
寒衣近為晚霜加  
題箋有句思渾瘦  
買醉無錢興更奢  
門外白衣人不少  
却無一箇到貧家

其二

秋來無日不山家村釀無錢且自賒曲磴幾灣推落  
葉霜楓一路似桃花幾番狂叫人爭異半里歸途路  
屢差入得柴扉無個事科頭階下課烹茶

遊白竹巖

唐徵吉

邑庠生

堪巖絕地與天通勝跡千秋色相空竅穴昂藏煙雨  
濶甲鱗篆刻鬼神工月思茂叔十年悟途愧嗣宗一  
泣窮遙憶山棲無限客孤懷得未與人同

潢潭磐石

明唐邦凱

邑人知縣

灌陽縣志

卷之十 藝文

八十九

浮潭巨石倚山隈偏稱漁家作釣臺鳴艇垂綸迎月  
去得漁收網振柳迴攜壺換酒招呼飲起唱高歌壯  
野懷醉卧石頭忘俗累烟波風月任徘徊

九龍巖

鄧斯綰

郡庠廩生

徑曲石嶙峋澗深波不起洞中尋九龍鱗甲歷可指  
胡不見於田而乃藏於溪結伴遠魚蝦寄情傲山水  
難與俗人田豈為識者鄙徘徊天地寬靈幻一至此

前題

趙大增

錢塘人

造化何奇特登臨縱目觀巖空疑豹隱窟險護龍蟠

水渴溪流細雲連洞口寒天留供白眼日暮染楓丹

前題

趙大墀錢塘人

亂山環合石嶙峋洞底潛龍造化神共向雲根高卧  
穩蒼苔碧澗水粼粼

前題

趙大均錢塘人

自闢洪荒不計年任隨滄海變桑田而今到處思霖  
雨應念蒼生莫愛眠

遊九龍巖

王之騏

靈巖深窟倚林幽為愛奇觀洞裡遊怪石光芒成幻

灌陽縣志

卷之十 藝文

九十

境潛龍蟠繞烟雙眸三三久卧雲根上一一環生鱗  
甲稠我欲乘風鞭盡起大敷霖雨遍神州

華山雪霽

唐象咸邑庠生

朝來日色冷晴峯禹廟原陵第幾重隱約千尋青嶂  
曉縱橫一片白雲封搖開鳳尾竿竿竹透出龍鱗樹  
松高臥空山人不見梅花何處訪孤蹤

三峯烟雨

前人

鼎峙峯頭鎖亂雲未家何事寫紛紛歸來羽客猶衰  
笠上去樵夫任斧斤飛落泉聲聽亦見空濛山色看

此下原缺一葉

層階石磴任莓苔滿地寒煙盡拂開落葉無踪風捲  
去幽篁有影月移來雨花上下曾相似般若高低莫  
亂猜馬跡車塵飛不到何須擁篲再徘徊

栢亭別意

前人

一曲驪歌去路忙旗亭古樹倍蒼涼灣灣綠水流樽  
酒疊疊青山作點裝客夢十年驚落月宦情千古薄  
秋光祇緣兩子催人急誰道他鄉勝故鄉

紗帽山

王維泰

冠是何年掛寒天獨枕流人情競冕散君意狎漁鷗

灌陽縣志

卷之十 藝文

九十一

花發間間眼蒲微不點頭無心傲貢禹高致自難儔

王樓關

陳廷藩

大勇原能敵萬夫設官休問有虞無請看秦代開阡  
陌明月清風共一區

石匱關

陳廷藩

傍水依山險矣哉關前石路更紆迴任從君子行將  
去就是神仙打不開

登臺山

陳廷藩

三年始到臺山頂環顧群峯插漢高愛道亭基懷獨

渺仙源洞口首空搔晴雲迢遞歸巖岫天籟千喁豁  
海濤遊足尚慚司馬跡柳陰隨處有香醪

零陵楊壽春書

灌陽縣志終

灌陽縣志

卷之十

藝文

九十二



館員 初校

清史館舊藏康熙間刻本

民國十九年二月國立北平圖書館鈔藏